



«Бизин тил» деген жамият къурум
«Абусупиян» деген къумукъ китап издательство

БИЗИН ТИЛ

Къумукъ тилни касбучуларыны
2 айда бир чыгъагъан журналы

№ 2
2017

Магъачкъала



ББК – 81 (Кум.)
УДК – 811.512
Б–59

БАШ РЕДАКТОР:

Рашит ГЬАРУНОВ

РЕДКОЛЛЕГИЯ:

Агъарагым СОЛТАНМУРАТОВ
Г ь а б и й б у л а
АЛХАНГЪАЖИЕВ

Ругъаният МУСАЕВА
Исмайыл ХАНМУРЗАЕВ
Ибрагим МАГТЬИБЕКОВ
Супуяханым БИЙБОЛАТОВА
Айнудин АСЕЛДЕРОВ
Элмира ИСАЕВА

© Бизин тил, 2017

© Авторы статей, 2017

© Издательство «Абусупиян», 2017

Рашит ГЬАРУНОВ

ЖУРНАЛДА БАР

«БИЗИН ТИЛ» – ЛАП АЛДЫН МУАЛЛИМЛЕНИ ЖУРНАЛЫ 4

ЖАМИЯТ ВА ТИЛ МАСЬАЛА

С. АЛИЕВ. Къудратлы иш этме сойсент, эби табулур	5
М.-Г. АКАЕВ. Биз не этип болабыз	10
С. ЖАНАЛОВ. Тилни сакъламакъ учун тийишли чарапар	12
А. СОЛТАНМУРАТОВ. Тил илмубузну байракъчысы	15
М. АРСЛАНБЕКОВА. Ана тилге абур этмек – ватандашлыкъ борчубуз!	19
С. САЛАВАТОВ. Бизге етишгенде сёнме къоймайыкъ	20

ШКОЛАЛАР ВА АНА ТИЛ

Р. ТАТАРХАНОВА. Школада ана тил булан байлавлу кемчиликлер	21
А. АСЕЛЬДЕРОВ. Алтын хазнабызыны сакълайыкъ	22
Гь. ГЬАЙБУЛЛАЕВ. Тилин унугтъан – талигин ютгъан	25
Н. АЛИЕВА. Ана тилибиз сакъланын учун	26
С. САЛИМОВА. Ана болмакъ азлыкъ эте анагъя	28

МУАЛЛИМГЕ КЁМЕКГЕ

Ж. ХАНГИШИЕВ... къумукъ тилни орфографиясы	30
А. СОЛТАНМУРАТОВ. Идеологияны таъсириinden къутулуп	38
С. БИЙБОЛАТОВА. Къумукъ тилден ва адабиятдан тематика планлар	40
С. БАГЬАВОВА. Сёзлюк иш – шагъар школаларда	64
М. ХАДИСОВА. Абуз ва языв тиллени башгъалыкълары	66
Э. ИСАЕВА. Абусупиянда къонакълыкъда	67
М. АБУКОВА... Тест-тапшурув	72
Р. НОГАЕВА. Класдан тышда ачыкъ дарс	73

КЪУЖУРЛУ ГРАММАТИКА

И. КЕРИМОВ. Къумукъ тилни къужурлу грамматикасы	77
Иб. ГЬАЖИЕВ. Чет сёзлени баянлыкълары	79
Р. ГЬАРУНОВ. Айттар эдим бирисин	80
С. САЛАВАТОВ. Гиччи яшланы сёзлери	82

АНАДАШ АДАБИЯТ

С. СОЛТАНБЕКОВ. Сыралы сёзлер	84
М. АКТЫМУРЗАЕВ. Не татлидир ана тил	88
С. БИЙБОЛАТОВА. Къумукъ алипба	89

«Бизин тил» – лап алдын мualлимлени журналы

Журналыбызны биринчи номери чыгъып, бизин милли маданият ва ярыкъландырыв гъаракаттъя гёрмекли къошум болду деп умут этебиз. Миллетни милlet этеген аслу белги тил экени белгили. Шо себепден «Бизин тил» деген жамият къурумну гъаракатчылары тилни сакълав ва оъсдюров ишде лап алдын яш наслуну тилине аминликде тарбиялавну аслу масъалагъя санай.

Эки ай алдын журнал чыкъгъанлы, биз къумукъ районлардан айланып, тилибизни мualлимлери булан ёлугъувлар оytгерип турабыз. Шо ёлугъувланы мурады – ана тил ва адабият дарсланы салынгъан кюон ахтарып, кемчиликлени аян этип, биз алышдырып болагъан гъалны алышдырма урунмакъ. Биз гъарибиз гъар гюн дегенлей, аз иш этип бусада, алгъа юрюй турсакъ, кёп де гетмейли, гиччи-уллу уьстюнлюклеге етишмей къалмажакъбыз. Иннемей олтуруп, гъкумат гъайыбызны этмей деп, кант этип турсакъ, алгъа юрюш чю нечик де болмажакъ, бара-бара миллетибизни тилин, сонг ону оъзюн дөтас этежекбиз.

Шо себеплерден биз, кантны къоюп, шу тил масъалада милли къысматыбызны оъз къолубузгъа алмакъны тийишли гёrebиз. Закон булан ихтияр берилеген ёлланы гъууматдан да тилежекбиз, талап этежекбиз. Болмагъанларын гъар ата-анадан, мualлимден, гъаракатчы ва касбуучу адамлардан къара вуллайбыз.

Къумукъ районлардан, шагъарлардан айлану туруп болгъан ёлугъувларда биз школаларыбызда ана тилни ва адабиятны дарсларын яхши билеген, оъз касбусуна къысматын байлап, намуслу загъмат тёгеген мualлимлер кёп экенни билдик. Шо адам гюч булан биз, тил масъаланы агъамиятын артдырып, пайдалы ишлер этип болажагъыбызгъа шек де ёкъ. Мualлимлер «Бизин тил» деген журнал чыгъып башлангъанын бир тавушдан якълайлар ва тарыкъ буса, шогъар язылыв этмеге гъазирлигин билдирилер. Тек гъалиге биз журналны оъз имканлыкъларыбыз булан чыгъарып, шону мualлимлеге тегин етишдирмеге мурат тутгъанбыз. Неге тюгюл, бизин учун шу иш – сыйлы борч, коммерция проект тюгюл.

Редакция журналны биринчи номеринде де билдириген күйде, «Бизин тил» ана тилни мualлимлери ва оъзге касбучулар учун чыгъарыла ва шону бетлеринде аслу гъалда мualлимлени материаллары ерлешдирилежек. Шогъар гёре, мualлимлер сесленип, гъали бизин бокъчабызда дагъы да эки номерге чакъы материал жыйылгъан. Шо да бизин ишибизни гележеги баргъа инандыра. Дагъы да керен чакъырабыз: языгъыз, сёйлегиз, гелигиз, гъюреметли мualлимлер! Бугюн ана тилибизни сакълавда, оъсдюровде сизден къыйматлы адамлар ёкъ. «Бизин тил» – лап алдын сизин журналыгъыз.



алим,
жамият галышывчы

КЪУДРАТЛЫ ИШ ЭТМЕ СЮЙСЕНГ, ЭБИ ТАБУЛУР

Гъар-бир жамиятлыкъ ишде де биз анлавлу касбучуланы ой-пикру таклифлери не таянып иш гёрме герекбиз деп эсиме геле. Шулай мердешлеге чыкъма болсакъ, шончакъы бизин ишибиз гъар дайм де алгъа гетер эди.

Эсигиздедир, биз таза къумукъ аудитория жыйылгъан гезиклер болуп, Республика библиотеканы залында болуп, Къумукъ театрдамы яда огъар ошагъан башгъа идара-лардамы – жыйынларбыз ана тилсиз юрюлюп, орус тилде юрютме муштарлы болуп барабыз. Мен муну, воллагъ, орус тилни билегенибизден гери тартылайыкъ деп айтагъаным тюгюл. Биз кёп тиллени билген сайын, англавубуз шончакъы артажакъ – о герти. Амма ана тилибизни яшавну гъар-бир генг тармакъларында къоллавдан тайдырып, тар бир ожакъ, тайпа-тухум тилге айландырма башлагъандокъ, бир изгъычыв милли аврұгъа тарыма башлайбыз, биле-бile оъзюбюзге Аллагъ берип, анабызын увуз сютю булан гелген, оъзунде минг йылланы боюнда бизин халкъны башындан гечирген юрек урұларын (пульсун), шолай болгъан сонг, жаныкъяны булан бизге берилген тамур гелишин инкар этегенлерден болабыз. Гъеч бир де унутма ярамайдыр деп эсиме геле – Аллагъны аты булан эжжелги заманлардан оътиоп, сыкълашып, бирлешип, бизге бир къумукъ халкъ деп ат берилген сонг ва халкъчылыкъ аламатгъа гелип, дюньяларда дагъы такрарланмас ат алгъан сонг, шо халкъ тагъылгъан ат булан Тенгирини пурманы булан ону дагъы гъеч бир башгъа халкъ да такрарлап болмасдай гъар милли халкъны бютюн къис-

матын белгилейген коду бериле. Къумукълары, бизин халкъны инг къурч къутлаву – «Къутлу болсун» шо алгъыш маънадагъы сёз булан айтыла, шо сыйлы маъналыкъ бизин Къумукъда оъзге халкъларда йимик инг сыйлы башгъа сёзлер булан да айтыла. Оланы бири – «Худайым» – бу буса «Аллагъым», «Тенгирим», демек терен маъналы инг яраппи англавланы бири. Олай демек – сонг Худай (Къудай) оъзю салгъан – къутлукъ бар, сен шо сагъа берилген баш тамур тапшурувгъа сый этип юрюмесенг, шо сен этеген енгилмесликге гёре шону авурлугъунда яшавунг авур къыйынлыкъга тарымакъ бар – деген маънада бола, сонг-сонг оъзюнг де билмей туруп, шону учун башгъа себеплерден къайры авур аврувлагъа тарымакъ бар. Шо биле-бile туруп оъзюнгню яшавунгну оъзюнг къысгъарта юройгенлик бола. Шу ёлгъа тарып, анасыны сютю булан гелген культурагъа писиревсюзлюқ этип, ону сан этмей, магъа тышдан гелген ят культура да таманлыкъ эте деп юройгенлер оъзлени инг аявлу инсаплы тамурларын оъзлер чарпыйгъянлардандыр деп эсиме геле.

Тенгирин сагъа дюньяда айрыча халкъ гъисапда айрыча ат береми, тарих гелиш береми, денгиз, топуракъ, тюз, тав береми, сагъа сени учун жан салып культура, ругъ береми, дюньяланы толмагъан ери шуну булан толсун деп, асил ана тил береми – шо учь де зат булан бирче салып сагъа хас халкъ гъисапда къутлу яратыв гючге, гъар гюнлюк гелимлеге алданып, айсененилик юрюте бусанг, сен бу яшавдан нечик наисип къаравуллама боласан? «Тилингни тийишли күйде къол-



лап, ону салынгъан гъакъылынгны, ону ичиндеги минг йыллар боюнда топлангъан сынав къудратлыкъны артдырывну гъайын этмей бусанг, сен, Тенгирини янындан не эп табуп, яхшылыкъ къаравуллама нечик ихтиярлы болурман деп эсинге геле?» – деп сорама сюер эдим.

Гелигиз, бир нече ачыкъ мисаллар алыш къарайыкъ. Эгерден тувгъан яшларыны атасы-анасы гъайын этмей, ташлап къойса, не болур эди?! Сиз билесиз чи, къолланмагъан белни tot басып, о чириме башлай, шуну иймик генг яшав арада ана тилибиз къолланмай юрюсе, ону арты негер гелер эди – башлап тъалиги шагъарлы дагъыстанлыланы бирлери иймик, бизин яшларыбызгъа орус тил болса да таман, ана тилни билмек не пайды бере деген гъалгъа чыкъмасмы эдик? Къумукъ газетлеребизни, школаларыбызыны, театрларыбызыны орус тилде язылагъан, охулагъан мердешлеке чыгъармасмы эдик?

Нечакъы айып этсегиз де, нечакъы эрши гёрюнежек буса да, айтайым, бугюнгю бизин милли театрларыбызда, айрокъда яш наслу актёрларыбызыны арасында учь минут таза ана тилинде сёйлеп болмайгъанлар бар, гъатта юртларда намусгъа къалып милли газетлеге языла буса да, оланы охуп авара болмайгъан ана тиллерден дарс береген муаллимлер бар (айрокъда шагъар ерлердө).

Дагъы несин айтайыкъ, бугюнгю илму къуллукъчулардан юртгъа гелгенде оъзюнью касбусундан – философиядан, экономикадан ва башгъа тюрлю темалардан учь минут башгъа тиллер къошмай, ана тилинде баянлыкъ берип болагъанлары аз ёлугъар.

Бу нукъсанлыкъ буса аста-аста булан гъукумат къурумлагъа юкъмагъа башлай – шогъар учь мисал гелтирмекни тийишли гёремен. Дагъыстан школаны туташ охув китаплар булан таъмин этеген, бек тарыкълы китаплар чыгъарагъан издательствосу бар эди. Аз-аз харжлыкъда экономия этебиз деп,

бир-бир чиновниклер шо издательствуңу ёкъ этдилер. Ондан къайры да, бугюнлерде де ана тиллерде чыгъарылагъан адабият китапланы 200-300 тиражлагъа чыгъарылагъан гъалгъа салдылар. Гъалиден бир нече йыллар алдын Дағъыстан университетни составындан ону ректору Муртазали Рабадановну приказы булан университетни харжын экономия этебиз деп, университетни дагъы бир бёлюгүне де тиймей, дагъыстан адабиятланы ва тиллени касбучулары кёп йыллар къатты къаст этип ачылгъан орус-дагъыстан факультетин болмагъандай этип тоздулар. Эгерден шу факультетде алда гъарыйл 70-75 яш тюшюп охуй эди буса, бугюнлерде – кёп болса 30-40 студент охуйдур. Гъали университетни орус филология факультетини ихтиярына берилген шо бёлюкдеги милли группада, мисал учун, къумукъ бёлюкде, кёп болса, охуйгъан 5-6 студент бола.... Шолай оъзге бёлюклеринде де...

Темиркъазыкъ Кавказдагъы башгъа республиканы пачалыкъ университетлени барысында да милли тиллени ва адабиятланы уйретив факультетлер тийишли къайдада сакълангъан.

Бугъар ошайгъан бизин республика-дагъы ана тиллеге бакъгъан якъдагъы тёбен-лешиб артса тюгюл, кемимей деме ярай. Республикада милли ана тиллени къоруп якълавну закону къабул этиле дегени арадан он йыллар оъте бара. Шоллукъда бизин республикада ана тиллерде юрюмели ярыкълан-дырывчу иш ахырына ерли чёге бара десек, бир де янгылыш болмас эди. Шо эстерилген законну къабул этив чю чалтлангъаны герек. Шо болмаса, биз республикада шулай гъал тувуп гёрежекбиз: гъатта республика башчыларыбыз да халкъы булан халкъыны тилинде къатнашып, лакъырлашып болмайгъан дарражагъа чыгъажакъбыз.

Оъзге халкъланы айтып турмайллы, гъалиге бизин халкъны – къумукъланы бугюн-



гю гъалларына гёз къаратайыкъ: биз, къарагъанда, артыкъ чыдамлы халкъгъа айлана барабыз, бизин ата топуракъларыбыз таламтакъышгъа салынгъанына нечик де чыдайбыз, гъатта артдагъы учь йылны ичинде къумукъ юртланы Къарамантёбедеги ерлерин берип, масъаласын чечип ахырына чыкъмай, гёргемиши болуп юрюйген пачалыкъ къурumlарына инамлыгъыбызын тас этмей юрюйбюз. Ону булан бирче сагъналар толуп «анай десем, ананай» деген бош шоулардан толуп, амма къудратлы бырынгъы йырчылыкъ искусствообуз ёкълашып барагъангъа гёз юмуп юрюйбюз ва бугъар ошайгъан юз тюрлю мисаллар барын гъисапгъа алмай яшав сюрешибиз.

Шо тайпа бизин халкълагъа бакъгъандагъы немкъорайлыкъланы айтып узата турмай, натижалы бир нече ойларымны айтма сюемен.

Дагъыстан, айрокъда къумукълар тарихи тутгъан уллу маъналы денгиз бой майданлана-ягъаланы нечакъы уллу гележекде стратегиялы маънасы барны биле туруп да, ахыры да ону уъзюп йыгъажакъ – не экономика ярлылыкъ тюгюл, не загъматлашыв технологияда артда къалыв тюгюл, ону халкъларыны милли хаслыгъыны, ону булан бирче

оъзюнью тарихи эсин ва ругъ байлыгъындан айрылып, ондан магърюм къалмакълыкъ – оъзю-оъзюне «болгъанманмы, барманмы» деген гъаллагъа чыкъмакъ болажакъ.

Унутмайыкълар, бизин Дагъыстанны дюньялагъа атын малим этген башлап ана тилинде, ону булан янаша башгъа дюнья тиллеринде сёйлеп, къатнашып болагъанлар болгъан: А. Къазем-Бек, Имам Шамил, А. Акаев, А. Тахо-Годи ва олай кёплер. Оланы къайсын бирин айтайыкъ, биз бугюнлерде (къумукъланы алсакъ), гъалиге чи нечик де, тарихи заманлардан берли гелеген бизин ана тилибизни бек къудратлы маънасына бир тююр де къыймат бермейбиз. Биз шулай

халкъбыз чы – мисал учун, гертисин айтгъанда, яхшы кюйде ойлашып къарасакъ, бютюн Кавказда гъакъ герти халкъара тил – международный маънасы булангъы эки тил бар. О не гюргю тил тюгюл, не осетин тил тюгюл, не азербайжан, не эрмели тиллер тюгюл, о орус ва къумукъ тиллер. Бизин халкъ – оъзюню тарихи гелиши булан дюньяда шо сыйны къазангъан халкъ. Бизин тил бары тюрк тиллеге ортакълыгъын сакълама болгъан. Тюрклеге, къазакълагъа, узбеклеге, гъатта азербайжанлагъа бырынгъы тюрк эпосу болгъан «Дадам Къоркъутну» кёп ерлерин таржума этип, англама тюше буса, къумукълагъа ону гъеч бир таржумасыз, турва маънасында англап бола. Огъар ошагъан олай нече тарихи документ йимик эсделиклер бар. Къумукъча сёйлесент, тюрк де, чуваш да, якъут да, узбек де шоссагъат англай... Бизге шу гъалгъа тюшюнүп, тилибизни оъзден оъзменлигини теренине тюшюнүп сёз юрюлеген гезиклер бек азлаша бара деп эси ме геле. Биз тилибизде, ону билип битсек – бырынгъы кимерлербиз, биз тилибизде хазарларбыз, биз тилибизде къуманлар-къыпчакъларбыз. Амма, не этерсен, шу англав илмуда хас алым болуп битмей турал...

Шу ва башгъа шугъар ошагъан бизин тилибизни оъзден оъзменлигин узатып, дагъы да ону бизден сонггъу узакъ наслулагъа эсенаман етишдирмек учун уъч-дёрт ёл бар:

Оланы башлапгъысы – бары да масъалаланы гъукумат къурумлагъа саллап къоймай, халкъны оъзбашына (автономно) чалышывун артдырмакъны тийишли гёремен. Биз билебиз чи, халкъны генг къатлавларыны ортакъ чалышыву болмай туруп, гъакъ герти халкъчылыкъ даражагъа етме бек къыйын бола. Шу ишде элде бар жамият къурumlар, бойнуна алса, кёп иш этме болур эди. Мен шогъар инанаман. Тек, не этерсен, о тайпа къурумлары арасында (янгыз бизин халкъда) бавур этдей биригив ёкъ. Шону



учун да халкъ жыйылышларда, ожакъларда, тайпа-тухумланы арасында, школаларда, межитлерде, башгъа тюрлю эл, жамият къатнашыв гюнлерде ана тилибизде сёйлевге оър маъна берилгени герек. Ана тиллеге Аллагъны янындан бек асырап, берилген аманатгъа йимик янашмакъ, ана тил тас этивге бютюн халкъны савлугъун, тарих эсин-пусун тас этип, оъзюню оъмюрюн къысгъартыв ёлгъа тюшген йимик къоймай ва ахыр англав бермек.

Биз айлана биосферада табиат бузула, гъава авурлаша, сувларыбыз алдынгъы дагъни татывун тас эте дейбиз. Амма ону булан бирче билме сюймейбиз, шолар булан бирче ана тиллерибизге айсененик этип, тап табиат бузулувгъа тарыйгъанда йимик, – шолай аврувлагъа тарыйбыз биле-бile туруп, ана тилибизни инкар этеген ёлланы сайлап, бизге де бек яман аврувлар къобуп, оъмюрлерибиз къысгъартабыз, халкъыбызын йыл сайын азлашывну ёлларына теберебиз. Дагъы да, гелигиз, бир мюгълетге ойлашып къарайыкъ. Негер бизге эки къол, эки гёз берген?! Масала, къаракъушгъа йимик: «Ма, сагъа шу да таман», – деп, ашаву да шо болагъан, чокъуву да шо болагъан бурун берип къоймагъан? Ойлашып къарайыкъ, Аллагъ берген эки къолну бири бизин бары ишибизде де ортакъчылыкъ этмей турса, не болур эди? Оазма, сонг ёкъ болуп гетме къарамасмы эди? Инсанны бир саны ёкъ болса, не гъал тувагъанны барыбыз да яхшы билебиз... Тил де шолай зат. Тувмадан къумукъ бола туруп, шогъар писиревсюз ожакълар онгур-оъсер десе, мен бир де инанмас эдим. Аллагъ бергенге шо кепдеги немкъорайлыкъ, гёрюп турабызы, къачан буса бир ерингден авур аврув болуп тешилип чыгъып гелегени герти зат. Шолай ожакъланы тергеп къарасагъыз, нечакъы сюйсегиз де, шу оърде мен айтагъангъа мисаллар табажакъсыз.

Оърде эсгерилген ана тил – ата-ана куль-

туралы беклещидиривню, огъар къудрат-гюч беривню экинчи ёлу булайдыр.

Бизге, халкъ гъисапда Россия ва Дагъыстан тъукуматлыгъыбызда бек талаплы ва къатты тутуп юрюме заман болгъан. Шогъар гъар гюнлейин уйренме тюше. Амма гъалиге шолай тюгюлбюз, башгъалар дюр. Гъукуматлыкъдагъы бизин милли элитабызыны, мен билсем, кёп яны оъз башына къазанчлы ёллар сайлап, эгоизм аврувлагъа тарыгъан. Шону учун биз милли даражабызын оърлендирмек учун, бизге берилген квоталаны (гъукуматдагъы къуллукълар, депутат ва башгъа тюрлю ерлер) корпоративно-клановый группалагъа тапшуруп къоймай, къатты күиде янгыз Дагъыстанны даражасында тюгюл, бютюн Россияны масштабында гъакъгерти милли политика юрютеген вакиллер булан иш къурма бажарагъан халкъ болма перекбиз.

Динибизни, жамиятлыгъыбызын юрютегенде де, бизге шолай къудратлы къайратлыкъ етишмей къала. Россияны къайсы халкъы да, шону ичинде башлап оъз Ватанын этмей туруп, хас айрычалыкъда ерлешмейли, умутларыбызыгъа етме болсакъ, о тамаша! Тергев этип къарагъанда, гъатта къумукъ эллдердеги кёбюсю межитлер де ич жамият масъалалардан тайыша бара.

Уъчюнчу ёл, ёлдашлар, биз гечиреген ингбырынгъы заманлардан гелеген бизин тарихи гелишибиз гёрсетеген йимик, дюньялар даражасында ойлашмай туруп, ону умуми барышына къошулмай ва къошум этмей туруп, загъмат – яраппи усталыгъыбызыны, гъракатыбызын гюн сайын янгыртмай туруп, бир халкъ да оъз ёлунда оърлюк тапмас.

Дюньяларда барны янгыртып артдырагъян халкъ гъар заман да алгъа гетер. Бу мен айтагъян ойда-пагъмуда болсун яда башгъа тюрлю ишлерде болсун... – о башгъа тюгюл. Бу ерде чалт айтып, бир мисал гелтирейим. Мен гъали адабият касбучу ойгъа тюшоп айтаман: дагъыстан поэзияны гъалиги оър ин-



саплыкъ ва инсанлыкъ дюнья даражагъа гётерип мен билеген гъали эки шаир бар. Олары бири – Йырчы Къазакъ (19-нчу асру), экинчиси – Расул Гъамзатов (20-нчы асру).

Туврасын айтма тарыкъ, бу тайпа масъалагъа тергев бермейли гъайсызлыкъ этеген халкъ янчыла, тар провинцаллы даражагъа тюшме баштай. Бугюнгү Дагъыстанны, ону ичинде бизин халкъны гъалы да, шо меселде.

Нечакъы къыйналта буса да, ону айтмай къоймакъ дурус болмас эди. Биз шулай тогъаслагъа гелип урунабыз да, сонг не этерибиз билмей талчыгъабыз.

Бизге, бютюн Дагъыстангъа тарихи къысмат бек аз заман тюгюл бермей – шону да гъисапгъа алып, бизге, айрокъда бизин къумукълагъа, миллет гъисапда оъзюбюзню гёрсетмек учун, шулай эки-ууч затда озма герек: гъакъылда, ругъда, илмуда (билимде) ва янгы загъмат гъаракатлашывгъа гъасиретлигебиз артдыра туруп. Бу гъал, бу талапчылыкъ бизин милли яшавну бары да янларын къуршагъаны герек – дюнья англавларын, динин, инсанлыкъ даражасын, бары культурыасын, къырыятын, къылыгъын...

Мени ахыр айтма сюегеним: бу тайпа кёпкёп сыралыкъланы бизин ана тилибизде сакълангъан – ону бизин ата-бабаларыбыз

чекген ағылар, олар етген устюнлюклер, биз не къудрат-гючге теренден тюшюнген сайын, шончакъы алгъа гетежекбиз ва миллет гъисапда дагъы да минг йыллагъа узаты-

лажакъбыз.

Бу ерде бирдагъылай ташдырып айтма ери гелди: бизин халкъ гъисапда къудратлыгъыбыз, къайратлыгъыбыз, савлукъ-саламатлыгъыбыз Аллагыны бизге инанып берген учь аманатына таянгъян:

- 1) тарихи эсибизни къорумакъ;
- 2) денгизибизни, тавубузну, ата ерлеребизни, ана эллерибизни къорумакъ;
- 3) тилибизни, динибизни, дюнья инанчларыбызын къорумакъ!

Шу аманатлагъа гъайсызлыкъ этмек бизин гъарибизни янгыз-янгыз да, миллет гъисапда – бизин барыбызын да яшавдан айрылышны ёлларына сингдирип «аврут», азманлашдыра. Шону билип турагъан халкъ болайыкълар.

Ахырда мен айтма сюегеним буладай:
Гелигиз, –
Динибизде,
Элибизде,
Эсибизде,
Тилибизде
ва булагъа бакъгъан гъар-бир ишибизде къатты гъаракатлы тутагъан халкъ болайыкъ!

Къудратлы ишни этме эби табулмай къалмас!



Биз не этип болабыз?

Дюнъядагы 7 мингге ювукъ тилден илмуда янгыз 300 тил ахтарылгъан. Лап гючлю тюркология школасы Россияда иш гёре деп де гысаплана.

Ана тилни Халкъара гюню саналагъан байрамны алдында магъя тил ва адабият ахтарывчу, жамият гарапатланы жагъ ортакъчысы, РСФСР-де халкъыга билим беривню отличники Магъаммат-Гъанипа Акаев булан гезикли керен ёлугъуп, къужурлу лакъыр этме наисип болду.

Тёбенде ана тиллени тюнегюню, бугюню ва тангаласы деген маңнада юрюлген лакъырлашывну охувчуларыбызыны тергевионе беребиз.

– Магъаммат-Гъанипа Даниялович, сиз, 40 йылдан да къолай заман ана тилден, адабиятдан, тарихден дарслар юрютиоп, терең ва бай сынав топлагъан оыр категориялы муаллимсиз. Пенсиягъа чыкъғынгъа да къарамайлыш, англатыв макъалалар, илму ишлер, китаплар язасыз, оызге тюрлю умпагъатлы чараганы юрютесиз. Бугюнгю сют ана тилин унута барагъан яш наслугъа тил деген не экенин англатсакъ яхши болмасмы эди?

– Гертиден де, тил деген недир? Бу соравгъа ким-ким де жавап берип болмай. Тил – о жамиятта тарихи къайдада яралгъан материальный тамгъаланы системасы.

Тил башны ичинде буса да, тавуш этип чыкъмай туруп, тил болмай. Тилни күтеген борчларына гёре белгилеме тюше.

Тилни белгилейген борчларына тилни функциялары дей.

Тёбенде шо функцияланы айтайыкъ:

1. Номинатив – ат функция, предметни, белгини, санавну атын айта. Мисал учун: «Мен шагъаргъа бардым».

2. Тилни бирдагъы аслу функциясы коммуникатив функция – гелишив, сёйлешив, гъакълашыв (мәлумат). Бу функциясы булан тил адамны гъакъылын, сынавун, сав адамурлукъын гъакъылын сынаву булан таныш этип байыкъдыра.

3. Экспрессив – гыс билдирив функция. Бу функциясы булан тил адамны ич гысин, оюн къыргъа чыгъара.

4. Конструктив – къурашдырыв функция, сёзлени къошуп, пикру къурашдырыла.

5. Аккумулятив функция – жыйыв, къорув, сакълав. Адамны баш майында тил информацияны сакълай.

Миллет арада, халкъны борчларын күте туруп, тил этноопределяющий (миллетлигин гөрсөтеген) функцияны да күте. Адамны халкълагъа аслу гъалда тил бөле.

Этнооберегающая функция – миллетни миллетлигин тил сакълай.

2000 йыл ватансыз тургъан жугъутланы тили де, дини де сакълангъан.

Мифде де айтылагъангъа гёре, башлап-гъы адамланы барысыны да бир тили болгъан дей. Олар оызлени бирлиги булан онча да гючлю болгъан чы, кёкге етишеген башня къуруп, аллагъланы ягъына гётерилме суюген.

Аллагълар, бу ишге бек ичибушуп, не этегенни билмей айланагъанда, бириси адамурлукъын къырып битдирмекни таклиф эте. Башгъасы: «Адамланы гючлю этеген – тилини бирлиги, олагъа биз гъарисине бир тил берейик», – деп таклиф этген. Шолай этме де этгенлер.

Минглер, миллионлар булан жыйылгъан халкъны гъариси бир башгъа тилде сёйлегенде, къавгъасы кёкге етише болгъан. Шолайлыкъын орусча «ававилонское стол-

потворение» дей. Къавгъалай, эрише, уруша туруп, булар тозулуп гетгенлер.

Тилни аслу функциясы информация берив, гъакълашыв, гелишив болгъан сонг, савдюньяdagъы адамиятгъа бир тил герек. Гележекде шолай болма да болар деп гъисап этебиз.

Бу ерде «Ана тиллеге не этейик?» – деген сорав тува. Ана тилни уйренме герек бары да охув ожакъларда. Бизин мактапларда кёп тиллени уйретмекни тишили гёрелер. Гъалиги адам учь тилни яхшы уйренгени герек: ана тил, пачалыкъ тили болгъан орус тил, халкъара тиллени бири.

Охув ожакъларда 4-нчю класгъа ерли бары да предметлер ана тилде болма тюше. Сонг да 9-нчугъа ерли бары да илмуланы ана тилде охума герек. 10-11-нчи класларда тарыкъ предметлени орусча охума, оъзге предметлени къумукъча юрютме ва билме герек.

Бары да илмуланы къумукъ тилге гёчюроп, уйренип болмай дейгенлер тюз тюгюл. Неге десегиз, илму терминологияны кёбюсю халкъара тилде: синус, косинус, тангес, ко-тангес ва ш.б.

1859-нчу йылда Шамилни есир этип алгъанда, орус пача Кавказдагъы сатрапларына бурай кагъыз язгъан: «Вы только что совершили героическое дело – военной силой

покорили Кавказ. Теперь перед вами более славная задача – орусицировать Кавказ». Бу, Аллагыны къыйыны гелгирни (гелме де гелди) намарт умутларына етишмеге бизин тилибиз де, динибиз де къоймады.

Гъалиги мультиклер, телевидение, интернет, орус школа бизин балаларыбызын балаларына «солдатча» сёйлемеге борчлу эте бара. «Яшав олай багъып бара болгъан сонг, биз не этип болабыз дагъы», – деп кант этген къумукъга бир къоччакъ улан: «Балаларынгны балаларыны ортасында да олтуруп, тап-таза ана тилингде сёйлеп болабыз», – деп жавап берген. Шо сёзлер бизин бютюн яшавубузда уългю болуп токътамагъя да герек.

*Юз-минг йыллар сёйлемей
Тургъан таш сын тилленин,
Сырын ачды халкъыма,
Тилкъав этип бирлени.*

*Хадирин аз билсек де,
Тилим де бар, диним де.
Тенгирден кем гёрсек де,
Тас этмесбиз бирин де.*



Салимгерей Жаналов, Эндирай.

Тилни сакъламакъ учун тийишли чарапар

Къумукъ халкъыма къара,
Тилин унутуп бара!
Къумукъча китапланы
Охуп болмай авара!

Илмугъа гёре, адам къайсы тилде ойла-рын ойлаша буса, шо миллетли болуп токъттай. Гъалиги яшёрюмлер чи нечик де, бизин чагъыбыздагъылар да, шагъарда оьсген буса, орус тилде ойлаша. Мен оьзюм де бир-бирде, айрокъда гысап этегенде, орусча ойлашаман. Олай болгъанда, биз барыбыз да ичи-бизден орусларбыз. Тек о илмугъа гёре. Мен бусам, бираз башгъа күйде гысап этемен. Адамны къанына къайсы миллетни хасияты синген буса, ол шо миллетни вакили болуп токъттай. Бу ой меники. Мен де эндирайли Салимгереймен! Эс этген бусагъыз, яшларыбыз къумукъ сёзлер булан орусча сёйлейлер. Мисал: «Мен сагъа къарап тураман», – деп айтма тийишли ерде: «Мен сагъа токътайман», – дейлер. «Машинге миндим», – деп айтма тюшеген ерде: «Машинге олтурдум», – деп айталар. Таза къумукъ тилде сёйлейбиз деп гысап этегенлерибиз де ону къоллайгъанда кёп хаталар йиберебиз. Гъар сёзню оьзюнью хас маънасы барны унутуп, немкъорайлыхъдан, бир сёзню орнунда башгъа сёзнюю къоллагъаныбызын эс де этмей къоябыз. Тюркагълю къумукъ тил – уйренме де, сёйлеме де рагъат тил. Амма ону бузмагъа дагъы да тынч. Мисал: бир затны «тайдыражакъман» деп айтма тийишли ерде «тайдыртажакъман» деп къоябыз. Бу буса башгъа биревге тилеп яда гъакъ берип этдиреген иш болуп токъттай. Ва, амма «тайдыражакъман» дегенде буса, айтгъан адам оьзю тайдыражакъны англата. Бирдагъы хата: «гелтирни» де, «алып гелни» де ерлерин кёп алышдыра-быз. Гелтире оьзю юрюп болагъанны – адам

ны, гъайванны, машинни. Гелип болмайгъан затны гётерип яда юклеп алыш геле.

Булай кёп мисалланы эстгерме болабыз. Мен биревню де уйретме сюймеймен. Бу барыбыз да билеген затлар. Овз тилине абур этеген гиши хаталардан оьзю де сакъ болур, башгъаланы да къорур. Оърдеги калималагъа гёре бизин масъалабыз тилибизни сакъламакъда да тюгюл. Масъала биз ойлашагъандан терен ва къыйын. Бугюн бизин алдыбыздагъы масъала къолдан чыгъып барагъан ана тилибизни къайтармакъда. Ондан тюшюп тас болгъан сёзлени башгъа тюркагълю тиллерден излеп табып, асырап, аявлап, ишып-жукуп дегенлей ерине салмакъда. Мен лингвист тюгюл бусам да, мени гысабымда, алда къумукъ тилде къоллангъан эки сёз тапгъанман. Бири – «ортагъым» деген сёз. Гъали бизде огъар «ювугъум» дей. Къазакъларда буса «сырдашым» дей. Тамаша арив, бизин тилге къыйышагъан сёзлер тюгюлмю? Тек, мени гысабымда, бирдагъы айтаман, мени гысабымда, «сырдашым» – сыр чечерим, бизин «къурдашыма» ошаш болуп токъттай. Эргишиге буса ортагъым (ортакъ этив, къайгъыны да, сююнчю де) кёп къыйыша. Ювукълар кёп болур, ортагъы – бир, сырларын, къыйынын ортакъ этегени. Бу сёзню мен къыргъыз тилден алгъанман. Экинчи сёз – «айтышлар». Къазакъ тилде «айтыслар» – экев эришип айтагъан, бара-гъан күйде ойлашып тизеген (импровизация) сарынлар. Бу сёз алда къумукъ тилде болгъангъа, къоллангъангъа ким шеклик этер?

Гъар къумукъ оъз тилине тас этилген эки сёзюн табып къайтарса, азып барагъан тилибиз нечик айынар эди?

Ана тилибизни янгыдан жанландырмакъ учун не чаралар таклиф этемен?

1. Барыбыз да бажарагъан гъаракатлар:

а) Уйде де, къырда да яшларыбызгъя, эринмей, болгъан чакъы кёп къумукъ тилде сёйлемек.

б) Яшларыбыз къумукъча сёйлейгенде, агъамият берип тынглап, эринмей, сонггъя къоймай, шо еринде оланы хаталарын тюзлемек.

в) Аналар яшларын юхлатагъанда «Ла иллагъя ил Аллагъ» булан токътап къалмай, къумукъ тилде гъайлек йырлар йырламакъ. Къумукъ ёммакълар айтмакъ.

г) Институтлагъа тюшеген яшларыбызын некъадар лингвистика, история, культура факультетлеге тюшме амыракъ этмек, онгармакъ.

2. Билим-тарбия береген идараларда этме тийишли затлар:

а) Къумукъ юртланы яшлар бавларында орус тилден кем болмай, артыкъ болагъан күйде къумукъ шиърулар, ёмакълар охуйгъан, къумукъ йырлар йырлайгъан күйде этмек.

б) Къумукъ мактапларда «Ана тилден» къайры да йырлав дарсларда яшланы къумукъ йырлагъа уйретmek.

в) «Ана тил» дарсны ичинде бар буса – яхшы, ёкъ буса – шиърулар язма уйретеген дарслар берилмек.

г) Гъакимиятдан къумукъ мактапларда тарих дарсны къумукъ тилде юртмекни талап этмек.

д) Къумукъ миллетни тарихинден къис-гъартылгъан кюонде сама дарслар береген күйде этмек.

е) Шагъардагъы мактапларда къумукъ класлар не себепден ёкъну билмек.

Эгер бир мактапда яшлар етишмей деп

айта буса, бары да мактаплардагъы къумукъ яшланы шагъарны бир мактабында охутмакъны талап этмек. О да бажарылмай буса, ювукъдагъы бир къумукъ юртну мактабына ёлу тегин болагъан күйде элтип охутмакъ.

3. Жамият яшавда этме тийишли затлар:

а) Яшларыбыз охума эринегенни гёзлөгъя тутуп, гъакимияттыбыздан янгыз къумукъ тилде берилишлери булангъы ТВ- ва радиоканаллар ачмакъны талап этмек. Шоларда ишлеме къумукъча дурус сёйлейген, къумукъ школада охугъан оър билими булангъы уланланы, къызланы белгилемек.

б) Тойланы юрютегенлени, музика алатланы согъагъагъанланы, йырлайгъанланы ва шолагъа сарынлар язагъанланы курсларын ачмакъ. Бугюнлер чалышагъанларындан башлап, гележекде шо касбуланы сайла-жакълар да шо курслагъа кёп сююп, гёнгюллю күйде барагъан даражада иш гёрмек.

в) Яманокъ тезликде къумукъ бийивлени, согъулагъан күйлени, накъыралар къагъылагъан къайдаланы тирилтмек.

г) Бизин гъукумат яшавбузну онгарагъанны орнунда арты-артындан бизге кризислер савгъят эте. Шо себепден бизин ватандашларыбыз ишлеп къазанагъан алапалары бары тарыкъ-геректе де етишип, дагъы да концертлеге, театрға ва шолай башгъа затлагъа белетте де болур заманлар алда коммунизм ийимик йыракъда. Булай болгъандан сонг, бизин ихтиярыбыз бар гъалиги гъукуматдан совет дёвюрде ийимик спектакллени, концертлени ва башгъаларын тегин гёрсетмекни талап этме. Совет гъукумат бизге имканлыкъ бере эди оъзюбюзню инчесаниятыбыз булан къатнамагъя. Шоллукъда о гъукумат бизин ана тилибизни де, адабиятыбызын да сакълама гъакъ юрекден гъаракат эте эди. Гъалиги гъукуматыбыз шо имканлыкъны бизден тартып алгъан. Къайтарсын, къурдашлар! Биз огъар (гъукуматгъя) ВАТАНЫБЫЗНЫ да, ОБЗЮБЮЗНЮ де бергенбиз! Ол



буса, ана тиллени сакъламакъ учун къозлап болмайгъан тавукъ йимик, къакъылласа тюгюл, этегени ёкъ. Эгер алда йимик тегин яда, бир де болмагъанда, учуз белет булан яшё-рюмлер сама къарап болса, сакъланма имканлыкъ бар ана тилибиз де, адабиятыбыз да, алгъа юрюмеклик бар инчесаниятыбыз да.

д) Район гъакимиятлардагы «Отдел культуры» деген бёлюклерин «Отдел культуры, родного языка и литературы» деген бёлюклеге айландырмакъ ва шоланы ичинде бир буса да, teng ихтиярлы къумукъ адам болмакъны талап этмек (къумукъ районларда).

е) Эсгерилген ва дагъы да башгъа ватандашлар айтып къошуларажакъ масъалаланы арагъа салма ва шоланы кютме тамазаларыбызны бютюнкъумукъ Маслагъат Мажлисин къурмакъ ва шону кагъыз къуллукъларын законлагъа гёре мекенлешдирмек. Эгер бизин гъкумат ону сан этмесе, айтгъанын пешемесе, салгъан масъалаланы чечме имканлыкълар бермесе, Маслагъат Мажлис башгъа тюркагъию почалыкълардан тилибизни сакъламакъ учун этеген гъаракатыбызгъа кёмек тилеме ихтиярлы болма герек.

Къутлайбыз!

«2017 -нчи йылны лап яхши муаллими» деген республика конкурсда устьюнлюк алмакъ учун ортакъчылыкъ этген 49 адамдан ярым Финалгъа 10 адам чыгъып, олардан да бешевю финалда ортакъчылыкъ этди. Шоланы арасында бу йылны февраль айында Магъачкъала шагъарны школаларыны ана тиллерден дарс береген муаллимлери ни арасында оytгерилген конкурсада биринчиликни алып республика конкурсында ортакъчылыкъ этмеге ихтияр къазангъан Ленингент посёлокну 35 номерли гимназиясыны къумукъ тилден дарс береген муаллими **Жанхуватова Зарема Абакаровна** да бар эди. Натижада ол республика конкурсада да биринчи ерни алып, бизин сююндюрдю. Жюрини членлери Зарема Абакаровнагъа бир гёнгюлден рази болуп, устьюнлюкню берди.

Бу – къумукъ тилни муалимлери учун да, къумукъ охувчулар учун да, къумукъ тилни сюегенлер учун да макътавлу иш деп айтмагъа ярай, неге тюгюл гъали болгъанча республика оылчевдеги бурай конкурсда къумукъ тилни муалимлери биринчиликни алмагъан.

Ол Москва шагъарда бу йыл оytгерилежек Бютюнрессия конкурсада да ортакъчылыкъ этежек.

*Агъарагъим Солттанмуратов,
Дагъыстан пачалыкъ университетни дагъыстан
адабиятларыны кафедрасыны заведующий,
филология илмуланы кандидаты, доцент*

Тил илмубузну байракъчысы

(филология илмуланы доктору, профессор Ж.М. Хангишиевни 80 йыллыгъына)

Адамны тюрлю-тюрлю янлардан танымабилме бола: къардаш, къурдаш, хоншу, иш ёлдаш ва шолай оyzге янларындан. Бир-бир адамланы биз янгыз бир янындан танып къоябыз, башгъаланы буса кёп янларын билебиз. Экинчи тайпа адамланы (оyzюн яхшы таныйғын-билегенлени) гъакъында сёйлеме бир вакътини ичинде тынч да дюр, къыйын да. Тынч яны – шолай адамны гъакъында айтма затлар нечакъы да табула, ону гъакъында сёйлеме тюшгенде, не айтайым экен деп ойлаша къалмайсан. Къыйын яны буса – шо кёп затлардан бирлерин, гъатта аслуларын унутуп, къутгъарып къоярмы экенмен деген къоркъунчлукъ да бола.

Белгили алимибиз, педагогубуз, филология илмуланы доктору, профессор Жангиши Магъамматович Хангишиев мени учун шолай адамлардан санаала. Ону гъакъында мен азындан уъч янындан алыш сёйлеп болар эдим: алим гъисапда, педагог гъисапда, оyzюмню ювукъ адамым гъисапда.

Тил илму тармагъында чалышгъан алим гъисапда Жангиши Магъамматовични гъакъында ол филология илмуланы доктору, профессор деген оyr илму атлагъя етишиди деп айтып къоймакъ бир зат да айтмай къоймакъдыр. Неге тюгюл де, айрокъда арт вакътилерде бир тюрлю шекли ёллар булан шолай илму атлагъя ес болгъанланы санаву аз тюгюл, амма оланы бирлери илмугъя не къошум этгени де белгисиз (къошуму болмай къалса, эби де табулур эди, оланы шайлы за-

ралы тийип турмай буса!). Шо тайпа «алимлени» тил илму булан аралыгъы ёкълар чы нечик де, туврадан-тувра шо тармакъда чалышып турагъанлар да яхшы танып да битмей. Шо саялы да бугюнлерде Жангиши Магъамматовични алимлик даражасыны агъамиятлыгъы дагъыдан-дагъы артыкъ болуп чыгъя. Ол буса оyzюн уллу алим гъисапда янгыз къумукъ халкъын тюгюл, савлай тюрк дюнъясына танытма бажарды деп айтсакъ, бирдокъда къопдурув болмас. Алимни аты Къарабай-Балкъарда, Азербайжанда, Татарстанда, Башгъыртыстанда, Орта Азияда, Тюрикяда, Москвада ва шолай оyzге тюрк тиллер булан байлавлу илму марказларында белгили эди, шо ерлерде ону кёп абуру бар эди. Алимлер, муаллимлер, къумукъ тил булан машгъул болгъан гъар ким учун да Жангиши Магъамматовични абуру шолай уллу эди чи, анадаш тилибиз булан байлавлу бир тюрлю четим, эришивлю масъалалар тувулунуп къалса: «Жангиши Магъамматовичге сорап къарайыкъ», «Жангиши Магъамматовични китабында, сёзлүгүндө язылып бар», – деген ва шолагъя ошагъан оyzге калималаны кёп эшите эдик.

Ж.М. Хангишиевде тилге, ону сёз байлыгъына, къужурлуулукъуна тергевлюк, сююв къайдан таба гелгенликни англама къыйын тюгюл. Ол белгили язывчубуз, ярыкъландырывчубуз, педагогубуз Магъаммат Хангишиевни агълюсюнде тувгъян. Озокъда, къумукъ тилни, авуз яратывчу-

лугъубузну, адабиятыбызын теренден билеген, ахтарағынан Магъаммат Гъажиевични таъсири уланына да тие. Ата юрту Тёбен Къазанышдагъы орта школаны битдирип, 1959-нчы йылда Ж.М. Хангишиев Дағыстан пачалыкъ университетни филология факультетини орус-дағыстан бёлюгюне охума тюше. Университетни уьстюнлю күйде таммалагъан сонг, Азербайжан пачалыкъ университетни аспирантурасына охума тюше. Бакюде охуй туруп, азербайжан ва оъзге тюрк тиллени яхши билме баштай. Аспирантурада охуп битген сонг, Ж.М. Хангишиев Дағыстангъа къайтып, оъзю охугъан университетде къумукъ тилден дарс берме баштай. 1965-нчи йылда ол «Къумукъ тилде сыпат ишлик» деген темагъа гёре кандидатлыкъ диссертациясын, 1998-нчи йылда буса, басмадан чыкъгъан илму ишлерини топлап, докторлукъ диссертациясын уьстюнлю күйде якътай.

Ж.М. Хангишиев – къумукъ ва оъзге тюрк тиллени тюрлю-тюрлю масъалаларына багъышлангъан кёп санавдагъы илму ишлени (макъалаланы, монографиялаланы) автору. Шоланы арасындан ону «Къумукъ тил» (Магъачқала, 1996) деген китабы айрокъда къыйматлы болуп чыгъя. Бу илму ишинде алим къумукъ тилни инг де уллу, четим, агъамиятлы бёлюгюн – морфологиясын тил илмуну гёзюндөн ахтарып чыкъгъан. Сёз ерине гелгенде айтып къойсакъ, алимни бу илму иши къумукъ тил булан машгъул болгъянлар учун бек агъамиятлы, даим пайдаландырылып турагъан китап болуп токътады ва шону гъали тапма да къыйын болуп битген.

Жангиши Магъамматович янгыз тил илмусу булан машгъул болуп къалмай эди. Ол къумукъ халкъ авуз яратывчулугъубузну да, адабиятыбызын да теренден биле эди. Мисал учун, Йырчы Къазакъыны 150 йыллыгъына байлавлу болуп оътген илму конференция-

ны материалларындан топлангъан китапда адабиятыбызын классигини асарларыны ти-лине байлавлу ерлешдирилген макъаласы алимни адабият илмусунда да бек терен ан-главу барны ачыкъдан исбаттай.

Илму чалышыву булан янаша Ж.М. Хангишиев оъмюрюнү аслу пайын педагогикагъа, оър охув ожакъда дарс беривге, педагогика колледжлер, орта школалар учун охутув китаплар гъазирлевге багъышлагъан эди. Магъа оъзюме де Жангиши Магъамматовични алдында беш йылны узагъында студент гъисапда охума наисип болду. Ол студентлени оъзю сююп де, оланы оъзюн сюйдюрюп де, оланы юреклерине рагъат ёл табып бажарыгъан дарс беривчю эди. Оъзю оътесиз рагымулу, йымышакъ хасиятлы, оъзгелени аяпкъызгъанып билеген адам болгъангъа гёре, Жангиши Магъамматович студентлеге янгыз оъзюнү дарсларындан кёмек этип къоймай эди, башгъа дарс беривчөлөр булан сейлеп де, болгъан күйде оланы масъалаларын чечме къаст эте эди. Шоғъар мисалгъа оъзюмню студент девюрюмде болгъан бир ишни эсгерип къояйым. Университетде охуйгъанда, политэкономиядан экзамен береген гюн факультетни абзарында магъа Жангиши Магъамматович ёлугъуп къалды. Шо дарсны юрютеген муаллимибиз студентлени оъзюне ончакъы тынглатып, дарсында тийишли низамны болдуруп бажармай эди, шо саялыш да ону дарсларында къавгъа бола эди, лекцияларын язма къыйын бола эди. Гъасили, студентлени (шоланы арасында мени де) бу дарсдан болагъан экзаменге гъазирлиги тийишли даражада тюгюл эди. Жангиши Магъамматович мени булан саламлашып-сорашып: «Не этдинг, экзаменге гелгеми эдинг?» – деп сорады. Мен: «Гелген эдим», – деп жавап бердим. Жангиши Магъамматович бирдагъы да: «Не дарсдан экзаменинг бар? Кимгедир экзаменинг? Гъазирленгенмисен?» – деп сорады. «Политэкономиядан.

Болгъан кюомде гъазирленме чи гъазирленген эдим», – деп жавап къайтарды мен. Жангиши Магъамматович дагъы бир зат да айтмай, факультетте гирип гетди. Тартына туруп, экзаменге гирме деп оъзюмню гезигимни де къаравуллап токътап тураман, экзамен берип чыгъып гелеген курсубуздагъы бир аварлы улан: «Агъарагым, бир де къоркъмай экзаменге гирсенд де ярай. Мен жавап берип турагъанда, сизге къумукъ тилден дарс береген муаллимигиз гирип, дарс беривчюге сени гъакъынгда сёйледи, ол да сагъа кёмек этежекге разилик берди», – деди. Биринчилей, мен Жангиши Магъамматовиче оъзюм саялы дарс беривчюге сёйлесин деп тилемеген эдим, сынавлу педагог гъисапда ол мени гъалымны оъзю яхшы англагъан ва магъа юреги авруйгъан адам гъисапда кёмек этме белсенген болма герек. Экинчилей, оъзю барып магъа байлавлу дарс беривчю булан сёйлежегин де айтип да турмады. Уъчюнчюлей де, мени масъаламны чечгенде де, биревлер йимик этген ишин къайдан бетлесин, нечик тёшюне къагъып айлансын, гъатта шо гъакъда мени булан гъеч бир лакъыры сама да болмады. Жангиши Магъамматовични шо саламат хасияты ону битими эди деп ташдырып айтма болабыз, шо ону гъарбири ишинде мекенли сезиле эди.

Жангиши Магъамматовични педагогика чалышынуни бир тармагъы педколледжлер, орта школалар учун охутув программалар, китаплар гъазирлев булан байлавлу эди. Шолланы арасындан 1-нчи класланы охувчуларына гъазирлеген букварны, 8–9-нчу класлар учун гъазирлеген къумукъ тилни морфологиясын, И.А. Керимов булан бирче педколледжлер учун гъазирлеген ана тилибизни бары да тармакъларын къуршайгъан охутув китабын айрыча эсгерме тюше.

Жангиши Магъамматович – мени къисматыма, оъзюмню касбу ёлумну танглавума, илму ёлгъа тюшгениме инг де кёп таъсир эт-

генлерден бириси. Айтагъаныкъ, ол магъа бир башлап курслукъ ишни, дипломлукъ ишни, сонг аспирантурагъа охума тюшгенде буса, кандидатлыкъ диссертацияны темала-рын белгилеп, магъа илму ёлбашчы болуп чалышды, ону магъа шо ёлда шайлыш кёмеги тииди.

Жангиши Магъамматович булан студент йылларымда башлангъан аралыкъларым мен университетте ишлеме тюшгенде, ону иш ёлдашы гъисапда узатылды. Шо замангъа Жангиши Магъамматович мени оъзюне шонча да исиндирип, ювукъ этип бажаргъан эди чи, бир тюрлю соравларым тувулунса, неде насиғъат алма тюшсе, неде лакъыр этме, сыр чечме сюйсем, мен ону янына бир де тарынмагъан кюйде барагъан болдум.

Ж.М. Хангишиев он беш йыл алда хапарсыздан арабыздан гетди. Ону йимик адамлар бу дюньядан тез гетсе, айрокъда бек къыйналасан, къызгъанасан, шолай адамланы етишмейгенин чакъда-чакъда гъис этесен. Тек бу ерде ойлашдырагъан, рагъатлыкъ бермейген бирдагъы бир масъала бар. Айтагъаныкъ, Ж.М. Хангишиев анадаш халкъыбызында тарихинде, тил илму, педагогика тармакъларында оъзюнден сонг мекенли гъыз къюоп гетди. Амма халкъыны янындан огъар тишили къайтарыш ёкъ, тишили тергев сезилмей: гъалиге огъар байлавлу не илму конференция, не эсделик чара оytтерилмеген, ону китаплары, сёзлюклери къайтарып чыгъарылмагъан кюйде къалып тура, аты не школагъа, не орамгъа къююлмагъан. Озокъда, бу масъалалар чечилмесдей четим масъалалар тюгюл, тек оланы чечмесе чи бирдокъда ярамай.

Уллу алимибиз, пагъмулу педагогубуз Ж.М. Хангишиевни гъакъындагъы бу масъаламны белгили шаирибиз Жаминат Керимованы огъар багъышлангъан бир шиърусу булан тамамлама сюемен. Сёз ерине гелгенде эсгерип къояйым: Ж. Керимова оъз де-



вюрюнде Жангиши Магъамматович ишлеген Дагъыстан пачалыкъ университетни филология факультетини орус-дагъыстан бёлюгъюн заочно охуп битдирген. Савлугъу себепли болуп, ол оъзю дарслагъа юрюп болмайгъянына гёре, университетни дарс беривчюleri (шоланы арасында Жангиши Магъамматович де) огъар уюне берип дарс берген. Алим, бажарывлу педагог, дарс беривчю,

адам гъисапда Ж.М. Хангишиев Ж. Керимована разилигин къазанма бажаргъян ва шаир огъар багъышлап бу тюпдеги къужурлу, тамаша, чебер сегизликни яратгъян. Шо сегизлик акrostих къайдасы булан язылгъянына айрыча тергев бакъдырма сюемен: гъар сатырны башынdagъы биринчи гъарпны оърден тюпге багъып охуса, ЖАНГИШИМ деген сёз амалгъа геле.

Жагыилликден оytген сайын оымюрлер,
Ачыкъ күйде ювукълугъунг сеземен.
Нюрлер йимик гъар гъарпындан атынгны,
Гёнгюллюкдюр, сегиз сатыр тиземен.
Илиякълы, сабур юзюнг гёргенде,
Шатлыгъымдан дертим дёне-тозула.
Инан, воллагъ, сен гетгенде уюмден,
Мени гёнгюм гюзгю чакъдай бузула.



Ана тилге абур этмек – ватандашлыкъ борчубуз!

Интернетде соцсетлерде къумукъ тилни гъакъында пайдалы ва маъналы лакъырлар кёп бола. Оланы бирлерин биз журналыбызда да къоллайбыз. Тюпде берилген текстни шагъарда оьсген, интеллигент ағылюде тарбиялангъан къатын язгъян. Гъали ол оъзюн гиччиде ата-анасы къумукъ тилге уйретмегенин уллу янгылыш ишге санай ва бугюнгю яшлар да уллу болгъанда оъзю йимик гъё-кюнмесин учун, бизин замандашлагъя та-клифлер бере. Редакцияны таржумасы.

Къачан буса да къумукъ уланланы ва къызыланы къылыкъ-низамын токъташдырма тюшсе, мен де бир нече таклиф берме сюер эдим.

Бириңчиси – сагъа къумукъча сёйлеген адамгъа орусча жавап къайтармакъны ана тилинге абур этмейгенликге санамакъ.

Экинчиси – уюнгде де, уюнгден тышда да къумукъ тилни билегенлер булан янгыз къумукъ тилде сёйлемек.

Уъчинчюсю – уллу жыйынларда, мажлислерде бир-эки башгъа миллетни вакилине «абур» этебиз деп, орусча сёйлемекни илыкъ, эрши ишге санамакъ.

Дёртюнчюсю – ана тилин де билмей турп, тыш пачалыкъланы тиллерин уйрен

мекни миллетине, тухумуна, ватанына гьюрмет этмейгенликге teng этмек.

Олардан къайры да, гъар къумукъ ағылю ана тилинде чыгъагъан газетлени ва журналланы алмакъны борч этип салмакъны да тийишли гёремен. Шолай да гъар ағылюде къумукъ тъкитапланы китапханасы болмакъ шо сыйлы талапланы бириси.

Къумукъ тилде сёйлейгенде, болгъан чакъы ят сёзлени къоллавну аз этмеге къаст этмеге тюше. Шону булан бирге ана тилин яхшы билмейген, тек уйрениме сюегенлени мысгъылламакъ, кюлемек де эрши гёрюнегенден къайры, о адамланы тилге уйренивон токътатып къойма да бола. Бир-бир диалектлерде сёйлейгенлени де мысгъыллама сюегенлер де бола. Шо да тюз янашыв тюгюл.

Мен оъзюм Магъачкъалада оъсгенмен. Атам мени орус тилни оруслардан яхшы билмे герексен деп тарбиялагъан. Орус тилни яхшы билегенимни не этейим, ана тилимде эркин охуп-язып болмайгъаным мени бек къыйнай. Бугюнгю яшланы ата-аналарына насигъатым – авлетлеригизге ана тилин яхшы билмे уйретсегиз, олар уллу болгъанда сизге разилигин билдиражек. Шо бизин ватандашлыкъ борчубуз да дюр.



Бизге етишгенде сёнме къоймайыкъ!

ЮНЕСКО-ну маълуматларына гёре, гъараида дюньяда бир тил тас бола. Дюньяда бары да болгъан чакъы тиллени санаву орта гысапда 30 мингге етише. Шо санавдан бус-сагъат бар 6 минг тилни тайдырсакъ, орта гысапда, 24 минг ана тилин билеген ахырынчы адам ойлген. Шоланы арасындан лап да белгилиси Тевфик Эсенч (1904-1992). Ону къабурунда булай язылгъан: «Мунда Тевфик Эсенч ята, убыхланы тилин билеген ахырынчы адам». Убыхланы тили абхаз-адыкъ тил ағылюсюне гире ва фонетикасында 80 турукъ ва 2 созукъ аваз булан белгили болгъан.

Гъали гөз алдыбызгъа шулай сынташны гелтирийик: «Мунда къумукъ тилни билеген ахырынчы адам гёмюлген». Гертилей де, шолай къоркъунчлу гъалгъа багъып уллу чалтлыкъ булан барабыз.

Артдагъы эки гысапгъа алывну (переписни) аралыгъындагъы 8 йылны ичинде къумукъча сёйлейгенлени санаву 20 процентден де артыкъгъа кемиген. Шону себеби де – къумукъланы хыйлылары оъз миллети яшайгъан ерлерден гетип, Москва, Питер йимик уллу шагъарлагъа яда темиркъазыкъ регионлагъа гёчюп яшайлар. Тил унтулгъан сонг, милли маданият да, мердешлер де унтула. Неге тюгюл, миллетни ичинде ана тилин къоллайгъанлар кемиген сайын, тилни къоллайгъанланы санаву наслудан-наслугъа артмай буса, маданият-мердешлени де оъсюю токътала. Шону булан бирге миллет оъзю де миллет гысапда тас болажакъ.

Бизин тилибиз бизге ата-бабаларыбыздан варисликге къалгъан. Бизин борчубуз – шону бар кюонден де артыкъ этип, гележек наслулагъа аманат этмек.

Шону учун не этме герекбиз? Биз яшайгъан пачалыкъны тили бизин тилибизни ерин елейгенликге къаршы турма герекбиз. Бары да заттъа глобализация гюнагълы дейгенлер де бар. Шо глобализацияны да бизин пайдалыгъа къоллама герекбиз. Дагъы пайда этип болмайгъанлар уйлеринде сама авлетлери не таза къумукъ тилинде сёйлесин.

Къумукъ тилде кинолар чыгъарып, берилишлер этип, телеканаллар ачып ва шолай гёрмекли ишлени этип болмай бусакъ да, консерватив кююбюзде къалма сама герек, демек «rossиялылар», «дагъыстанлылар» деген политика миллете айланмакъдан сакъ турма герек. Неге тюгюл, шолай политика муратлар булан къурулгъан миллет узакъ къалмай ортакъ халкъара тилни къабул этежек ва шону натижасында ана тилибиз унтулажакъ. Биз «дагъыстанлыларбыз», «rossиялыларбыз» деп турсакъ, къумукълугъубуз тас болагъандан къайры, ана тилибиз де тас болажакъ. Шолай болуп да тура.

Гъакимлидеги чиновниклеризни буса эсине сала турма герек: къумукъ тил, Дагъыстан Республиканы Конституциясына гёре, пачалыкъ тиллени бириси. Шо себепден республикада ону орус тил булан тенг ихтиярлары бар. Дагъыстанны Халкъ Жыйыныны депутатлары, ГъукуматЮ, бугюн ана тиллени якълап, оъсюююн гъайын этмесе, гелеген наслулагъа оланы янгыртып, аякъгъа тургъузмагъа тюшежек. Эгер шо заман геч болмаса. Гъалиги барышыбыз мени шолай пашман ойлагъа элте. Шу ишде халкъны оъзюнден де кёп зат гъасил бола.

АЯВЛУ КЪУМУКЪЛАР, АБУР ЭТИГИЗ АНА ТИЛИГИЗГЕ, КЪОЙМАГЪЫЗ ЯШЛАРЫГЪЫЗГЪА МУЛЬТИКЛЕРДЕН УЙРЕНИП, ОРУСЧА СЁЙЛЕМЕГЕ. БУ ПАЧАЛЫКЪДА ОРУСЧА СЁЙЛЕП БОЛМАЙГЪАН АДАМ КЪАЛМАЖАКЪ. ОЬЗЮГЮЗДЕ, КЪАЙДА БОЛСАГЪЫЗ Да, КЪУМУКЪ АДАМ БУЛАН КЪУМУКЪЧА СЁЙЛЕГИЗ. БУССАГЪАТ ЯШЛАРЫГЪЫЗ ГЁНГҮНДЕН КЁП ШИРУЛАР БИЛЕДИР, АНА ТИЛИНДЕ НЕЧЕ ШИРУ БИЛЕ ЭКЕН ОЛАР – СОРАП КЪАРАГЪЫЗ? БИЗИН ЯШЛАРЫБЫЗ ТИЛИН ОСАЛ БИЛСЕ, ОЛАНЫ ЯШЛАРЫ ШОЛАР ЧАКЪЫ Да БИЛМЕС. УЙРЕТИГИЗ ВА ОЬЗЮГЮЗДЕ УЙРЕНИГИЗ. АТАБАБАЛАРДАН БИЗГЕ ЕТИШГЕН КЪУМУКЪ ТИЛНИ БИЗГЕ ЕТИШГЕНДЕ ОЬЛМЕ, СЁНМЕ КЪОЙМАЙЫКЪ.

АНА ТИЛ ВА ШКОЛА

*Роза ТАТАРХАНОВА,
Чонтавул*

ШКОЛАДА АНА ТИЛ ДАРСЛАР БУЛАН БАЙЛАВЛУ ЁЛУГЪАГЪАН БИР-БИР КЕМЧИЛИКЛЕР

Мен школада ишлеймен, шо саялыш мен айтагъан пикруларым школадагъы четимликлени гъакъында болажакъ.

Бириңчилей, мен ойлашагъан күйде, биzin бу четимликлерибиз гетген асруну 20–30-нчу йылларында башлангъан; биз, гелген гелгинчилени къулач яйып, харс уруп къаршылайгъанда.

Экинчилей, бизге, муалимлеке, кёп четимлик этеген зат – школада ана тилден дарслар аз экени. Жумада яшлар бир дарсгъа геле, къайтып экинчи жумада олар алдагъы дарсда сёйленген затны унутуп къала. Бизин юртда учь миллет яшай. Биз сюйсек де, сюймесек де, орусча сёйлеме тарыкъбыз, кёбюсю сёйлеме де сёйлей. Къумукъ грамматика дарсда янгы теманы мен кёбюсю орус тилге гёчюрөп англатаман. Китапларда теория яшлагъа англама къыйын күйде бериле, айрекъда 4-нчю класланы диктантларында китапларда эсти, бырынгъы, гъалиги заманда къолланмайгъан сёзлер кёп ёлугъа. Школалар учун чыкъгъан сёзлюклерде шолай сёзлени маъналары ёкъ. Шо да бизге бир уллу четимлик.

Сонг да, йыллардан-йыллагъа янгы-янгы терминлер чыгъа. Яшлагъа шоланы эсинде сакълама къыйын.

Бирдагъы бизге, муалимлеке, къыйынлыкъ этеген зат – бизге көмек гысапда чыгъагъан китаплар (разработкалар) ёкъ. Бары да дарслардан шолар бар, бизге шо ёкъ. Мен бир дарсгъа план язмакъ учун бир нече китап саламан алдыма. Гъар китапдан бир мисал аламан. Шо мисаллар бары да бир китапда болса, бизге тынч болур эди деп эсиме геле.

Сонг мен дагъы да айтма сюеген зат – гиччи яшлар учун чыгъагъан китаплар ёкъ. Гиччи яшлагъа, башлапгъы класланы охувчуларына, оъзлени чагъына гёре, гиччи хабарлар, ёммакълар, шиърулар, чечеген ёммакълары булангъы китаплар чыкъса, яхши болур эди деп эсиме геле. Бизин яшлар охума сюе, тек шо китаплар етишмей.

Артда мен ата-аналаны гъакъында да айтма сюемен. Бизин къумукъ ата-аналар яшлары орус тилни яхши биле, къумукъ тилни билмей деп оъктем бола. Шолай ата-аналар, юрги булан ана тилни балын, азизин сезмей туруп, шу бизин алдыбыздагъы четимликлер аз болмажакъ. Шолай ата-аналаны мен эсин жыйима, оъзлер кимлер экенин билме, миллети булан оъктем болма чакъыраман.



Алтын хазнабызыны аяйыкъ

Тил болмаса, миллет болмайғыны ачыкъ. Дюньядагъы алты минг тилни жумада бири тас бола дегенде, ана тилибиз къумукъ тилге де шо балагъ къобармы экен деген рагъатсыз ойлар бизин талчыкъдырмай болмай.

Дюньяда бир инсан да ёкъдур оyzу къайсы буса да бир милдетни, халкъны, тухумну вакили экенине гъёкүнеген. Инсан шолай къуруулған, яралған. Тилге сюов де – халкъгъа, Ватангъа, анагъа, ата юртгъа, бирче ойнағъан къурдашларынга, оьсген орамынга аминлик деген зат. Шо аминликни сакъламакъ учун эринме ярамай. Гъар адам оyz еринде къолундан гелеген гъаракатын этип турма герек. Озокъда, гележекде дюньялықъда, гиччи халкъланы тиллери унутулуп, санавгъа уллу халкъланы тиллерinden беш-алты тил къалажакъ деген ойлар да ёкъ тюгюл. Яшав ёлу талапланы шолай салагъан сонг, бир умуми тюрк тил сама къалыр деген умутлар да бар. Буса да лап кёп «къапас урулған» тиллени бири Дағъыстанда къумукъ тил деп эсиме геле.

Бириңчиси, къумукъ халкъны кёп яны шагъарларда ва шагъарлагъа ювукъда ерлешген. Шо себепден башгъа миллетлер булангъы къатнашыв кёп. Сюйсе де, халкъыбыз, сюймесе де, сёйлеведе орус тилге гёчебиз. Олай болғанда, ана тилде сёйлейген, охуйгъан ва язагъан район газетлерибиз ва мактапларыбыз къала.

Мактапларыбыздагъы гъал да къувандырар йимик тюгюл. Орус тилден къайры бары да дарслар башлапгъы класларда ана тилде юрюле эди. Гъали гъал бүс-бютюнлей терсине. Ондан къайры да, жумада болагъан беш къумукъ дарсдан әкиси къалды. Гиччи класлагъа учь сагыат

ингилис тил къошуулду. Озокъда, о тиллеге де ёкъ къаршылыгъыбыз. Гъукуматны законларыдыр. Буса да ана тилге зарал этмей къойгъан буса яхши тюгюлмю эди?

Жумадагъы 168 сагъатны алтмыш-етмиши юхугъа гетип, къалған юз сагъатны учюсүндө, кёп айтгъанда, дёртюсүндө тюгюл яшларыбыз ана тилде сёйлемей буса, тил уннутулмай боламы? О дарсланы боюнда да яшланы барысы да актив күйде ортакъылыкъ этип, ана тилде сёйлеп турмай чы. Нечакъы яшни хозгъама къарасакъ да, оланы да бар чы сёйлемей турагъанлары. Ата-аналар да орусча сёйлей буса (о гъалны биз гёрюп турабыз), телевизорда да, компьютерде де орус тилни эшитип тура буса, башгъа тиллерден яшланы англаву болармы?

Шу мастьалада ата-ана да айыпты. Яшлагъа уйде ана тилде сёйлеме герек. Шу аврув алда шагъарларда бола эди буса, гъали юртлагъа юкъгъан. Ана тилде бар сёзлени де орус тилде айтталар. Савлай жумлалар орусча айтыла. Гюнню кёп заманын яш уйде ойттере буса, ата-ананы сёйлевүндөн уылгю алынмаймы? Бу ерде мактапгъа бары да айыпны салсакъ, тюз болмас.

Ярым миллион къумукъну ағылюлек пайласакъ, орта гъисапда юз минг ожакъ бардыр. «Ёлдаш» газетте язылгъанланы санаву дёрт мингден ойтмей. Китаплар да, журналлар да, газетлер де охумай бусакъ, жумада 45 минут тюгюл юрюлмейген къумукъ берилишге де къарамай бусакъ, озокъда, гъал бузукълашажакъ.

Къарап, дамагыбыз чыгъа мычыгъышлагъа, татарлагъа, башкъыртлагъа. Гюнню узагъына ана тилинде берилеген каналы бар. Оларда адам къарап йимик түрлю-түрлю

берилишлени гёрсетелер.

Озокъда, Дагъыстанда миллетлер кёп. Барына да айрыча канал берип юрютме харж да етишмейдир. Буса да бар чы мадарлы адамлар, далапчылар. Олагъа да ярай чы халкъы учун харж этмеге. Гюнде эки-үч сагъат телевизоргъа къарамайгъан гиши ёкъдур. Инсанны гъаваслыгъы, муштарлыгъы бугюн недедир – она шо ерге бакъдырылма тюше гаракат. Бир болмаса, бир сама ана тилде берилеген берилишге къаралмасмы дагъы, концерт болсун, шаирлер, башгъа белгили адамлар булан ёлугъувлар болсун.

Авлетлерибизге болсун, уй жанлагъа болсун, ана тилде атлар къойма герекбиз. Гъар-бир затда къумукълукъ сезилме герек. Тарзан, Тузик, Бобик демей, Акътёш, Къаравуз, Талгъыр, Акъбилек деп атлар къойса, арив тюгюлмю?

Озокъда, тилни уьстюнде ишлейген алимлерибиз, адабиятчыларыбыз кёп иш этелер. Янгы-янгы китаплар чыгъа, «Тангчолпан», «Дагъыстанлы къатын», «Къарчыгъа» журналлар, «Ёлдаш» ва район газетлер де оyzлени къошумун эте. Буса да, къарагъанда, шолар да азлыкъ эте. Ону себеби де – газет, журнал, китап охуйгъанлар сийрек ёлугъа.

Бу ерде кёп зат мактапдагъы муалимлени гъаракатындан гъасил бола. Кант этип турмайллы, жаны-къаны булан яшларда ана тилге сюювюн уятма герек. Шо сююв уянгъан дегенде, ону артдырмакъын гъаракатын этме, тюрлю амалларын излеме тюше.

Башлапгъы класлардан тутуп, къужурлу ёммакълар, хабарлар булан яшны оюн елемекни къастын этме герек. Бир асарда да яшгъа англашылмайгъан сёз къалма тюшмей. Алданокъ сёзлюк иш булан гъазирлик гёрюп, сонг асаргъа гёчме тюше.

Беш-он йыл алда – шиъру болсун, поэма болсун яда проза асар болсун – дёрт-беш

сёзню баянлыгъын берсе бола эди буса, гъали отуз-къыркъ сёзню маънасын англатма тюше. Сёзлюк иш булан дарсланы кёп яны гетеген болуп тура. Асарны анализине заман аз къала. Ана тил дарсланы гъарисинде сёзлюк иш болма герек. Бир дарс да ойтме тюшмей охувчу етти-сегиз янгы сёзню маънасын ва тюз язылышын билмейли. О сёзлени къоллап, олар булан сёз тагъымлар ва жумлалар тиздирип, беклещдирив иш де болма тюше.

Ана тил дарсланы тарих асарлар булан тыгъыс байлаву болма герек. Къумукъ халкъны миналы ерлерини – Алмалы, Шавхал-тирмен, Тёбе, Ишарты, Темиркьюва шолай да хыйлы юртланы атларын Алмало, Тюбе, Ишкарты, Тимиргое, Шамхалтермен, Кумторкала болма къойсакъ, гележекде шо ерлерде къумукълар болма да болгъанмы деген суал тувмасмы?

Бир-бир милletтер къыркъ-элли ийлланы узагъында тилин тазалай гелгенлер. Кремльде болгъан бир уллу генгешде де, гъукуматыбызын башын тутгъанлар да эшите туруп, бир къатынгиши орус тилге консенсус деген сёз негер тарыкъдыр согласие деген къулакъга да арив чалынагъан сёзюбюз бар тура деп, дагъы да беш-алты сёзню де мисалгъа гелтирди. Бизге буса ону Абусупиян Акаев айтгъанлы юз йыл бола.

Ахырда, ойрде эсгерилген ойларымны жамын чыгъара туруп, тилге къуллукъ этме гереклени борчларын эсгерме сюемен. Мактапларда муаллимлени гъаракаты артып, ана тилни байрамлары, жумалыкълары, белгили адамлар (شاирлер, язывчулар, алимлер, пасигъ тили булангъы уллулар) булан ёлугъувлар ойтгерме герек.

Яшланы тарихде болгъан, къумукъланы белгили къагъруманлары Солтанмутну, Йырчы Къазакъын, Уллубийни, Жалалны, Зайнабитни ва шолай да кёплени яшав мисалларында тарбиялама герек.



Ағарагыым СОЛТАНМУРАТОВ

Ана тилден ва адабиятдан тематикалы ва дарслыкъ планлар къайсы тилде язылма тюше – орусчамы яда ана тилдеми?

Журналыбызны биринчи номери чыкъгъан сонг, «Бизин тил» къурумну ортакъчылары, къумукъ районлагъа барып, ана тил ва адабият дарсланы муаллимлери булан ёлугъувлар ойтгерди. Шо ёлугъувларда муаллимлени янындан къурумубуз ва журналыбыз булан байлавлу көп масъалалар гётерилди, арагъа тюрлю пикрулар чыкъды, пайдалы таклифлер берилди. Озокъда, шоланы бириси де тергевсюз къалмас, барыбыз да бирлешип, шоланы чечип болагъан ёлларын ахтарарбыз. Журналны бу номеринде муаллимлерибиз инг де көп гётереген масъалалардан бирисине айрыча тергев бакъдырма сюебиз – школадагъы тематикалы ва дарслыкъ планлар орус тилде язылма тюшеми яда ана тилде язылма тюшеми.

Бу масъала муаллимлеке яллыкъ бермейгени эки-үч йыл боладыр. Гъали болгъунча ана тилни ва адабиятны муаллимлери оyzлени шо тематикалы ва дарслыкъ планларын ана тилинде язып гелген. Бир гесекден берли буса шоланы орусча язма герек деген талап арагъа чыкъгъан. Шо талап, сайки, ана тил ва адабият дарсланы тергейгенлер учун онгайлы болсун деп этилген. Амма бугюнге ерли шо талап къайдан чыкъгъанына жавап берип болагъан адам чы гёрюнмей. Шо масъаланы гъатта Дагъыстан Республиканы Билим берив ва илму ишлеге къарайгъан министерлигине барып, хас күйде ахтаргъянлар да бар, шо идарада да тематикалы ва дарслыкъ планланы орусча язма герек деген документ табулмагъян.

Бу масъалагъа байлавлу оyzюбюзню оюбузну да айтайыкъ. Биринчилей, тематикалы ва дарслыкъ планланы орусча язмакъ деген талап адилсиз, терс талап экенликге бир шеклик де ёкъ. Неге тюгюл де, шо талапгъа рази де болуп, шону къабул этсек, бираздан ана тил ва адабият дарсланы тергеме гелгенлер дарсланы орусча юрютюгүз деген талап салма башламасмы?! Ондан къайры да, бу ерде бары затдан алда дарсланы тергейгенлени онгайлыкълары гёз алгъа тутулма тюшеми, ёгъесе оyzю ана тил ва шо тилни дарсдагъы ортакъчылары (муаллим ва охувчулар) гёз алгъа тутулма тюшеми?! Экинчилей, буссагъат тематикалы ва дарслыкъ планланы орусча язмакъ деген талапны къабул этмейли, алдагъы күйде (болмагъа тарыкълы күйде!) ана тилде язып юрюйгенлер бар. Бизин ёлугъувларыбызны вакътисинде, мисал учун, Магъачкъаладагъы ва Баңаорт райондагъы муаллимлер шо язывланы ана тилде юрютегенин айтыш бердилер. Демек, бу факт тематикалы ва дарслыкъ планлар ана тилде язылмакъ дурус ёл экенликни бирдагъы керен де исбаттай.

Гъасили, тематикалы ва дарслыкъ планлагъа байлавлу бу талап болсун неде оyzге талап болсун, биз ойлашагъан күйде, муаллимлер чиновниклени оырден тюшюрүлөген талапларын иннемей къабул этип турмайлыш, оyzлени ихтиярларын адилли, законлу ёлларда якълап билме тюше.

Гъайбулла ГАЙБУЛАЕВ

Буйнакский район газетни
баш редактору, муаллим

Тилин унутгъан – талигъин ютгъан

Гъалиги девюрде ана тилге яшёрюмлени янашагъан кююне къарагъанда, яш наслу оyz тилин унутуп да бите бара бугъай деп ойлаша къалабыз. Тюзю, жагъиллени арасында да бар ана тилин билме сюегенлер, уйде де, къырда да ана тилинде сёйлемей, оруча сёйлейгенлеке айып этегенлер. Тек олайлар аз.

Ана тил масъаланы агъамиятлыгъын бары да халкъ англамайдыр деп эсиме геле. Бизкъумукъларбызыдабашгъамиллетденбиз деп къычыргъан булан, тёшуне къагъып айлангъан булан къумукъ боламы, оyz ана тилинде адамшавлу сёйлеп билмей буса? Тил масъаланы уллу алимибиз Абусупиян, биринчи ерге салып, ана тилинде китаплар чыгъарып гетген. Шону гъатта жан берип, жан алагъан масъалагъа тенглещирген.

Артдагъы вакътилерде оырдеги къурумларда да, тил алимлени арасында да ана тил масъаланы агъамиятлыгъы гъакъда кёп айтыла. Адабиятны, маданиятны, инчесаниятны, сонг да ана тиллерде чыгъагъан газет-журналлагъа тергевню ва кёмеклени гючлендирмек герек деп Дагъыстанны ёлбашчыларыны янындан да айтыла бола.

Бираз алларда Россияны илмулар академиясыны Дагъыстан илму центрыны президиумуну илму советини жыйынында Дагъыстанны Башчысы Р. Абдулатипов билдиргенийимик, Совет Союзну девюронде школаларда ана тил дарслагъа бакъгъан якъда 4-нчю класгъа ерли бир-эки дарс орус тилде, къалгъанлары буса ана тилде юрюле эди. Бешинчи класгъа чыкъгъанда кёбюсю дарслар орус тилде бола. Ана тилин де, башгъа тиллени де билмеге герек.

Дагъыстан – кёп миллэттер яшайгъан ер, Конституциябызыда да аслу пачалыкъ тил

деп орус тил эсгериле. Буссагъат республикада яшайгъанлар 32 тюрлю тилде сёйлей, 14 тюрлю тилде газетлер ва журналлар чыгъа.

Буссагъат алимлер ана тиллеге байлавлу законну уьстюнде ишлеп тура. Эгер шо закон къабул этилсе, ана тиллеге бакъгъан якъда тергев яхши янына багъып алышынып гетме, гъатта школаланы охуп битдиргенлер оыр охув ожакълагъа тюшегенде ана тилинде экзамен берме борчлу болажакъ.

Ана тилге бизин адамлар нечакъы да гъайсыз янаша, оызге масъалалар арагъа чыгъып, ана тилни сакълав, миллетни гележеги экинчи плангъа тюше. Бизин тилибиз ярлы тил деп айтмагъа сюегенлер де табула. Ана тилинде сёйлеп билмейгенлер айта шолай. Шолайллагъа къумукъ адабиятны китапларын охума, къумукъ спектаклелеге къарама, бырынгъы къумукъ йырлагъа тынглама герек. Ана тилде сёйлейгенде де, концертлерде ва вечерлерде къумукъ сёзлени ярты-ярым этип сёйлемеге арив тюгюл.

Гъар ким оyz ана тилибизни сакълавгъа нечик къошум этип болабыз? Инг башлап, гелигиз, бир милletli адамлар бар ерде ана тилибизде сёйлейик. Шо буса биз ана тилибизге, миллэтибизге сый этивню бир мисалы. Сонг, экинчилей айтгъанда, ана тилде чыгъагъан газетлени-журналланы язылып алып охума тарыкъ. Милли печать къуралы, театры, маданияты болмагъан халкъдан халкъ болмай. Учюнчюлей, гъали Интернетни имканлыкълары кёп. Шонда къумукъ группалар, къумукъ газетлени, къумукъ очарланы сайллары бар. Олар булан таныш болмагъа герек.

Ана тилин унутгъан адам – талигъин унутгъангъа тенг бола. Тарихге бакъгъан якъда да шолай.



Ана тилибиз сакълансын учун

Тёбенде берилген макъяла – Къарабудагъентдеги гимназияны 11-нчи класыны охувчу къызы
Нарият Алиеваны 2015-2016 охув йылда «Ана тиллеге экинчи тыныш» («Второе дыхание родным языкам»)
деген республика конкурсда биринчى ерни алгъан сочинениеси.
Бугюнлерде Нарият – Дагъыстан пачалыкъ университетни филология факультетини
орус-дагъыстан бёлюютюн 1-чи курсуну студенти.

Ана тил... Бу сёзлени айтгъандокъ гъар адамны юрегинде анасына, ата юрутuna, оъз элине бакъгъан сюювю, сагъынчы, оъктемлиги тувлууна. Ана тилибиз – лап да уллу жан азыгъыбыз, хазнабыз. «Халкъ болмаса, тил болмайгъаны булай да англашыла, тек тил болмаса, халкъ болмайгъаны унутмагъя ярамай», – деген къумукъ алим Жангиши Магъамматович Хангишиев.

Къумукъ тил тюрк тиллени инг де бек сакълангъан тиллерини бириси. Къумукълар дюньяда Якутиядан башлап, Китай да-зугъя ва Сауди Арабиягъя ерли бирев биревню англап, ёл алып бола. Не девюрню алсакъ да, къумукъ халкъчомарт, эркин юрекли, төрөн рүгү байлыгъы да булангъы халкъ экенини гөресен. Шолай төрөн тамурлу, кёп къардашлы, бай тилибиз булан герти күйде оъктем болма гъакъыбыз бар!

Ана тил – милли маданиятны, оъзтёречilikни, адабият ва тарихи эсделиклени сакълайгъан гъар миллетни тили ва адатлары. Къумукъ тилни сёз байлыгъы миллетни яшавун-турушун ачыкъ эте.

Бир-бирлерде халкъ арада: «Ана тиллер не ерде тарыкъ?» гъатта «Бир элли йылдан сонг ана тилин билегенлер де къалмажакъ», – деген бир-бир ойлар, бош лакъырлар да арагъя чыгъя. Шолай ойлар булан мен бирдокъда разилешмеймен.

«Вёре, сакъ! Вёре, сакъ! Къопмасын ба-лагъ –

Къумукъ атыбызын язмасын ташгъя.

Бугюн бетибизге телмирген бала,

Ана тилибизде сёйлейик яшгъя», – деген чебер тилни устасы Анвар Гъажиев.

Шо сёзлөр булан разилешмей болмайман. Артдагъы девюрде глобализация деп айты-

лагъан гъал таъсир этип, аз санавдагъы миллетлер бир-бирине къошуулуп, оъзтёречелигин тас этип къоймакълыкъ бар. Ондан къайры да, кёп миллетли Дагъыстанда кёбюсю ата-ана оъз яшларына «культурный» болабыз деп, ана тилиндө сёйлемей, гъатта уййде де орус тилде сёйлей. Дагъы да тилибизге зарал гелтиреген бир уллу четимлик: ана тиллерден дарс береген муаллимлерболма сюегенлер аз бола. Жагыиллер муаллим касбуну сайламай, сайлагъанланы буса билими осал бола. Шо гъал мени юрегимни бек гъалеклендире, талчыкъдыра. Оъзюме: «Гъалны алыштырмакъ учун биз не этип болабыз?» – деген соравну беремен.

Ата-бабаларыбыздан гелген варислик ана тилибизни асырап, аяп-сакъламакъ – бизин тувра борчубуз. Ону гележеги де, бугюнгю гъалы да бизден гъасил бола. Яшавда не ерни тутсакъ да, шо борч бизин алдыбызда къала. Неге тюгюл, бу тилде анам биринчилей магъя «балам» деп ушангъан, биринчилей мен «анам» деп сёйлегенмен.

Мен ойлашагъан күйде, ана тилибизни асырап-аяп сакъламакъ туврадан борччуу экенин гъар адам оъзю юрегинден англама герек. Янгыз англап да къоймайлыш, ону агъамиятын артдырмакъ учун къолундан гелеген гъаракатын этме тюше. Шолай болсун учун, биринчилей ана тилге сююв анасыны тилиндөн сингип, агълюде тарбияланмагъя герек. Сонг охув ожакъда, ондан сонг буса жамият арада оъсме герек. Ана тилни тазалыгъын сакълап, билегенибизни оъзгелеге англатып, гележекни талигъин бугюн топлама гъаракат этсек, бетибиз ярыкъ болур.

Мен ойлашагъан күйде, ана тил – жанлы бир ниъмат! Тил масъалаларда биринчى ерде



агылут окътагъан. Ана тилибизни уългюлериин яшлар биринчилей айлюден ала. Ана тилге сюов биринчилей «балам» деп, къакъакъ йыргъа айландырып, яшны къулагъына тамдырып, инг башлап нарыстаны, яшны тарбиялав булан байланма герек.

Къумукъ тил оъле, сёне дейгенлеге: «Оъз тилигизни сююгюз, аяма уйренигиз, ону къонгуравлу сесин, макъамын сезип, санларыбызгъа сюов сырлар булан сингдирип, гележекге яшларыбызгъа бизден варисликге сакълагъыз», – деп айтма сюемен.

Бизин охув ожагъыбызда биринчи класдан башлап муаллимлер охувчуланы къумукъ тилни халкъ авузяратывчулугъуну къужурлу байлыгъына гийирип, къакъакъ йырлардан, алгъышлардан башлап халкъ оюнларына ерли таныш эте, уйрете. Орта класларда буса «Мени элим» деген, сонг «Мени ағылю тамурларым» деген темалагъа гёре къумукъча проектлер этебиз. Уллу класларда буса, бизин Гимназияда программада берилген сагъатлагъа къарамайллы, гъар заман ана тилге багъышлангъан ишлер юрюлюп тура. Къумукъ тилни абурун гётеривде, ону оъзге тюрк тиллер булан байлавлукълары гъакъда бизге муаллимлер англатывлар бере, далиллэр гелтире.

Къумукъ тилден в аадабиятдан дарс береген муаллимлеребиз бизге, охувчулагъа, гъакъыллы насиғъатчылар да дюр. Олар биз этген яхши ишлеребизден де сюоне, яманыныбызгъа яна, экинчи аналарыбыз йимик янаша. Шо саялы да мен оланы атларын уллу абур булан эсгеремен. Мени инг де яхши, байсынавлу, бютюн Дагъыстангъа аты белгили муаллимим Мусаева Ругъаният Атакъовна шолайлардан бири. Яш чагъымдан тутуп гележек касбумну гъакъында кёп ойлаша эдим. Ругъаният Атакъовна буса менде ана тилге бакъгъан сюовню учгъунларын эс этип, магъа ана тиллени муалими болмакъыны таклиф этди. Шо гюнден башлап ана тиллерден, адабиятдан олимпиадаларда, чебер ярышларда ортакъчылыкъ этемен. Алдынлы

ерлени алгъанда буса, мени ана тиллеге бакъгъан сюювом бирден-бир арта. Мисал этип айтгъанда, гъар йыл мен ана тилден олимпиадада ортакъчылыкъ этемен. Дагъыстан пачалыкъ университет оътгереген «Абигуриент ДГУ» олимпиадада буса оътген йыл экинчи ерге ес болдум. Бу йыл да ортакъчылыкъ этмеге къастым ва алдынлы ер ала-жакъгъа умутум бар.

Бу йыл буса ону ёлбашчылыгъы булан биз, сиптечи группа да къуруп, бир пайдалы ишни яшавгъа чыгъармагъа гёз алгъа тутдукъ. Шону учун биз проект де къуруп, арагъа салып ойлашдыкъ. Проектге гёре, Ана тиллени халкъара Гюнүне багъышлангъан бир уллу мажлисойтгерме токътшадыкъ. Онда биз белгили алимлеребизни, шарирлеребизни, жамият чалышывчуларыбызны, Къарабудагъент районну бары да идараларыны ёлбашчыларын, бары да школаланы охувчуларын чакъырдыкъ. Инг де тизивю – бизин байрамыбызгъа Мычыгъыш республиканы Борагъан юртундан гелген къонакъланы да къабул этдик.

Биз оътгереген ишни аслу мурады – къумукъ тилни терен тамурларыны гъакъында, белгили адамларыбызны гъакъында айтмакъдан къайры, охувчуланы юреклеринде Ватангъа, ана тилге сюов, оъктемлик гъислер тувдурмакъ да болуп токътагъан эди. Ондан къайры да, оътгерилген байрам тыш республикада яшайгъан къумукълар булан бир къурдашлыкъны кёпюрюдей болуп токътады.

Мени ана къумукъ тилимни Дагъыстанда, Кавказда, Россияны, гъатта сав дюньяны ойлчевионде, уллу даражасы баргъа мен оъктеммен. Оъктемлигимни мен яшавумну гъар мюгълетинде, гъар абатынд агёрсетемен, гележекде де гёрсетежекмен.

Я Аллагъ, ата юртун, ана тилин унутгъанлардан, ана элин танымайгъан манкъуртлардан болмайыкъ. Шолай болмас учун, иннемей де турмайыкъ, ана тилибизни абурун сакълайыкъ, якълайыкъ!



Сурия Салимова

ДГУ-ны филология факультетини

рус-дагъыстан бўюгюнон

4-нчи курсуну студенти

Ана болмакъ азлыкъ эте анагъа

Мени азиз миллетим! Биз барыбызда билеген куйде, яшавда болуп турагъан алышынывлар тилибизни гележегине къоркъунчлукъ тувдур. «Мени яшым ана тилни дарсларына юрюмесе ярамаймы?» деген соравну аналаны тилинден аз эшитмейбиз. Къакъакъ йыргъа тынглап оъсмеген нарыстагъа къанна къазакъ йырлар кар этмес. Гъар бир авлет инг башлап ана тилин билме герек. Ана тилге бакъгъан сюювни анасы яшыны юрeginе сингдирсе, къумукъ миллетте де, ону тарихине де бакъгъан сююв яшда оъзлюгъонден тувадыр деп эсиме геле. Тил болмаса миллетни тарихи де, адатлары да тас болар. Тарихсиз милlet болмас. Шу ойну теренден ойламай, ана тилине немкъорай янашагъан яш аналар барына талчыкъмайлы болмайман. Къумукъ тил яшына орус тилни уйренме пуршав эте деп ойлайгъанлагъа мисал: инглис тилни уйренивде орус тил яшгъа пуршавлукъ этмей. Олай болгъанда, ана тили пуршавлукъ этме нечик бола? Бир нече тилни оъз тилидей яхши билегенлер ёлукъ-

маймы? Гъалиги заманда айрокъда кёп ёлугъа. Шолайлагъа бир тил бириси тилни уйренмеге бир де пуршавлукъ этмеген. Башгъа миллетлени вакиллери(аслу гъалда авар, дарги) оъз тилинден къайры рус тилни де, уйствуюн къумукъ тилни билегенлери де аз ёлукъмай. Оъзге миллетлер уйренме болагъан къумукъ тилибизни яшларыбызгъа уйретме неге къыйын гёребиз?

Бугунгю миллетибизни гъалына ата-аналар айыпплы. Тынглагъаннын къулагъына бир арив макъамдай чалынагъан, гёзел, бай, йымышакъ тилибизде сёйлеме уялагъан адамлагъа тамашалыкъ этемен. Ана тилин биле туруп да, яшына орус тилде сёйлейген аналар, аталар да кёп ёлугъа, айрокъда шагъар ерлерде. Олар, яшы орус тилни билмей деп айтма уяла. «Яшым ана тилин билмей,» - деп айтма шолайлар неге уялмай?

Къумукъланы халкъ шаири Агъмат Жа-чаев шу масъалагъа байлавлу кёп язгъан, тючлю язгъан:

*Ана болмакъ азлыкъ эте анагъа,
Ана тилин сингдирмесе яшына,
Шо хатасы таякъ болуп, таш болуп,
Тиймесе сонг яхши эди башына!*

Къумукъ халкъ тюзлюкъде, эркинликде яшагъан, бир заманда да тиленмеген, бай тарихи булангъы, оъзден халкъ. Осьюп гелеген наслубузгъа шону англатып, тарихибизни уйретме герекбиз. Тек, яшларда ана тилге бакъгъан сююв болмай туруп, бу иш толу куйде бажарылмас. Булар бары да ана тилден баш алажъанын ата-ана англама герек. Яш наслу ана тилин уйренме иш

тагълансын учун, школаларда ана тил ва адабият дарслардан береген муалимлер де гъаракат иш гёрсе яхши болур эди. Ишине юрegin салып, гележек наслу-ну, оланы къысматын ойлашып ишлесе, мен ойлашагъан куйде ана тилибизни гъалы алгъа баражакъ. Дарсгъа гъазирлик гёrmек учун да, муалимлеке арт вакъти кёп имканлыкълар чыгъып тура, интернет, соцсетльерде

къумукъ тилде юрюлген группалар бар. Шолар булан да пайдаланып, китапда берилмеген маълуматланы да къошуп, яшлагъа етишдирсе, дарслар яшлар учун къужурлу ва пайдалы ойтежегине шеклик этмеймен. Китапда берилген асарны, авторну тувгъан йылларын яшлар оъзлер охуп да бола, олар охусун учун муаллим, яшлани тергевион тартар йимик, оъзлер китапны ачып, охума муштарлы болар йимик маълуматланы тапма герек. Шолай муалимлер де арабызда ёкъ тюгюл. Къумукъ миллетиме шолай муалимлер гюнден гюн артмакъны ёрайман!

Мени къыйнайгъан, ана тиллеге байлавлу, дагъы да бир масъала бар. Шагъар ерлерде къумукъ тилден ва адабиятдан береген муалимлени аз. Шагъарларда, посёлокларда къумукъ тилни билегенлени санаву йыл

сайын аз бола. Айып яшларда тюгюл, уллуларда. Ана тилни гъайын этеген, оъзюню яшавун школа булан байлама сюегенлер кёп аз. Шагъар школаларда дарс береген муаллимлер дарсларын орус тилде юрюте, къумукъ асарлани охуп, орус тилге гёчюре. Ону да яшлар тилни англамайгъанлықъдан борчлубуз деп англата. Шо якъдан алгъанда юртдагъы школаларда ишлемеге рагъат. «Яшлар булан ишлеме къыйын,» – деп айтагъанланы да эшитебиз. Тынчлыкъда, парахат яшама сюебиз. Бизин миллетибизни гележеги бизин яшларда. Яшларбыз ана тилни билмей туруп, миллетибизни гележеги ағы урап гъалда. Шону да англай туруп, биз нечик тынчлыкъда яшап, парахат юхлама болабыз?



Къумукъ тилни орфографиясы

Гиришив

“Орфография” деген сёз бизге орустиден гелген. О сёз ойзю эки грек сёзден этилген: орфос (тюз, дурус), графо (язаман). Алда, арап алфавит къолланагъан девюрде (1928-нчи йыл болгъунча), шо маънада «имла» деген арап сёзде къолланып тургъан. Гъалиги къумукъ тилде “орфография” терминни маънасында “тюзязыв” деп къумукъ терминни къолламагъя ярай.

Орфография деген сёз сынавда эки маънада къоллана:

1. Орфография – тюз язывну токъташдырылгъан къайдалары ва оланы жыйымы.

2. Орфография – ойзю тюз языв процесси, язывда орфография къайдаланы сакълав. Бу экинчи маънада, мисал учун, “Ону орфографиясы осал”, “Орфографиясы сынтыкълай” деп айтылмагъя бола.

Илмуда орфография булан тыгъыс байлавлу бирдагъы бир тармакъ бар – графика. Орфография ва графика – башгъабашгъа илмулар, оланы гъарисини ойзюню ахтарагъан объекти бар. Орфография сёzlени ва оланы гесеклерини (тамурланы, къошумчаланы) тюз языв къайдаларын токъташдырагъан илму буса графика тилни авазларын язывда гёрсетеген къайдаланы, кюйлени токъташдыра, демек, аслу гъалда алфавит булан машгъул бола.

Орфография къайдаланы токъташдырагъанда, графиканы гъисапгъа алмаса бажарылмай, неге тюгюл оланы экисини де ахтарагъан объекти бир – языв.

Орфографияны бир-бир масъалалары графикадан асылы болагъанни гёрсетmek учун бир-эки мисал гелтирейик.

1. Къумукъ алфавитде я, ю, ё, е гъарплар болмагъан буса, шоланы орнунда (эки аваз айтылагъан ерлерде) йа, йу, йуль, йе, йо, йой языла болгъан буса (орус алфавитни къабул этген сонггъу башлапгъы йылларда шолай язылып да тургъан), нечик болар эди? Къумукъ сёзлерде шо гъарпланы язылышина байлавлу орфография къайдалар ойзлюгүндөн тайып къалар эди; ь, ъ гъарпланы язылышина байлавлу къайдаланы алышдырмагъа тюшер эди, неге тюгюл “дюнья”-ны орнуна “дуңиң”, “аттёкъ”-ну орнуна “атиокъ” язылса, шо белгилер тарыкъ болмай.

2. Къумукъ алфавитде щ гъарп бар. 1978-нчи йыл чыкъгъан орфография сёзлюкде шо гъарп булан язылагъан сегиз сёз берилген: шёлок, щёлочь, щётка, борщ, щи, ящик, плащ, овош. Эсгерилген сёзлени дёртюсюндөн къайрысы (ящик, плащ, борщ, щётка) гъалиги къумукъ тилде къолланмай, шоланы да айтылагъан кюйде ш гъарп булан язса (ящик плаш, борш, шётке), алфавитде щ гъарп болмаса да ярайгъаны ачыкъгъа чыгъя.

Белгили болгъаны йимик, языв (графика) тюрлю-тюрлю болмагъа ярай, масала: идеография языв (бир сёзю бир белгилероглиф булан гёрсетив – китай тилде), бувунлу языв (бувундагъы бир-бир авазланы язывда гёрсетмей къоягъан къайда), гъарплы языв (авазланы-фонемаланы айры гъарплар булан гёрсетип, гъарпланы къошуп охуйгъан къайда – гъалиги къумукъ языв шолай). Орфография къайдалар язывну шо тюрлюлеринден де асылы бола.

Орфографиягъа терендөн тюшюнмек учун къумукъ графиканы тарихинде болгъан

аслу алышынывланы мунда гёзден гечирсек, пайдалы болар.

Къумукълар ойзлени тилинде язмакъ учун юз йыллар бою арап алфавитни къоллап турғынан белгили. Арап алфавитни къоллап, арап тилде язылмай, башгъа тилде язылгъан буса, шолай язывгъа ажами (ажамча языв) деп айтыла болгъан.

Арап алфавит арап тилни къуруулушуна къыйышдырылып яратылгъан. Тюрк тиллер (шоланы арасында къумукъ тил де), арап тил булан тенглешдиргенде, бютюнлей башгъа къуруулушу булангъы тиллер. Масала, арап графика да созукълар язывда гёрсетилмей къалмагъа да ярай, гёрсетилсе де, шолардан янгыз уьчюсю (а, у, и) гёрсетлмеге бола, шолар да сёзню уьстюне яда тюбюне салынагъан къысгъа гызылар (гъаракалар) булан языла. Къумукъ сёзлерде, айры алгъанда, [и]-ни гёрсетеген белгини [и], [э] деп, [у]-ну гёрсетеген белгини [у], [о], [об] деп охумагъа шарт яратыла. Масала, къол деген сёзню айры алгъанда къол, къул деп охумагъа бола, неге тюгюл къол деп язылып, уьстюне [у]-ну гёрсетеген гъарака салына ([о]-ну гёрсетеген гъарака арап графикада ёкъ). Къумукъ тилде буса сегиз созукъ бар ва бизин тилни фонетика къуруулушу сегиз де созукъ авазны гъарисин айры гъарп булан сёзню ичинде гёрсетгенни талап эте. Ондан къайры да, къумукъ тилдеги бир-бир тутукъланы (г, ч, нг, ж, п, ц) язмакъ учун арап алфавитде гъарплар ёкъ (шолай тутукълар арап тилде къолланмай, шо саялы да гъарплар ёкъ). Башлапгъы вакътилерде арап алфавит алышдырылмай, бар кюонде къолланып турғын. Шолай болса, арап алфавит булан къумукъча язывда, ва айрокъда охувда, хыйлы четимликлер тувлунагъаны ачыкъ. Шо саялы да, арап алфавитни тюрк тиллени аваз къуруулушуна къыйышдырмакъны масъаласы арагъа чыгъа.

Арап алфавитни къумукъ тилни аваз къуруулушуна къыйышдырмакъ учун шулай аслу масъаланы чечмеге герек болгъан:

1) къумукъ тилдеги ы, уь, о, об, э созукъланы гёрсетmek учун айры гъарплар белгилемек;

2) ч, нг, п, г, ж, ц тутукъланы гёрсетеген гъарпланы токъташдырмакъ;

3) гъаракаланы тайдырып, созукъ авазланы сёзню ичинде язагъан къайданы къабул этмек.

ХХ асрунда башында шолай реформа этиле, демек арап алфавитни тюрк тиллени аваз къуруулушуна къыйышдырагъан алышынывлар бола. Къумукъ тилде шо реформа Абусупиян Акаевни аты булан байлавлу. Абусупиян Акаев 1903-нчюйылдан тутуп яшланы янги къайдада охутмагъа башлай ва 1909-нчу ийлда янги къайдагъа гёреязылгъан Иршадуссибьян (къумукъчагъа гёчюрсө: “Яшланы тюзлев, уйретив”) деген алифба (букварь) китабын басмадан чыгъара.

Болса да, Дагъыстанда Совет гъукуматы орунлашгъынча бу реформа мекенли бегимей, эсли къайдада язылгъан китаплар реформадан сонг да чыгъып тура (шоланы арасында Абусупиян Акаевни ойзюню китаплары да бар). Янгыз 1920-нчы ийлда арап алфавитни реформасы беклешдириле. Биринчи совет газетлер (масала, “Ишчи халкъ”), совет язывчуланы биринчи китаплары шо алфавитде язылып чыкъгъан (Алимпаша Салаватовну “Биринчи гесек” деген китабын мисалгъа гелтирмеге ярай).

1920-нчы ийларда арап алфавитден латин алфавитге гёчмекни масъаласы салына. Шо масъаланы чечмек муратда 1922-нчи ийлда Совет гъукуматны янындан “Янги тюрк алфавитни комитети” къурула (комитетни ёлбашчыларыны арасында Ж. Къоркъмасов да болгъан). 1926-нчы ийлда Бакю шагъарда ойтгерилген Тюркология съездде СССР-деги тюрк халкълагъа латин



алфавитте (“Янгалиф”) гёчмек таклиф этилеген къарап чыгъарыла. Къумукълар латин алфавитни кюрчюсүндө къурулгъан янги язывгъа 1928-нчи йылда гёчген.

20-нчы йылларда бу масъалагъа байлавлу язылгъан макъалаларда, китапчаларда, Тюркология съездде ва Комитетни жыйынларында болгъан чыгъып сёйлевлерде, арап алфавитни къюоп, латин алфавитте гёчмекни себеплери гъакъында да айтыла. Шо себеплени аслуларын айырса, экисин гёрсетмеге бола.

1. Арап алфавит эсги культура булан байлавлу, халкъланы европа культурагъа ювукълашывуна, социалист идеологияны мюлк этивионе пуршав бола.

2. Арап алфавит арап тилни къурулушунан гёре яратылгъан, тюрк тиллени аваз къурулушунан къыйышмай (бу пикру гъали де оымюр сюрюп турал).

Гъали биз экинчи себеп онча тюз гёрсетилмеген болгъан деген ойгъа гелебиз: озокъда, арап алфавит, бар кюонде алынса, тюрк тиллени аваз къурулушунан къыйышмай, тек о, реформа этилип къыйышдырылгъан чы. Айтагъаныкъ, аслу себеп биринчиси болгъан.

Янги алфавит аз йыллар (1928-1938) къоллангъан; ондан къайры да ону девюю адабияттыбыз ва культурабыз учун къыйынлы болгъан, 30-нчу йыллагъа тюшген, шо саялы да латин алфавитте язылып къалгъан варислик бай тюгюл.

Латин алфавит язывну масъаласын бютюнлей чечмеге бажармагъан, неге тюгюл янги алфавитте гёчгенде янги четимликлер тувлууна: техника четимликлер (печать этмеге машинкалар, типография онгайсызлыкълар), школада ана тил ва орус тил дарсларда башгъя-башгъя алфавитлени уйренмеге тюшегенлик ва ш. б. Буланы барысын да гъисапгъа алып, 1938-нчи йылда орус алфавитни кюрчюсүндө янги алфавит

къабул этиле. Бу ерде бир затны тергевге алмагъа герек: орус алфавит халкъга оърден, “гючден” берилмеген, бизин шартларда о болмаса болмайгъан, бир объектив процесс гъисапда гелген.

Къумукъ алфавитде 39 гъарп бар, шоланы алтысы (гъ, гъ, къ, нг, оь, уь) орус алфавитде ёкъ, къумукъ тилге хас авазланы гёрсетмек учун яратылгъан.

Гъалиги къумукъ алфавитде, гъатта латин алфавит булан тенглешдиргенде де, хыйлы кемчиликлер бар. Орфографияны камиллешдирив графикадагъы кемчиликлени тайдырыв булан да байлавлу, шо саялы оланы аслуларын эсгерейик.

1. Алфавитде эки къабат гъарплар бар (къ, гъ, гъ, нг, оь, уь). Бир авазны эки къабат гъарп булан гёрсетнв, къайсы графикада болса да, кемчилик гъисаплана. Олар, бир ягъындан, ерни кёп ала, бирдагъы ягъындан, охутувда четимлик түвдүра.

2. Тюрлю къуллукъланы күтеген я, ю, е, ё гъарплар бар. Масала, ю гъарп [уь], [йу], [йуу] авазланы гёрсетмеге бола. Булай гъал тилни уйренивде ва уйретивде зарал гелтире, масала, юн деген сёзню бир-бир ерлерде [йун] деп охулмай, [йуын] деп охулагъанын англатмагъа тюше. Шо гъарплар бир-бир гезиклерде созукъ авазланы “ютуп” къоя.

3. Башгъя-башгъя авазланы гёрсетмеге болагъан гъарплар да графиканы кемчилиги бола, масала, жыжым деген сёзде ж гъарплар бир авазны гёрсетмей, бир-бир охувчулар жыжым, жыйын иймик сёзлөрдеги ж гъарпны “журнал”-дагъы [ж] иймик охуйлар.

4. Алфавитдеги гъарпланы санавуну белгили агъамияты бар. Тайдырса да ярайгъян гъарплар алфавитде болмагъа тюшмей. Щ гъарпны масъаласы шолай. Орфография сёзлюкде шо гъарп булан язылагъан сегиз сёз бар (щёлок, щёлочь, щи, щётка, плащ, ящик, овош, борщ). Оланы дёртюсю тюгюл (борщ, щётка, плащ, ящик)

къумукъ тилде къолланмай. Шо сёзлени плаш, борш, шётке, яшик деп язса, алфавитде щ гъарп артыкъ бола.

Тюрк тиллени алфавитлериндеги кемчиликлеке тезден тергев берилген, тек бу масъала гъали де чечилмеген күйде къалып турла.

Латин, сонг буса орус алфавитте гёчмек булан Орфографияны мекенили къайдаларын токъташдырымакъны масъаласы алда токътай. Къумукъ Орфографияны башлапгъы кюрчюлерин салывда Т. Бийболатов, М. Садуллаев, А. Салаватов, А. Батырмурзаев, З. Бамматов гёrmекли ер тутгъан. 1931-нчи йылда “Ёлдаш” газетде чыкъгъан “Бизин тилни имла (орфография) ва сеслени уюшмакъ (сингармонизм) масъалаларына нечик янашмагъа герек” деген макъаласында Т. Бийболатов орфографиягъа байлавлу оъзюню пикруларын айтгъан. Бу макъаласында Т. Бийболатов орфографияда къумукъ тилни аслу фонетика закону болгъан сингармонизмни гъисапгъа алмакъ, орфографиядагы айрылыкъланы бирлешдирмек, ят тиллерден гелген терминлени къадарын белгилемек ва оланы язылышын токъташдырымакъ ийимик гъали буссагъатда да арадан таймагъан кюрчю масъалалагъа къарагъан.

Латин язывда орфографияны аслу принциплерин анализ этеген китапны 1931-нчи йылда М. Садуллаев язып чыгъаргъан.

Орус алфавитте гёчген сонг, токъташгъан орфография тарыкълы бола ва 1938-нчи йылда М. Темирханов, З. Бамматов, А. Салаватов онгаргъан “Къумукъ литература тилни орфография къайдаларыны жыйымы” чыгъа. Къумукъ тилни аслу къайдалары биринчилей шу китапда токъташдырылгъан. Китапны башында орфографияны принциплерине англатыв бериле, сонг – языв къайдалар. Озокъда, эсгерилген

китапда бары да масъалалар чечилген деп айтмагъа болмай (о заманда шону учун шартлар да болмагъан). Китапда къумукъ орфографияны орус орфографиягъа болгъан чакъы ювукълашдырымакъ мурат тутулгъанлыкъ гёрюнюп тура. Масала, китапны алынгъан сёзлөгө багышлангъан бёлюгүндө булагай къайдалар бар: 1) орус тилден гелген бары да сёзлер (революциядан сонг ва алда) орусча нечик языла буса, къумукъча да шолай язылмагъа герек; 2) СССР-ни халкъларыны сёзлерини орус тилдеги язылышы сакълана, масала, Гуниб (Гуниб тюгюл); 3) Арап ва фарс тиллерден гелген сёзлерден къачмакъ, тилде бегилгенлерин буса къумукъ орфографиягъа гёре язмакъ.

Къумукъ тилни биринчи орфография сёзлюгю 1941-нчи йылда чыкъгъан, сёзлюкню язгъан – А. Н. Батырмурзаев.

Орфография масъалаларына хас конференцияларда да къарагъан. Шолай конференциялар 1931, 1933-нчю йылларда (орус тилден гелген сёзлени язылышы), 1950-нчи (я, ю, е, ё гъарпланы язылышы) йылларда ойтгерилген.

Къумукъ тилни гъалиги орфография къайдалары 1962-нчи йылда ойтгерилген орфография конференцияда къабул этилген ва шо къайдалар ДАССР-ни Министрлер Советини 1962-нчи йыл 14 августда 144 номерли къаарарында бегетилген.

Къаарарны 3-нчю пунктунда булагай тёрсетив бериле:

“ДАССР-ни Охув ишлер министерлиги, Дагъыстанны охув-педагогика издательствосу, республиканы газет-журнал издательствосу, ДАССР-ни Оър Советини Президиумуну издательствосу, область ва район газетлени редакциялары оъзлени печать ишинде орфографияны янгы къайдаларын тайышывсуз күйде юрютмеге борчлу.”



1962-нчи йылда ойтгерилген конференцияны къаарларына аласланып, 1965-нчи йылда янгы орфография сёзлюк чыгъарыла (авторлары – З. Бамматов, А. Магъамматов). 1978-нчи йылда шо сёзлюк, толумлашдырылып, учюнчюлей чыгъарыла.

Шолайлыкъда, къабул этилген орфография къайдалар гъукуматны закону гъисапда токъташдырыла ва бары да язагъанлар шо къайдаланы сакъламагъа борчлу.

Орфографияны гъакъында сёйлейгенде, гъар заман адабият тилни гөз алгъа тутмагъа герек, неге тюгюл орфография адабият тилде тюз языв къайдаланы токъташдыра; адабият тил белгили къайдалагъа кюрчюленмесе, низамгъа салынмай, демек булар бир-бириңден айрылмай. Орфографияда “бизде бурай, сизде олай”, “бизде тюз айта, сизде айтмай” йимик пикрулагъа ер ёкъ. Эгер орфографияда кёп къаршылыкълар ёлугъа буса, о адабият тилни мекенили нормалары токъташып битмегенни гёрсете. Адабият тил, башлап белгили бир диалектте яда диалектлөгө кюрчюленсе де, формалашып битген сонг, о оъзю кюрчюленген диалектлерден айрыла ва гъали бир диалект де тюгюл, шогъар гөре “бизин диалектибиз – адабият тил” демек англавсузлукъ болар. Орфографияда къабул этилген язылыш, къайсы диалекттө ошаса да, адабият тилни нормасы болуп токътай.

1. Къара: Опыт совершенствования алфавитов и орфографий языков народов СССР. “Наука”, М., 1982.

Орфографияны принциптери

Орфография къайдалар низамсыз токъташдырылмагъа болмай, олар белгили бир принциплөгө кюрчюлене. Сёзню язылышина болмагъа болагъан эки яда

экиден артыкъ варианларыны бирисин, бир къайдагъа аласланып, сайлап алывгъа Орфографияны принциби деп айтыла. Масала, асыв [асув], асув къайсы не маънада язылагъаны белгили орфография принципге кюрчюлене.

Орфографияны аслу принциплери шулардыр: фонетика, морфология, айырыв, мердеш (яда тарих), этимология принциплер. Орфографияны кюрчюсюне къайсы принцип алынагъаны тилни фонетика ва грамматика къурулушундан асылы бола, сюйген принципни сайлап къолламагъа бажарылмай. Къумукъ тилдеги авазларда гелишив (сингармонизм) закону фонетика принципни къолламакъын, грамматиканы агглютинатив къурулушу буса морфология принципни къолламакъын талап эте. Шолайлыкъда, къумукъ орфография эки принципге кюрчюленген: фонетика ва морфология принциплөгө. Оланы экисин де бирлешдирип, фонетика-морфология принципиби деп де айтыла.

Фонетика принцип. Сёзлени айтылагъан (эшитилеген) күйде язмакъ фонетика принципге гөре язмакъ бола.

Бу ёлда язмакъ онгайлы гёрюнсе де, сёзлени бир-бирине байланысында ва түрленивүндө кёп четимликлер түвдур. Масала: он беш деген сёзлени бир-бирини артындан арасын бёлмей айтсакъ, шоланы аслу формалары алышынып, [ом меш] деп эшитиле. Шону йимик онну да, дёртню де бир ерде айтсакъ, [оън нёрт] деп, бет деген ва тёбен деген сёзлер [бёттёбен] деп эшитиле.

Шу мисаллагъа ошап, бир-бир гезиклерде бар деген сёз [пар] деп, гел – [кел] деп, къуш - [гъуш] деп, гюн – [гюл] деп эшитиле (масала: [ал-пар], [ал-кел], [къара-гъуш], [гюл-люк]).

Сёйлевде авазланы алышынагъанлыгъына дагъы да кёп мисаллар гелтирмеге ярай. Тек тилде болагъан алышынывлар бир авазны башгъа



авазгъа айланмакълыгъы булан битип къалмай; кёбюсю гезиклерде аслуда бар аваз тюшюп къала яда ёкъ аваз гелип де къала. Масала: бойну акъ деген сёзлер бир ерде айтылгъанда, у тюшюп, [бойнакъ] болуп къала; къайгъымас дегендеги гъ тюшюп, къайырмас бола.

Шунда эгерилген алышынывлар, аслу гъалда, къумукъ тилни бары да диалектлеринде юрюлеген алышынывлар. Шундан къайры, айры-айры диалектлерде тюрлю-тюрлю айтылагъан сёзлер кёп бар. Мисал учун, тюкен деген сёз бир ерлерде [тюкён] деп, бир ерлерде [тукен] деп у булан айтыла. Шону йимик [къычыр] деген сёзниу [къыччыр] деп, тюз деген сёзниу [туз] деп айтагъан ерлер бар. Болса да, язывда фонетика принципе де къоллана.

Фонетика принципге гёре тюпде гёрсетилген гезиклерде языла.

1. Къошумчаланы созукъ авазлары, гелишив законгъа таби болуп, вариантлары булан айтыла ва шолай языла: ашлыкъ, ишик, гюнлюк, тонлукъ; айтсаны, гелсене ва ш. б. Тар созукълу къошумчаланы дёрт варианты айтыла ва языла (-лыкъ, -лик, -лукъ, -люк), генг созукълу къошумчаланы – эки варианты (-лар, -лер). Бир варианты тюгюл ёкъ къошумчаланы шо бир варианты языла, масала, -окъ къошумчаны: алгъандокъ, гелгендокъ.

2. Айры алынгъан тамур сёзлер адабият тилде айтылагъан күйде фонетика принципге гёре языла: гёлек, инныр, асуу (пайда деген маънада), сексен (<се-гиз + он), токъсан (<тогъуз + он).

3. Бир-бир къошма сёзлер: уягълю (<ууй + агълю), къайната (<къайын + ата), къайнана(<къайын + ана).

4. Адамны санларын англатагъан бир-бир сёзлени экинчи бувунундагъы тар созукъ мюлк къошумчалар къошулгъанда айтылында тюше ва язывда шо тюшюв

сакълана: авуз – авзу, эрин – эрни, къарын – къарны, боюн – бойну, къоюн – къойну. Айыр деген ишикке даражада къошумча къошулгъанда, бу къайда сакълана: айыр – айрыл.

5. Ахыры къ, к, п тутукълагъа битетен сёзлөгө мюлк къошумчалар къошулгъанда, шо тутукълар гъ, г, б авазлагъа гёче ва язылында шо алышыныв сакълана: аякъ – аягъы, тюк – тюгю, топ – тобу. Сёзни ахырындагъы къ, к тутукъланы алдында башгъа тутукъ (сонорный) гелсе, шолай алышыныв болмай: къыркъ – къыркъы, бёрк – бёркю, чонкъ – чонкъу, ренк – ренки, залп – залпы, турп – турпу.

6. Орус тилден гелген сёзлени ахырындагъы йымышакъ тутукъ къошумчалар къошулгъанда, къатты айтыла, язывда шо алышыныв сакълана (йымышакълыкъ белгиси салынмай): июнь – июнда, январь – январда.

7. Арап, фарс, тав тиллерден гелген сёзлер барысы да ва орус тилден гелген сёзлени бирлери къумукъча айтылагъан күйде языла ва шу къайда да фонетика принципге гире: карават (орусча: кровать), панар (орусча: фонарь), кампет (орусча: конфета), паннуз (орусча: поднос), сумавар (орусча: самовар), китап (арапча: китабун), Магъаммат (арапча: Мугъаммад), ренк (фарсча: рянг), зенг (фарсча: зянгуле), мичари (даргиче: мучери, даргиче: мучи “тари”).

Морфология принцип. Ойргеги материалдан гёрюнегенде йимик, фонетика принципни ойзюню къолланагъан дазулары бар. Бары да гезиклерде айтылагъан күйде язылып турса, тилде уллу четимликлер тувар зди, языв тил гъатта англашылмайгъан даражагъа чыгъар эдн. Масала, гюллюк (гюл чачылагъан ер, гюл бахча) ва гюнлюк (гюнлюк иш, “зонтик”) деген сёзлер бир йимик айтыла: [гүйлүк], шолай да: акълар – атлар [аълар], къынлар – къыллар [къыллар],



бала ал – бал ал [балал] ва ш. б. Ондан къайры да, гъар кимни сёйлевюнде оъзюне хас белгилери бола, адабият тилде нечакты тюз сёйлейгенлени де оъзюню диалектики бир-бир формалары сакъланана. Демек, орфография янгыз фонетика принципге кюрчюленип къалмагъа болмай, морфология принцип де къолланмагъа тюше.

Морфология принципге гёре тамур сёзлер ва сёzlени гесеклери (къошумчалар), нечик айтылагъанына къарамайлыш, гъар заман бир күйде языла.

Морфология принципге гёре тюпдеги гезиклерде языла.

1. Сёзнуу тамуру, къошумчалар къошулгъанда, аваз якъдан алышина да, гъар заман бир күйде, оъзюню аваз къурулушун сакълап языла: тон – тонлар [толлар], татыв – татымакъ – татли [таъли], этик – этиклер [этильер], бек – беклик [бэйлик].

Эсгеривлер:

а) Оърде эсгерилген фонетика принципге гиреген топ – тобу, аякъ – аягъы, тюк – тюгю, авуз – авзу, эрин – эрни, къайнана, айрыл йимик язылышлар бу къайдадан чыгъя.

б) Гъалиги тилдетамурларыны маъналары тас болгъан бир-бир сёзлер де бу къайдагъа таби болмай: энни (<энди>), иннемей (<ин + демей>).

2. Айры сёзлер бирче айтылагъанда, оларда аваз алышинывлар ёлугъя, шо алышинывлар язывда гёrsетилмей: къара къаргъа [къара гъаргъа], алып гетди [алыпкетти], сен гелдинг [сенг нгелдинг], сонг болмас [сонг молмас], сагъа айтаман [сагъайтаман] ва ш. б.

3. Къошма ва чалмюк тамурланы, нечик айтылса да, айры алгъанда язылагъан кюо сакъланана: къаракъуш [къарагъуш], он бир [оммир], гечекъуш [гечегъуш], тотуркъуш [тотургъуш], [тотугъуш], ата-ана [атаана], агъа-ини [агъини].

Эсгеривлер:

а) Къошулгъанда эки созукъ янаша гелеген бир-бир сёзлер атылагъан күйде языла: гесмот (<гесме + от>), гечорта (<гече + орта>).

б) Къошулгъан сёз оъ, уъ авазлагъа башлана буса, къошулуу язылагъанда ё, ю языла: яшёрюм (<яш + оърюм>), ашюй (<аш + уйй>).

4. Къошумчаланы тутукъ авазлары, ассимиляциягъа таби болуп, алышинып айтылса да, гъар заман бир йимик языла: онда [онна], къонакъыгъа [къонакъы], атдан [аттан], итден [иттен], терекге [терекке], тонгъа [тонгнга], топгъа [топкъа], орамгъа [орамнга], айтды [айтты], билди [билли]. Язывда бир фонема сакъланагъангъа гёре, бу къайдагъа фонема принцип деп айтмагъа да ярай.

5. Кёмекчи сёzlени язылышы да морфология принципге гире, неге тюгюл, олар, нечик айтылса да, бир күйде ва айры языла: геле эди [геледи], айта эди |айтеди], геле экен [гелекен], орам булан [ораммулан].

Оърде эсгерилген күйде, къумукъ тилни орфографиясы фонетика-морфология принципге кюрчюленген. Бир-бир сёzлени язылышында, аз болса да, башгъа принциплер де къоллана. Тюпде шолагъа да къарала.

Мердеш (тарих) принцип. Бу принцип тилни белгили бир къанунларына таянмай. Бир къабул этилген къайдада сёйлешилип токтатшырылгъан язылышлар бу принципге гире.

Орус тилден гелген сёzлени орус тилде нечик языла буса, шолай язылагъанлары мердеш принципге гире. Масала: коммунизм, [камунизм], колхоз [калхоз], трактор [тыракътир], январь [йанвар], февраль [феврал], комбайн [коммайын], цемент [семент], форточка (фортушка), ферма [перма]; къысгъартылгъан къошма сёзлер:

ТАСС, СССР, вуз, комсомол, США ва ш. б.

Сийрек ёлугъагъан къумукъ сёзлени бирлерини язылышын да бу принципге гийирмеге ярай (оланы язылышын башгъа куйде англатмагъа болмай буса, масала: күтсюз (<кюц + сюз], кюргете [кургете, көргете, корага], илиякълы [илиякълы], саламалейкум [саламалайкум, саламалейкюм, ассаламалейкюм].

Айырыв принцип. Бир йимик айтылагъан сёзлени маъналарындагъы башгъалыкъны сакъламакъ учун башгъа-башгъа куйде язылагъан сёзлер бу принципге гири: акъсакъал (къарт гиши, уллу гишин) – акъ сакъал (агъаргъан сакъал), къыркъаякъ – къыркъ аякъ, бешбармакъ (ашны бир тюрлюсю) – беш бармакъ. Бу принципде язылагъан сёзлер кёп тюгюл.

Этимология принцип. Бу принцип де аз къоллана. Гъалиги тилде маънасы тас болгъан, айры къолланмайгъан тамурланы язылыши шу принципге гёре токъташдырыла. Масала, экмек деген сёзниу бырынгъы тамуру эк-. Эсгерилген сёзниу айттышы этмек деген сёз булан бир геле, демек экмек болса да, этмек болса да, [эъмек] деп айттыла, шо саялы авуз тилге къарап

оланы тамурун токъташдырмагъа болмай. Тек бары да тюрк тиллерде к аваз м авазны алдында ъ авазгъа айланмай, шо тиллерде экмек деген сёзде к ачыкъ эшитиле, этмек деген сёзде буса т эшитиле. Азербайжан тилде екин (ашлыкъ чачыв) деген сёз де бар. Экмек деген сёз де [этмек] деп айттылагъан ерли сёйлевлер де бар, тек о сёйлевлерде тамур унутулгъан сонг, экмек “этмек”-ге ошатылып айттылып къалгъан (аналогия законгъа гёре). Нечик алай да, экмек деген сёзниу бырынгъы тамуру этмек “делать” деген маъна булан байлавлу тюгюлю мекенли токъташдырыла. Окълав деген сёзниу язылышын да шу бёлюкге гийирмеге ярай. Гъалиги тилде эсгерилген сёзниу окъ тамуру ачыкъ тюгюл, айттышы [оълав], тек бир-бир ерлерде, масала, терик диалектде ва башгъатюрктилдердекъачыкъэшитилгенге гёре, сёзде къ язмагъа гереги мекенлеше.

(«Къумукъ тилни орфография сёзлюгюн» баш сёз ва гиришив макъалалары. Тизгенлер Бамматов З.З., Магъамматов А. Г., Жангиишев Ж.М. 1989 и.)



Агъарагъим Солттанмуратов

Дагъыстан пачалыкъ университетни
дагъыстан халкъларыны адабиятларыны
кафедрасыны заведующий, филология
илемуланы кандидаты, доцент

Идеологияны таъсириinden къутулуп, адабиятны чебер-эстетика янларына багъып бурулув

Белгили күйде, совет девюрде бизин улкени халкълары (шоланы арасында къумукълар да) коммунист идеологияны таъсириң артыкъ сезип юрюп турду. Шо таъсириң адабиятларда айрокъда гючлю болду деп айтма ярай. Совет девюрде чыкъғъан адабиятдан охутув китапланы алып къарап къойсакъ да, бизге көп зат оъзлюгүндөн англашынып къалажакъ. Шо китаплар бары да дегенлей Октябр инкъылапгъя, коммунист партиягъя, Ленингэ багъышлангъан асарлардан башланып ачыла. Бу макъалабызыны ичинде биз шо тайпа асарланы чебер-маъна янларына тергев бакъдырма хыял этмейбиз, шо айрыча бир башгъа масъаланы темасы болуп токътай.

Артдагъы отуз йылланы узагъында улкебизни жамият яшавунда болуп турагъан алмашынывланы натижасында адабиятларыбыз коммунист идеологияны таъсириinden толу күйде къутулуп тура. Гъалиги девюрде школалар учун гъазирленеген охутув программаланы, китапланы алдында идеология борчлар, талаплар салынмай, терсине идеологиядан къутулуп, адабиятны оъзюню герти чебер-эстетика борчларына, талапларына багъып юз бакъдырмакъ гөз алгъа тутула. Буса да бугюнлерде де көбюсю школаларда адабият дарсларда совет девюрдеги коммунист идеологияны таъсири сезилмей къалмай. Ачыкъ этип айтгъанда, бир-бир муаллимлөр бир тайпа асарланы уъстюнде ишлей турup, шоланы маънасын «байлар – ярлылар» деген

къаршы салывгъа, тар къалипгэ гелтирип токътайлар. Шо янашывну биз инкъылапдан алдагъы, оъзю инкъылапны йылларындагъы, совет девюрню башлапгъы йылларындагъы адабиятны гечегендө айрокъда көп гөрмө болабыз. Масъалагъа шолай янашыв, биз ойлашагъан күйде, толу чу нечик де тюгюл, бютюнлей тар, сай янашыв болуп токътай. Озокъда, байланы ва ярлыланы арасындагъы къаршылыкъ не девюрде де болуп гелген, шону бирев де инкар этип болмас. Шо къаршылыкъ артыкъ оърчюкмеген эди буса, балики, оъзю Октябр инкъылап да яшавгъа чыкъымас эди. Тек биз оърде айттып гетген пикрубузну такрарлай турup, бирдагъы керен де ташдырып айтабыз: гечилеген адабият асарланы маънасын «байлар – ярлылар» деген къаршы салывгъа, тар къалипгэ гелтирмек масъалагъа бакъгъан якъда тар, сай янашыв болуп токътай.

Пикрубузну гертилемек учун, мисалгъа Йырчы Къазакъны яратывчуулугъун алып къарайыкъ.

Белгили күйде, адабияттыбызыны классигине тюрлю-тюрлю класларда тергев бакъдырыла, охутув китапларда ону тюрлю-тюрлю асарлары ерлешдирилген. Амма совет девюрде Къазакъны бютюн яратывчуулугъу дегенлей аслу гъалда шо «байлар – ярлылар» деген тар къалипгэ салынып сёйленип къала эди, гъатта бир тайпа ахтарывчулар шаирни инкъылапчы этип къойма аз да къалгъан эди. Озокъда, Къазакъ да оъзюню яратывчуулугъунда бир тайпа байланы

артыкъ къутургъанлыгъын-ёнкюгенлигин, ярлыланы касиплилигин эсэтмей болмагъан. Тек бу масъала шаирни яратывчулугъун уйренегенде лап алгъа чыгъарылып, къалгъанлары буса унутулуп къалма тюшеми экен дагъы? Озокъда, тюшмей! Гъар муаллим Йырчы Къазакъ, инг биринчилей, оыр пагымулу шаир, чебер сёзню оыр устасы экенин унутма тюшмей. Шо саялы да шаирни яратывчулугъуну чеберлик дюньясы дайм де муаллимни баш тергевүндө болуп турма тюше. Биз ойлашагъан күйде, адабият дарсланы юрютеген муаллим Йырчы Къазакъны асарларыны шулай чеберлик янларына аслу тергев бакъдырма тюше:

1. Шаирни асарларыны тилини къысгъалыгъына. Къазакъ аз сёз булан кёп маънаны берип болагъан шаир. Мисалгъа ону «Гетгенибиз гёкша марал гюз эди» деген шиърусундан башлапгъы эки сатырны алып къарайыкъ:

*Гетгенибиз гёкша марал гюз эди,
Элтгенибиз бир къараваш къыз эди.*

Къазакъны тилини къысгъалыгъын англамакъ учун, эки де сатырдагъы баш сёзлени орус тилге гёчюрюп къарайыкъ: гетгенибиз – то время, когда мы уходили; элтгенибиз – та, которую мы увели. Гёресиз, биринчи сёзню толу маънасын сакълап орус тилге гёчюрмек учун, орус тилде беш сёз тарыкъ, экинчи сёзге буса – дёрт.

2. Къазакъны асарларында аллитерацияланы ва ассонансланы (сатырларда бир йимик яда бир-бирине ошашлы авазланы такарланышу) уста күйде къолланагъанлыгъына. Масала, «Кант эте деп айып этме ярамас» деген шиърудан алынгъан сатырлар:

Шынжыры шылбыр, шек-шегине матайлар,

Гюнлери гюmez, жумасы йылдан оъте айлар.

Биринчи сатырда ш ва ж авазлар кёп такарланагъаны къулакъга айрыча чалына. Шаир бу ерде сойген авазын алып такарлап къоймай, шо эки де аваз мекенли бир маъна булан такарлана. Гёрюнүп турагъаны йимик, бу сатырда автор оъзю йимик туснакъланы къолларына-бутларына маталгъан шынжырланы гъакъында сёйлей. Шо суратлав булан да тамамланып къалмайлы, ол аллитерация чеберлик къуралдан пайдалана: охувчугъа (тынглавчугъа) шынжырланы тавушун да чалындыра.

3. Шаирни кёп-кёп сатырлары къанатлы сёзлеге айланып битгенлигине. Йырчы Къазакъны кёп-кёп сатырлары, айрокъда шоланы атлары ичделик, къурулуш, чеберлик янларындан алгъанда, халкъ авуз яратывчулугъубуздагъы аталар сёзлеге ва айтывлагъа парх бере, шолар тезден къанатлы сёзлеге айланып да битген. Бир нече мисаллагъа тергев бакъдырайыкъ: эренлер деген булан эр болмас; батыр булан къурдаш бол; сыйдан тюшдю ойболатлар къылавлу; кант эте деп айып этме ярамас; эренлөгө эмсиз гюнлөр кёп болур; гъакъыллы эсин ютмас; чапгъан гюн шатлыкъ этмес; не билейим, юз дынкъы бар ханланы ва шолай кёп оъзгелери.

Йырчы Къазакъны асарларында чеберлик янындан къарап тергев бакъдырма дагъы да кёп мисаллар бар. Озокъда, бир гиччирек макъаланы ичинде шоланы барын да къуршама бажарылмай. Макъалабызын ахырында, оырде айттылып гетген пикрубузну бирдагъы керен де такарлай турup, Йырчы Къазакъны яратывчулугъуна да, оъзге язывчуларыбызыныкине де тар идеология къалиiplерден къутулуп, генг күйде, айрокъда гечилеген асарлары чеберлик дюньясына аслу тергев бакъдырма тюшегенин айтма сюебиз.



Къумукъ тилден ва адабиятдан

5-11-нчи класлар учун тематика планлар

*Ерлердеги муаллимлени тилевюне гёре, журналны бу номеринден тутуп, көстекли
Супуяханым Бийболатова тизген тематика планланы берме баштайбыз.*

Автордан

Бу гёрсетив алатны мен райондагы къумукъ тилден ва адабиятдан дарс береген муаллимлеге кёмек гысапда тизгенмен. Бизин къолубузда къумукъ тилден янгыз 1983-нчюй йылда чыкъыган программалар болса тюгүл ёкъ. Насипге, 2013-нчюй йылда къумукъ адабиятдан янгы программа чыкъды. Гъар китапгъа гёре гёрсетив алатлар (методика пособиелер) бизге ёкъ.

Гъар йыл бизге гёрсетилген сагъатлар алмашынып турған. Бу янгы тематика планлар 5-11-нчи класгъа ерли тизилген. Мунда мен бары да класлагъа адабиятдан эки күйде план къургъанман: бир сагъатгъа гёре де, эки сагъатгъа гёре де. 8-нчи ва 9-нчу класлагъа буса, тилден де эки план къургъанман 1сагъат гёрсетилген школалар учун да ва 2 сагъат гёрсетилген школалар учун да.

Гъар гезик мен тематика планланы къурагъанда, ДИРО-ну жаваплы къуллукъчусу М.М. Минатуллаева ва Тахо-Години атындагы илму-ахтарыыв институттуң къумукъ тиллеге къарайгъан жаваплы къуллукъчусу З.С. Адилгереева булан да гъакълашгъанман.

Бир-нече йыллар алда чыкъыган къааралар гёре, биз журналгъа къумукъ темаланы орусчагъа гёчюрүп язабыз. О да ишибизде кёп четимликлер түвдүра. Шо четимликлени бираз сама тынчлашдырмасыюп, мен бажарылагъан темаланы

орусчагъа гёчюргенмен. Озокъда, бу ишни менден арив бажарагъанлар да ёкъ тюгүлдүр, олар да оызлени ойларын айтса, язы, къумукъ тил ва адабият дарслар учун уллу къошум болур. Адабият дарсланы программада берген сагъатларыны яртысын тайдырып къойгъан сонг, муаллимлеке къайсы темаланы алма гереклиги, къайсыларын къойма гереклиги эпизиз къыйын. Мен бир темалагъа агъамият бергенмен, аз алышынывлар этип, башгъа бирев башгъаларын алма сюер. Класдан тышда охулагъан асарлагъа гъар ким оызюю къолуну тюбюнде бар асарны алса яхши. Менде, программада гёрсетилген-леринден, бир асарлар бар, башгъа биревде башгъалары бардыр. О саялы гъар муаллим булагы масъаланы оызтөрече чече. Шо гъакъда магъа З.С. Адилгереева да айтды. Шо күйде байлавлу сёйлевге берилген темаланы да алышдырмаса ярай.

Бу янгы, экинчилей чыгъагъан тематика планлар, адабиятдан 2013 йылда чыкъыган янгы программагъа аласланып этилген.

Сизге ишигизде уьстюнлюклер, къумукъ тилин кёп сюеген къызлар ва уланлар тарбияламакъыны ёрап, Кёстек орта школаны къумукъ тилден ва адабиятдан дарс береген муаллими Бийболатова Супуяханым Гъасановна.

Тематика планлар

Къумукъ адабият 5 кл. (2с)

№	Гечилеген материал	СА Гъ АТ	З А М А Н	Так- рар- лав	Сёзлюк иши	Байлавлу сёйлевню оъсдюрюв	Къу- рал- лар
	Халкъ авуз яратывчулугъу 1-2 четверть						
1	Англатыв дарс. Ёммакъланы гъакъында англав.	1			Фольклор, уылгюлери, гъаракатчы.		
2	«Къарачач». 6-12 б.	1		Гиччи кл. геч. ёммакълар	Кажин, маң- дан, халмач, ат гёзен, айгъыр.	Къарачач- ны келпе- тин авуз- дан яра- тыв.	
3	«Къарачач» 12-19 б.	1					
4		1			Хан, вазир, пикру, дангыл.	Ханны ва вазирлени къылтыгъы гъакъда хабарлав.	
5		1			Бёдене, тор- гъай, къуюш- гъан, айын- лар, меселин- де.		
6		1				Намарт- лыкъ ёмакъда не- чик такъ- сырла-на- гъанны ай- ланасында хабарлав	



БИЗИН ТИЛ

7		1					
8		1			<i>Гюлдюрей, тёле.</i>		
9	«Тюлкю- тюлкю, тюгю алтын».	1					
10	Кл. тышда охув. У.Камал «Негер не яхши».	1					
11	« Молла Насрут- динни хабарлары». « Рассказы о Мулле Насреддине.	1			<i>Апенди, ил- бис, панар.</i>		
12	«Молла Насрут- динни хабарлары».	1					
13	Чечеген ёммакъ- лар. Загадки.	1					
14	Чечеген ёммакълар.	1					
	Авторлы ёммакълар	1					
15	А.Гъажиев «Авуз- гъа бош акъ ба- бииш». Гёнг. 1 бёлюк. «Болтливая утка».	1			<i>Солакъ-со- лакъ, орман, юлле, жаза.</i>	<i>Ёммакъны игитлери- не багъа берив.</i>	C
16	«Авузгъа бош акъ бабииш»	1					

17	<i>Б/С. Чебер охувуну уңстюнде шилев.</i>	1				
18	<i>А.Акавов «Тогъуз башлы аждагъаны оылтюрген нарт Эсенболат». 1б. «Богатырь Эсенболат, убивший девятиглавого дракона».</i>	1		<i>Гюmez, зулму, сагъ, ант, тулукъ.</i>		У
19	<i>«Тогъуз башлы аждагъаны оылтюрген нарт Эсенболат». 2 б.</i>	1				
20	<i>Б/С (байлавлу сёйлев). Эсенболатны келпетин суратлав. Р/Р. Образ Эсенболата.</i>	1				
	<i>19-нчу асрудагъы адабият</i>	1				
21	<i>Йырчы Къазакъ. «Чатакъ йыр» гёнг. «Песня пахаря».</i>	1		<i>Гененип, гёк- ге авзун тийдирмей, Сапарали къотан.</i>		Р
22	<i>«Бары да зам бар Къазакъны эсинде». «Казак ничего не забыл».</i>	1		<i>Инсабым, ясакъны, шавхал, на- март, дё- нююп, Дерия.</i>		



БИЗИН ТИЛ

23	«Эр уланлар намус салмай юрекге». Шиъруну гъакъында англав. «Настоящие мужчины не ссылаются на другого».	1			Шиъруланы гъакъында-гъы англавларыны гъакъында сёйлев	
24	Шиъруланы гъакъында-гъы англавларыны гъакъында сёйлев	1				
25	А.Магъамматов. «Илму –яшав хазнасы». «Наука – клад жизни».	1		Жайран, илму.	Шиърудагъы су-ратлавланны табыв, олагъа ба-гъа берив.	A
	Дагъыстан халкъланы асарларындан	1				T
26	Кочхюр Сайд «Мурсалхангъа на-лат болсун». «Проклятие Мурсал-хану».	1		Зулму, огъур-суз, энемжая.		L
27	«Мурсалхангъа на-лат болсун».	1			Бырынгъы девюрде халкъ гёр-ген къы йынланы гъакъында, клас ара-лыкъланы гъакъында хабарла-макъ.	
28	Гъамзат Цадаса «Яревке пайлар». «Хитрий делёж».	1		Яревке.		A
29	«Маймун ва агъач уста». «Обезьяна и столяр».	1		Чюй, сырыйн.		

30	Кл. т. ох. «Денгиз Синдибад». («Къарчыгъа» ж. бар)	1					
31	Азиз Иминагъаев «Ишчини яшаву». «Жизнь рабочего».	1			Оразлы, десятник, къысмат.	Ишчини къыйын яшавуну гъакъында хабарлав	P,
	20-нчы асрудагъы адабиятдан 3-4 четверть	1					
32	Къазияв Али. «Бёрюакъай ва Арлан им». «Волк и волкодав».	1			Тёл яйгъан, одаман.		K
33	«Бёрюакъай ва Арлан им». «Волк и волкодав».	1			Магъабатлы		A
34	А.Салаватов «Салам болсун». «Мой салам».	1					
35	«Нартлагъа». «Великанам».	1					
36	Ч/О «Салам болсун» гёнг. «Мой салам».	1			Хатыма, къагъруман		
37	Наби Ханмурзаев. «Биздей игит халкъ болурму дюньяда». «Есть ли джигиты подобные нам».	1			Ариын ярым, жаза.	Герти игитлик нечик болагъанны гъакъында лакъырлашыв оътгрив.	P

38	<i>М.- С. Ягъияев «Бир орамны игитлери». 1 б. «Герои одной улицы».</i>	1			<i>Чара, мина, минёр.</i>	<i>Ватан давнүу игитлери ни гъакъында хабарлав. Юртубузда давда болгъанланы атларын эсгерив.</i>	T
39	<i>«Бир орамны игитлери» 2 б.</i>	1					
40	<i>Кл. тышда охув. М-С. Ягъияев «Тынчтурмас». «Непоседа».</i>	1					O
41 - 42	<i>Изложение. «Давут агъав давда болгъан кюй».</i>	2					
43	<i>А.Межитов. «Юртну ийиси» Шиъруланы чебер аламатлары. «Запах села».</i>	1			<i>Гётерме, чюй, гийигот, увуз, пурж.</i>	<i>Шиърудагъы тенглешдиривлени, суратлавланны табыв.</i>	Ч
44	<i>«Ватан деген не затдыр». «Что такое Родина».</i>	1					
45	<i>И. Керимов «Игит тувгъан гюн». «День рождения героя».</i>	1			<i>Эскадрилья, землянка, крейсер, баржа адъютант, порт, разведка.</i>	<i>Советлер Союзуну игитлери ни гъакъында лакъырлашыв</i>	K
46	<i>«Игит тувгъан гюн».</i>	1					

47 - 48	<i>Сочинение «И. Керимовну асарында Ю.Акаевни келпети». «Образ Ю. Акаева в произведении И. Керимова».</i>	2					
49	<i>Кл. тышда охув. А. Межитов «Ала бузав».</i>	1					
50	<i>М.Атабаев «Ёлтабар».</i>	1			<i>Къатарбаши, хортма, Анкъакъуши, солкъ болду.</i>		A
51	<i>«Ёлтабар». Гёнг. 1б.</i>	1					
52	<i>Акъай Акъаев «Ярайгъан затмы». «Можно ли».</i>	1			<i>Мюгълем, тангламакъ, адиллик, къысмат, никру.</i>	<i>Оъз юртну тарихини гъакъында лакъырлашыв юрютюв.</i>	
53	<i>«Дюнъя». Гёнг.</i>	1			<i>Дёймек, алам, уьюр.</i>		
54	<i>А.Къазиев «Кирни», «Оымюр». «Ёж». «Жизнь».</i>	1			<i>Бурчакълаши-са, мининг, къулакъ ас.</i>		0
55	<i>M. Абуков «Арт дёгерчиклер». «Последыши».</i>	1			<i>Иргъакъ, икрам этмек, чыныкъмакъ.</i>		



БИЗИН ТИЛ

56	«Арт дёгерчиклер».	1					
57	<i>И. Асеков «Бола бусанг – болат бол», «Къушға уя гъазирлей». Гёнг. «Готовятся к встрече с птицами». «Будь как сталь».</i>	1			<i>Мюкюр</i>	<i>Шиғруну тилине тергев берип, лакъырлашыв.</i>	
58	<i>Класдан тышида охув.</i> <i>И. Асеков «Бизин юртлу одаман». «Старший чабан из нашего села».</i>	1					
59	<i>Т.Бийболатов «Вай, къазакълар яллатды».</i> <i>«Казаки сожгли».</i>	1			<i>Инараллар, сюлче, мисгин, зулму.</i>		A
	<i>Дагъыстан халкъланы адабияттарындан</i>	1					P
60	<i>А.Жафаров «Къанатлы иыртгъыч».</i> <i>«Крылатый браконьер».</i>	1			<i>Къувлуйгъан, тюйлюген, кадрлар, пейзаж.</i>		
61	<i>«Къанатлы иыртгъыч».</i>	1					

62	<i>Сочинение «Мен табиатны нечик сюемен».</i>	1				Айланадагъы табиатны, ону нечик аяма гerekни гъакъында лакъырлашыв.	
63	<i>Кл. тыида охув. А.Гъажиев «Дав болмаса шо герек».</i>	1					
64	<i>Кл. тыида охув. А.Гъажиев «Дав болмаса шо герек».</i>	1					
65	<i>Бадави Рамазанов «Сурат». Такрарлав. «Портрет». Повторение.</i>	1				Жут, марказ.	
66	<i>«Сурат».</i>	1					
67	<i>Кл. тыида охув. «Денгиз Синдибад». Экинчи сапар.</i>	1					
68	<i>Гечилген дарсланы такрарлав.</i>	1					



Тематика планлар
Къумукъ адабият 5 кл. (1с)

<i>№</i>	<i>Гечилеген материал</i>	<i>С А Гв А Т</i>	<i>З А М А Н</i>	<i>Так- пар- лав</i>	<i>Сёзлюк иши</i>	<i>Байлавлу сёйлевню оъсдюров</i>	<i>Къу- рал- лар</i>
	<i>Халкъ авуз яратывчулугъу 1-2 четверть</i>						
1	<i>Англатыв дарс. Ёммакъланы гъакъында англав.</i>	1			<i>Фольклор, уылгюлери, гъаракатчы.</i>		
2	<i>«Къараач». 6-12 б.</i>	1		<i>Гиччи кл. геч. ём акъл</i>	<i>Кажин, маң- дан, халмач, ат гёзен, айгъыр.</i>	<i>Къараач- ны келпе- тин авуз- дан яра- тыв.</i>	
3	<i>Ч/О (иебер охув) «Къараач». 13-19б.</i>	1			<i>Хан, вазир, пикру, дангыл.</i>	<i>Ханны ва вазирлени къылыгъы гъакъда хабарлав.</i>	
4	<i>«Денгиз ат». «Морской конь».</i>	1			<i>Бёдене, тор- гъай, къу- юшгъан, айынлар, ме- селинде.</i>	<i>Намарт- лыкъ ёмакъда нечик такъсыр- ла- нагъанны айланы- сында ха- барлав</i>	

5	<p><i>Кл.т. ох. «Ким-ким уяв, ким уяв». «Тюлкю- тюлкю, тюгю алтын». Вн. чт. «Кто ешё бодрый».</i></p>	1 1			<p><i>Гюлдюрей, тёле.</i></p>		
6	<p><i>Авуздан айты- лагъан Молла Насрутдинни хабарлары. Устные рассказы о Мулле Насреддине.</i></p>	1			<p><i>Апенди, ил- бис, пана.</i></p>		
7	<p><i>Чечеген ёммакълар. Загадки.</i></p>						
	<p><i>Авторлу ёммакълар</i></p>						
8	<p><i>А.Гъажиев «Авуз- гъа бош акъ ба- бииш». Гёнг. 1 бё- люк. «Болтливая утка».</i></p>	1					C
9	<p><i>А.Акавов «Тогъуз башлы аждагъаны оълтиурген нарт Эсенболат». «Богатырь Эсенболат, убивший девятивглавого дракона».</i></p>	1			<p><i>Гюmez, зул- му, сагъ, ант, тулукъ</i></p>		у
10	<p><i>Б/С (байлавлу сёй-лев). Эсенболатны келпетин сурат-лав. Р/Р. Образ Эсенболата.</i></p>	1					
	<p><i>19-нчы асрудагъы адабият</i></p>	1					



БИЗИН ТИЛ

11	<i>Йырчы Къазакъ.</i> «Чатакъ йыр» гёңг. «Песня пахаря».	1			<i>Гененип, гёкге авзун тийдирмей, Сапарали къотан.</i>		P
12	«Бары да зат бар Къазакъны эсинде», «Эр уланлар намус салмай юрекге». Шиъруну гъакъында англав. «Казак ничего не забыл», «Настоящие мужчины не ссыла- ются на другого».	1			<i>Инсабым, ясакъны, шавхал, на- март, дё- нююп, Дерия.</i>	<i>Шиъруланы гъакъында- гъы англав- ларыны гъакъында сёйлев</i>	
13	А.Магъамматов. «Илму –яшав хаз- насы». «Наука- клад жизни».	1			<i>Жайран, илму.</i>	<i>Шиъру- дагъы су- ратлавла- ны табыв, олагъа ба- гъа берив.</i>	A
	<i>Дагъыстан халкъ- ланы асарларын- дан</i>	1					T
14	<i>Кочхюр Сайд</i> «Мурсалхангъа на- лат болсун» . «Проклятие Мурсал- хану».	1			<i>Зулму, огъурсуз, энемжая.</i>	<i>Бырынгъы девюрде халкъ гёрген къы- йынланы гъакъында, клас ара- лықъланы гъакъында хабарла- макъ.</i>	L
15	<i>Гъамзам Цадаса</i> «Яревке пайлав». «Хитрый делёж».	1			<i>Яревке.</i>		A
16	<i>Кл. т. ох. «Денгиз Синдибад».</i> («Къар- чыгъы» ж.бар)	1					

17	Азиз Иминагъаев «Ишини яшаву». «Жизнь рабочего».	1			Оразлы, де- сятник, къысмат.	Ишини къыйын яшавуну гъакъында хабарлав	P
	20-нчы асрудагъы адабиятдан 3-4 четверть	1					
18	Къазияв Али. «Бёрюакъай ва Ар- лан им». «Волк и волкодав».	1			Тёл яйгъан, одаман.		K
19	А.Салаватов «Са- лам болсун». «Нартлагъа». «Ве- ликанам».	1			Магъабатлы		A
20	Ч/О «Салам болсун» гёнг. «Мой салам».	1			Хатыма, къагъруман		
21	Наби Ханмурзаев. «Биздей игит халкъ болурму дюньяда». «Есть ли джигиты подобные нам».	1			Аршин ярым, жаза.	Герти игитлик нечик бо- лагъанны гъакъында лакъырла- шыв оът- герив.	P
22	М.- С. Ягъияев «Бир орамны игитле- ри». «Герои одной ули- цы».	1			Чара, мина, минёр.	Ватан давну игитлери- ни гъа- къында ха- барлав. Юртубуз- да давда болгъанла- ны атла- рын эсге- рив.	T



БИЗИН ТИЛ

23	<i>Кл. тышида охув. М-С.Ягъияев «Тынчтурмас». «Непоседа».</i>	1					O
24	<i>А.Межитов. «Ватан деген не замдыр». Гёңг. «Юртну ийиси» Шиъруланы чебер аламатлары. «Что такое Родина», «Запах села».</i>	1			<i>Гётерме, чюй, гийигот, увуз, пуруж.</i>	<i>Шиърудагъы тенглешдиривлени, суратлавланны табыв.</i>	Ч
25	<i>И.Керимов «Игит тувгъан гюн». «День рождения героя».</i>	1			<i>Эскадрилья, землянка, крейсер, баржа адъютант, порт, разведка.</i>	<i>Совет Союзуну игитлерини гъа къында лакъырлашыв.</i>	K
26	<i>Сочинение «И. Керимовну асарында Ю.Акаевни келпети».</i>	1					
27	<i>М.Атабаев «Ёлтабар». Гёңгюндөн 1б.</i>	1			<i>Къатарбаши, хортма, Анкъакъуши, солкъ болду.</i>		A
28	<i>Акъай Акъаев «Дюнья», «Ярайгъан затмы». «Земля», «Можно ли».</i>	1			<i>Мюгълем, тангламакъ, адиллик, къысмат, никру. Дёнmek, алам, уюр.</i>	<i>Оъз юртну тарихини гъакъында лакъырлашыв юрютюв.</i>	
29	<i>А.Къазиев «Кирпи», «Оымюр». «Ёж». «Жизнь».</i>	1			<i>Бурчакълашиса, мининг, къулакъ ас.</i>		L

30	<i>М.Абуков «Арт дёгерчиклер». «Последыши».</i>	1			<i>Иргъакъ, икрам этмек, чынныкъмакъ.</i>		
31	<i>И.Асеков «Бола бусанг-болат бол», «Къушгъа уя гъазирлей». Гёнг. «Готовятся к встрече с птицами». «Будь как сталъ».</i>	1			<i>Мюкюр</i>	<i>Шиәруну тилине тергев берип, лакъырлашыв.</i>	
32	<i>Т.Бийболатов «Вай, къазакълар яллатды». «Казаки сожгли».</i>	1			<i>Инараплар, сюлче, мисгин, зулму.</i>		A
33	<i>А.Жафаров «Къанатлы ийртгъич». (къысгъача хабарлав ойтгерив). «Крылатый браконьер».</i>	1			<i>Къувлуй-гъан, тюйлюген, кадрлар, пейзаж.</i>	<i>Айланадагъы табиатны, ону нечик аяма гerekни гъакъында лакъырлашыв.</i>	P
34	<i>Бадави Рамазанов «Сурат». Такраплав. «Портрет». Повторение.</i>	1			<i>Жут, марказ.</i>		

Тематикалы планлар
Къумукъ тил. 5 кл. (2с)

№	Гечилеген материал	С А Гъ А Т	З А М А Н	Так- рап- лав	Сёзлюк иши	Байлавлу сёйлевню оъсдюрюв	
1	<i>1-2 четверть</i> <i>Тил сёйлевню аслу къуралы. Ана тилни гъакъында англав.</i> <i>Язык – важнейшее средство общения.</i> <i>Понятие</i>	1			<i>Агълюнью гъакъында лакъыр</i>	<i>С.Гъажиева «Къумукъ-пар»</i>	
2	<i>Башлапгъы кл. гечилген мат-ны тақрарлав</i> <i>Сёзнюю гесеклери ва къошма сёзлер. *</i> <i>1-2 Состав сл. Сложн. слова.</i>	5с 1		<i>Тамур, къошум-ча</i>			
3	<i>Оъзбашына къолланагъан толу маъналы ва кёмекчи тил гесеклер. *3</i> <i>Знамен.ч.р.</i> <i>Служ.ч.р.</i> <i>Атлыкъ.* 4 Сүиц-е.</i>	1		<i>Тил гесимл.</i>	<i>Жагъаланы, кикимавла-ны</i>	<i>Диктант-гъа гъазир-ленив, текстге ат салыв</i>	K
4	<i>Сыпатлыкъ.</i> <i>Санавлукъ.</i> <i>*5-6</i> <i>Прил-е .Числ-е.</i>	1			<i>Япыракъ, бичакъ. бүйрек</i>	<i>Абзар-дагъы жанланы тюслерин эсгерип ж. тизив.</i>	A

5	<i>Орунча.Ишлик. *7-8 Мест-е. Глагол.</i>	1			<i>Етти, отуз, Миллем, харап</i>	<i>Суратгъа гёре хабар тизмек бет. 17</i>	P
6	<i>Гъаллыкъ.Байла- вучлар ва послелоглар. *10 Наречие. Союзы и послелоги.</i>	1				<i>Берилген гъаллыкъ- лагъа къарышы- дашлар яз</i>	
7-8	<i>Б/С. Изложение.</i>	2					T
9	<i>Синтаксис ва пунктуация Сёз тагъымлар.*11 Словосоч-е.</i>	13с				<i>Шиъруну чебер охув.№53</i>	
10	<i>Жумла. Предл-е. *12</i>	1				<i>«Гюзню гюнрю» де- ген те- магъа со- чинение яз- макъ.</i>	O
11	<i>Хабар, сорав, чакъырыв жумла- лар. *13 Повест.,вопр., воскл.пр.</i>	1			<i>Саврусун, жийрен, жыйнакълы, ата-ана</i>	<i>Ёлдашынга яда уйдеги- гилеге кёмек этеген кююнг- ню яз.</i>	
12	<i>Жумланы баш уыюрлери. Генглешиген ва генглешиген жумлалар.* 15 Гл.чл.пр.Нераспр. и распр. пр.</i>	1		Ж..уыюрл.	<i>Къакъма, къакъа, чубурулду, чалманды</i>	<i>«Яхши ял алдыкъ». Суратгъа гёре хабар тизив</i>	Ч
13	<i>Жумланы экинчи даражалы уыюрлери. Толумлукъ. *17-18 Второст.чл.пр. Дополнение.</i>	1			<i>Ишгъынсыз, оъзоъзюне</i>	<i>Суратгъа гёре хабар тизив. Бет. 33</i>	K



БИЗИН ТИЛ

14	<i>Белгилевюч.</i> *19 <i>Определение.</i>	1					
15	<i>Тергев диктант.</i>	1					
16-17	<i>Б/С. Суратгъа гёре сочинение.</i>	2					A
18	<i>Гъал.</i> * 20 <i>Обстоятельство.</i>	1				<i>Суратгъа гёре иши. Бет. 37</i>	L
19	<i>Бир жынслы уюрлери булангъы жумлалар. Бир жынслы уюрлени арасында айырым.</i> *21 <i>Однородн.чл. пр. Запятая при одн. чл.пр-я.</i>	1				<i>Схемагъа гёре иши. №111. Суратгъа гёре 4ж. тизмек.</i>	A
20	<i>Къуршайгъан сёзлери булангъы жумлалар. Чакъырыв сёзлери булангъы жумлалар.</i> *22-23 <i>Пр-я с обобщ.сл. Обращения.</i>	1					P C
21	<i>Къошма жумлаланы гъакъында англав. Байлавучлары булангъы къошма жумлалар.</i> * 24 <i>Сложные пр-я. Сл.пр-я с союзами.</i>	1			<i>Гогаман, къаягъа, гюндюз, мангала</i>		у
22	<i>Тувра сёзни гъа къында англав. Авторну сёзюнден сонг тувра сёз. Тувра сёзни ягъында токътав белгилер.</i> *25 <i>Прямая речь. Знаки препин. при прямой речи.</i>	1				<i>Схема-лагъа гёре ж. тизив.</i>	P

23	<i>Диалогну гъакъында англав. Диалогну янында тире.</i> *26 Понятие о диалоге. Тире при диалогах.	1			Леззет, гъатта, оъгюзьемиши	Суратгъа гёре диалог тизив.	A
24	<i>Б/С. Простой ж. тюз күйде охув. Р/Р Чтение простых предл.</i>	1			Янгур, исси.		T
25	<i>Диктант</i>	1					L
26	ФОНЕТИКА, ЯЗЫВ ВА ТЮЗЬЯ-ЗЫВ <i>Сёйлевде авазланы тувулуву. Сёйлев санлар.</i> *27 Обр. звуков. Органы речи.	10с	1	Фонетика			
27	<i>Созукъ ва тутукъ авазлар.</i> *28 Гл.исогл.зв.	1			Энни, гиччи, амма, леззет.	Tan. 159	A
28	<i>Яңырав ва санғырав тутукълар.</i> *29 Звонк. и глух. согл.	1			Оъпке, алтын	«Юзюм бавда» деген темагъа хабар тизив.	P,
29 30	<i>Изложение. №171</i>	2			Нагагъ, учусукъырысыз, елтиллей		T
31	<i>Къатты ва йымышакъ тутукълар. Фонетиканы гъакъында англав.</i> *30 Мягк. и тв. согл.	1			Йыллыкъ, нече-нече, чёкюч	«Элимни гёзеллиги»-гиччирик сочинение.	A



БИЗИН ТИЛ

32	<i>Авазланы язывда гёрсетив, алфавит. Графиканы гъакъында англав.</i> <i>*31 Обозначение зв. при письме.</i> <i>Графика.</i>	1			<i>Шагъарлана атл. алф. гёре языв.</i>	B
33	<i>Ё, Е, Ю, Я гъарланны къолланышы.</i> <i>* 32</i> <i>Употр. букв Ё, Е, Ю, Я.</i>	1			<i>Тав-таш, доскъардаш, дюнья, миллион</i>	L
34	<i>Тергев диктант</i>	1				I
35	<i>3-4 четверть Ъ ва Ъ белгилени къолланышы.</i> *33 <i>Употр. букв Ъ и Ь.</i>	1			<i>Къолъяв-лукъ, таъмин, маъдан</i>	Ц
36	<i>Бувун. Ургъу.</i> <i>*34-35</i> <i>Слог. Ударение.</i>	1			<i>Савбол, гъюрмет, вакъти, энни, иннемей, сойралды</i>	A
37	<i>Созукъ авазланы гелишивю.</i> *36 <i>Сингормонизм.</i>	1			<i>Исси, топхана</i>	L
38	<i>Б/С Сочинение «Къыши»</i>	2				A
39						
40	<i>Бир-бир тутукъланы айтылышы ва язылышы.</i> *37 <i>Правопис.и произнош. некотор. согл</i>	1			<i>Бугюн, гъабижай, гъариси</i>	P,
41	<i>Сёзню фонетика якъдан чечив.</i> <i>Бет 74.</i>	1				T

42	Б/С. Яратывчупукъ диктант.	1					E
43	Лексика Лексиканы гъакъында англав. Суратгъа гёре соч-е. *38 Понятие о лексике.	10с				Суратгъа гёре иш. Бет. 77	C
44	Сёзлени кёп маъналыгъы. *39 Многозн. сл.	1				Суратларда гёргеген затланы атларын тюз кюйде къоллав.	T
45	Сёзлени тувра ва гёчюм маъналары. *40 Прямое и переносн. знач. сл.	1			Лавуллай, мазаллы, бёттёбен		L
46	Сёзлени тувра ва гёчюм маъналары. *40	1				Суратгъа гёре хабар тизив.	
47	Аваздашлар. (Омонимлер) *41	1			Гиччи-гиччи, назик-назик, тюрлю-тюрлю		
48	Аваздашлар. *41	1				Tan. №258	E
49	Маънадашлар. «Орусча-къумукъча» сёзлюкден пайдаланыыв. *42 Синонимы.	1					P.
50	Маънадашлар. *42	1				Берилген сёзлеге маън. табыв. Бет. 89	
51	Къарышыдашлар.*43 Антонимы.	1					



БИЗИН ТИЛ

52	<i>Тергев диктант.</i>	1				
53	<i>Бирикген сёз тағыымлар. *44 Фразеологический обороты</i>	1			<i>Суратгъа гёре хабар тизив.</i>	
54	<i>СЁЗ ЯРАТЫВ ВА ТЮЗЬЯЗЫВ Сёзлени яратылыву ва түрлениши. *45 Словообраз-е и правописание.</i>	7с				
55	<i>Тамур, тюп ва къошумча. *46 Корень, основа, окончание.</i>	1			<i>Ари-бери</i>	
56	<i>Къардаш сёзлер. Сёз яратагъан къошумчалар. *47 Родств. сл. Суффиксы.</i>	1				
57	<i>Б/С. Табиатгъа къарап, авуздан хабар тизив. Устное сочинение о природе.</i>	1				
58	<i>Сёз түрлендиреген къошумчалар. * 46 Окончания.</i>	1			<i>Мююз. гюмелек, акътерек</i>	<i>Тан. 325</i>
59	<i>Тамурланы ва тюплени тюз язылышы. *48 Правописание корн. и основ.</i>	1			<i>Татли</i>	
60	<i>Эки къабат тутукъ гелеген сёзлени тюз язылышы. Сёзлени сатырдан сатыргъа гёчюрөв. * 50 Прав. слов с удвоенн. согл. Перенос сл.</i>	1			<i>Гъатта, юлле. Бюкюрейген, бюрюшген</i>	<i>«Мени анам» деген гич- чилик соч-е языв.</i>

61	МОРФОЛГИЯ ВА ТЮЗЬЯЗЫВ Оъзбашина къолланагъан толу маъналы ва кёмекчи тил гесимлер. *52 Знамен. и служ. части речи.	1с			Уъягълю, къуллукъ		
62	АТЛЫКЪ Атлыкъны маънасы ва аслу грамматика белгилери. *53 Существительное.	1		Атл.	Элли, абур		Су- рат- лар
63	Хас ва жынс атлыкълар. *54 Собств. и нарицат. сущ.	1			Акъчалыкъ	Хас атл. булангъы ж. тизив.	Кар- точ- ка- лар
64	Атлыкъны жумлада къуллугъу. *55 Роль сущ. в пр.	1				Tan. 373	Таб- ли- ца
65	Атлыкъ чакъырывну къуллугъунда. *56 Сущ. в роли обращений.	1			Акътуякъ		
66	Б/С. Атлыкъны чечив.	1					
67	Тергев диктант.	1					
68	Такрарлав.	1					



3. Багыавова,
Каспийск шағырдағы 3 номерли МБОУ

Сёзлюк иш – шағыар школаларда гъар ана тил дарсны аслу гесеги

Дюнъяланы ачагъан
Алтын ачғыч ана тил.
Адам болмагъа сюйсенг,
Башлап ана тилни бил!

M. Атабаев

Къумукъ тил – лап арив, енгил, къонгуравлу тиллени бириди деп эсиме геле. Ана тилибизде толу күйде ойларыбызыны, пикруларыбызыны айтып ва язып болагъаныбыз уллу яхшылыкъ.

Адамны тил байлығы ону лексиканы къоллап билегенин гөрсете. Тил байлығыны үстүндө ишлеп турагъан адам ана тилде оюн, гъалын, пикрусун рагъат, англавлу, енгил, чебер күйде айтып болажакъ.

Сёз – тилни аслу маңналы гесеги.

Бизге белгили күйде, биринчи класға гелген охувчуланы орус тил байлығыны ана тил булан тенглешдиргенде хыйлы артыкъ. Ана тилинде сёйлеп болагъанлары да кёп аз. Бир-бир гезиклерде ана тилинде англамайғанлары да ёлугъя. Ана тил дарс берив-чюнү аслу мурады – биринчи класға гелген яшланы ана тил байлығыны оғысдюремек ва йылдан-йылға ону артдырмакъ. Янгыз авуз янындан тюгюл, ону языв янына да бир тенг ағамият бермекни гайын этмек.

Янгы сёзлени уйренив белгили бир ёрукъда юрютюлсе, ағамиятлы болар. Шо себепден охувчулар уйренеген сёзлени тюз ва толу англасын учун, ишни муаллим оғзю ёлбашчылыкъ этип юрютме герек.

Шағыар школаларда сёзлюк ишни аслу мурады:

1) сёз байлығыны артдырыв, демек охувчуланы сёйлев тилине болгъан чакъы кёп сёзлени гийирмек, оланы сёз тагъымларда жумлаларда къоллап бажармакъ;

2) къумукъ тилге хас гъарпланы язылы-

шын уйренив, такраrlав ва беклешди-
рив;

3) сёзлерде ёлугъагъан орфограммала-
ны беклешдирив.

Оырде эсгерилген муратланы гёз алгъа тутуп, гъар ана тил дарсларда сёзлюк иш оыт-
геремен. Мисал учун, биринчи класда сёзлюк ишни оытгерме болагъан күйлери:

1) Башлап бувунлар досқагъа языла, сонг яшлар ахырына бир гъарп къошуп янгы сёз-
лер эти.

- Къой, къоз, къол;
- къыз, къыл, къыр, къыс;
- къаш, къар, къал;
- къум, къуш, къур.

2) Сёзлер орусча охула, яшлар буса ону къумукъчагъа таржума этип яза. Мисал:

- голова – баш;
- камень – таш;
- бровь – къаш.

3) Берилген сёзлер булан сёз тагъымлар къуралар.

Экинчи класда оытгерме болагъан сёзлюк ишлени бирлери:

1) Е, ё, ю, я гъарпланы язылышина тергев бере туруп, сёзлюк иш оытгерив.

Къумукъ тилде сёзню ортасында гелеген [оъ], [уъ] авазланы ё ю гъарплар гөрсетегенин англатмакъ. Сатырланы бир-эки сёз булан давам этмек. Мисал:

- ел – терек
- ёл – тёшек
- юз – кюрек
- яз, ят – яман

2) Къ гъарпны сёзде тюрлю-тюрлю ерлер-де къолланышына агъамият бермек, оланы гъариси булан сёзтагъымлар, жумлалар къурмакъ. Мисал:

- Къыш, къазан, сакъат, бакъа, балакъ.

- Къумукъ, къалакъ, къабакъ.

3) Нг гъарпны сёзде язылыши ва къолланышы. Гъар сёзге гёре къыйышагъан суратны къоллайман ва олар булан жумлалар къурала. Нг гъарп сёзню башында бирде ёлукъ-майгъаны аян этиле. Мисал: Зенг, тенг, генг, енг, онг, тангала, денгиз, янгур, янгыз.

3-4 класларда ойтгерме болагъан сёзлюк ишлени бирлери.

Эринли ва эринсиз созукъланы такрарлав вакхендидирив.

<i>I эринли</i>	<i>II эринсиз</i>
<i>узун</i>	<i>таракъ</i>
<i>сокъур</i>	<i>къалакъ</i>
<i>уллу</i>	<i>балыкъ</i>
<i>окъ</i>	<i>къашыкъ</i>
<i>овъюре</i>	
<i>ун</i>	

Берилген сёzlени мualлим айта, яшлар яза. Бу ишни ойтегенде инче ва созукъ гъарпланы язылышин беклешдирмек учун бир-бир сёзню гелишлеге гёре тюрлendirme ярай. Тапкъырлагъа инче ва къалын созукълар ёлугъагъан сёзлер язма ва олар булан жумлалар къурма бола.

Тил гесимлени такрарламакъ учун ва сёzлени маънасына гёре тюз къоллама уйретмек муратда шулай сёзлюк иш юротме ярай.

Бир башлап сёzлени эки тапкъыргъа тил гесимлеге гёре яза. Берилген атлыкъылагъа къыйышагъан ишликлени гёрсетелер.

<i>Не?</i>	<i>Не эте?</i>
<i>янгур</i>	<i>йылай</i>
<i>ел</i>	<i>охуй</i>
<i>къуш</i>	<i>ява</i>
<i>охувчу</i>	<i>уьфюре</i>
<i>яши</i>	<i>уча</i>
<i>йылан</i>	<i>улуй</i>
<i>ит</i>	<i>оттай</i>
<i>бёрю</i>	<i>сойкеле</i>
<i>ат</i>	<i>гъаптай</i>

Мисал:

5-7 класларда ойтеген сёзлюк ишни ва сёзлюк диктантны темалагъа гёре, къ, гъ, гь, нг, уь, оь, ж, в гъарплар ёлугъагъан сёzлени къоллап ойтгерме ярай.

- – чалмюк сёzлени язылыши;
- – къошма сёzлени язылыши;
- – къыр ва уй гъайванланы атларыны язылыши;
- – тереклени атларыны язылыши;
- – чечеклени атларыны язылыши;
- – савут-саба булан байлавлу сёzлени язылыши;
- – адамланы санларына байлавлу сёзлер;
- – къаршыдаш сёзлер;
- – тюслени язылыши;
- – жуманы гюнлери ва ш. б.

Бир сёзден, ону гъарпларын къоллап, янгы сёзлер этме бола. Мисал: Такъалыбакъа (такъа, бакъа, акъ, къал, къыбла, балыкъ, къабакъ.).

Доскаға бир сёз языла, охувчулар ону ахырынчы гъарпны гелеген сёз ойлашалар. Мисал: тюкен – намус – сари – иш – шаптал – лай – йылан – низам ва. ш. б.

Эсгерилген къайдаланы гъар дарсда янгы дарсгъа гёчгүнчө, 8-10 минутну ичинде ойтгерсе асувлу. Гечилген темаланы такрарламакъ муратда язылгъан диктантдан бир сёзню алыш, жумла къуруп, синтаксис разбор этме, тил гесимлени гызы тартып айырма бола. Диктантдан бир сёзнию алыш, аваз ва сёзнию тизим ягъындан чечивион этмек де шағыр школаны охувчулары учун пайдалы.

Ойрде эсгерилип гетген сёзлюк ишни тюрлю къайдалары охувчуланы тил байлыгъын ойсюрмө, тюз языв къайдаланы беклешдирмек кёмек эте.



Мадина ГЬАДИСОВА,
Эрпели орта ишколаны муаллими.

Авуз ва языв тиллени башгъалыкълары

Ана тил дарсланы аслу борчларындан бириси – охувчуланы авуз ва языв тилин оьсдюрмек. Ана тил дарсланы береген муаллимлени уьстюне бу ерде бек жаваплы борчлар тюше. Тил ва охув дарсларда, башгъа предметлерден ойттерилеген дарслардан эсе артыкъ болуп, сёз яшланы ойлашмагъа уйретеген къурал гъисапда къоллана.

Охувчуланы тилин оьсдюрюн юн авуряны гъар не заманда да ана тил дарсланы юрютеген муаллимлеке тапшурулагъаны тамаша тюгюл. Ону булан бирче шо муаллимлени алдында бирдагъы масъала токътай: о да школада тилни тазалыгъы, гёzelлиги учун юрюлеген ишни башында турмакъ.

Авуз ва языв тиллени алдына салынагъан шулай бир талап бар: о да не къайдада сюйсе айтылсын, охувчуланы гъар бир сёзю маъналы, ачыкъ, герти, инандырагъян, къыйышывлу, адабият норма якъдан тюз, аваз якъдан айтылышы аян болмакъ.

Яшланы тилин оьсдюрювге байлавлу талапланы кёбюсю авуз тилге де, языв тилге де байлавлу.

Охувчуланы тилин оьсдюрюв ишни тюз къурмакъ учун муаллим авуз ва языв тилни бир-бирине ошайгъанлыгъын, бир-биринден башгъалыгъын ва оланы бир-бири булангъы аралыгъын билмеге герек. Биз айтма сюеген оюбузну башгъалагъа билдирмек учун авуз тилден де, языв тилден де пайдаланбыз. Охувчуланы авуз тилини сёзлюгю бай болгъан сайын, адатлы гъалда, оланы языв ти-лини сёзлюгю де бай бола.

Ана тилде сёзлени айтылагъан ва язылагъан кююнью башгъалыкълары да бар. Биз билеген кюиде, авуз тилни эшитебиз, языв тилни буса гёrebиз. Авуз тилден пайдалана гъланда, бизин булан сёйлейген белгили адам бола, языв тилден пайдалана гъланда, адамны пикрусу чалт ва эркин ишлей. Языв тилден пайдалана гъланда буса, пикрубузну токътматмагъа тюше, пикру язывидан оьтюп гетме болмай. Язмакъ учун заман тарыкълы бола. Авуз тил языв тилден эсе къысгъа бола.

Языв тилде пикрубузну толу кюиде бермек учун, сёзлерден пайдаланмагъа тюше. Шо саялы да, языв тилде пикруну толу кюиде генглешдирип англатмагъа тарыкълы бола. Шо пикрубузну яхши англамакъ учун, языв тилде жумлалар белгили кюиде къурулма герек.

Ана тил дарсларда муаллим авуз тилге де, языв тилге де бир йимик тергев берме герек. Охувчуланы тилин оьсдюрюв ишде авуз тилде, языв тил де бир-бирине кёмек эте.

Масала, суратланы, жумлаланы уьстюнде ишлевню яда сёйлешивню алайыкъ. Бу ишлерде охувчулар булан башлап авуз иш, сонг языв иш юрюле.

Муаллим охувчуланы тюз сёйлевюн, сёзлени адаби-ят формаларына гёре айтывуна, языв тилде буса сёзлени тюз язылышина айрыча лап гючлю тергев бермеге борчлу. Охувчуланы языв ишлерини маъна янларын тергеп, сёзлени тюз къоллап, жумлаланы тюз къуруп ва оъзлени оюн тюз кюиде гезиги булан тизип уйретмеге герек. Бу ишни юрютгенде, сёзлени тюз язылышин гъар заман гёз алгъа гелтирип ишлемеге тюше. Охувчуланы тюз языв мердешлери беклешген сайын, авуз тил булан бирче, языв тилни мердешлери де беклеше.

Охувчуланы тилин оьсдюрюв ишде муаллимлени ти-чи уллу роль ойнай. Шо саялы да муаллим дарсда охувчулагъа материалны англатагъанда, соравлар берегенде, оъзюню муаллимни тили охувчулагъа ульгю болма герек. Сонг да изложение учун алынгъян текстлер, сочинениелени темалары, сёзлюк лексика ишлер ва башгъалары да муаллимден шолай жаваплыкъыны талап эте. Яшлар булангъы ишлер учун идея-маъна янлары осал текстлер сайланмакъдан зараллы зат бир де болмас. Чебер сёзню усталарыны, халкъ авуз яратывчулугъуну асарлары – яшланы ана тилине уйретивде бек тизив материал.

Эльмира Исаева

Ольтемииш школаны мұаллими

Абусупиянда къонакълықъда

6-нчы класда адабият дарсны конспекті

*Инсанға арив къылышыдан артық
ярашагъан зат ёкъдур.
А.Акаев.*

Дарсгъа тарыкъ алатлар: шаирни портрети, журналлар, газетлер ва башгъа тюрлю материаллар; плакатларда шулай сатырлар: «Охув - билим булагъы, билим - оымор чырагъы»

«Илму – биттейген хазна».

«Адамлықъ недир – англамакъ, аз сёйлеп, көп тынгламакъ».

«Яшасын, яшасын мактапларыбыз!»

Н.Ханмурзаев.

«Илму булан эденни билмеге борчлудур гиши,

Гъеч тюзелмей къалмагъан илмулу гишини иши».

Н.Батырмурзаев

Дарсны муратлары:

1. М.-А.Османовну гъакъындагъы яшланы билимлерин, А. Акаевни шиъруларындан бир-бир гесеклени аян этив. А. Акаевни яратывчулугъун мекенли күйде англатьв, ону «поэзия бавуна» бармакъ, «асил емишлиеринден» пайдаланмакъ.

2. Яшлагъа оъзбашына билим алдыр макъ, пайдалы маълумат топлав бажарывлукъларын оъсдюрмек.

3. Яшланы чебер күлтурасын артдырыв, чебер асарланы охума уйретип, чебер сезинию аламатларын тарбияламакъ.

Къурулушуна гёре дарс – къошулчан.

Дарсны планы:

Къурум мюгълет.

Гетген дарсны сорав. М. Османовну

«Гёгюрчюнлени арзасы» деген шиърусуну идея маънасын ачыкъ этмек.

Янгы дарсны англатьв. А. Акаевни яшаву ва яратывчулугъу булан таныш этмек, «Къызызъяшланы тилинден бир шикаят»

деген шиърусуну идея маънаси.

Янгы дарсны беклешдирив (тюрлю-тюрлю тапшуурвлар, оюнлар, гиччирек сцена-рий...)

Натижа чыгъарыв.

Уйге иш.

Дарсны барышы:

Къурум мюгълет.

Гюн яхшы болсун, яшлар!

Гюн яхшы болсун, мұаллим!

Биз бугюнгю дарсда М. Османовну «Гёгюрчюнлени арзасы» деген шиърусуну идея маънасын ачыкъ этип, Абусупиян Акаевни поэзия бавуна барып, яшав ва яратывчулукъ ёлу булан таныш болуп, инкъылапдан алда къатын-къызланы охумагъа ихтиярлары болмагъанны билежекбиз; яшавда инсанлагъа бары затдан алда билим ва тарбия тарыкъынды англашакъбыз.

Уйге ишни сорав.

Уйге берилген иш токъташдырыла. (М. Османовну «Гёгюрчюнлени арзасы» деген шиърусу, шаирни яратывчулугъундан аслу маълуматланы эсге алмакъ)

Биографиясындан соравлар:

– Яшлар, М. Османов кимдир? Ону гъакъында сиз не билесиз?



– М.Османов – къумукъланы айтылгъан шаири, ярыкъландырывчусу (сёзлюк ишге тергев бериле – просветитель)

– Ол къайсы юртда ва неченчи йылда тувгъан?

– М. Османов 1838-нчи йылда Хасавюрт районну Яхсай юртунда тувгъан.

– М.Османов не ерде охугъан, къайда ишлеген?

– Петербург шагъарда охугъан, университетде ишлеген.

– Къумукъ адабиятгъа нечик къошум этген?

– Къумукъланы ва ногъайланы йырларын жыйып, 1883-нчю йылда китап этип, басмадан чыгъаргъан.

– Нечик асарлар язгъан?

– «Шавхалны къаласы», «Яхсайланы арзлары», «Гюлкъызы», «Гёгюрчюнлени арзасы» ва башгъалары.

Гёрюнүштө (сценарийге) къарайбыз. Ата гёгюрчюн – Арсланханов М.-С., ана гёгюрчюн – Баматханова Марина. Яшланы къушлагъа гёре этилген костюмлери де бар. (Ата гёгюрчюн ана гёгюрчюн булан бирче арз этген еринден башлана).

1-нчи яш. Уйлеринг арив гёрюп, гелген эдик къонакъгъа.

Уя да этдик башында, гет деген гиши ёкъегъа.

2-нчи яш. Паракат яшай эдик, женнет эди къалабыз.

Къаланы къалкъысында уя толгъан бала-быз.

1-нчи яш. Балаларыбыз йылай, сен ачмайсан эшикни.

Алагъожа къап булан бегетгенсен тешинки.

2-нчи яш. Нечакъы арив буса да, ташлайыкъ къалабызын.

Сёз беребиз – гетербиз, сагъа къалсын къалалар.

1-нчи яш. Шулай ачдан оылтурме, къа-

натлансын балалар.

Яшлар ичинде йылап, биз мунда къырда янып...

2-нчи яш. Акъ гёгюрчюн, гёк гёюрчюн, къувлума, ала-къула.

Арзагъа къол салгъанлар бары да элли бола.

Булагъа тынглагъан сонг, Гъамзат къатты жавап бере:

(Темирханов С. Гъамзатны ролюнда).

Къонакъ деп, абур берип, къойгъан эдим уйй этме.

Уюмню бузуп битмей, къабул тюгюлсюз гетме,

Ичин похлап битгенсиз, уьстюн де толтурасызы.

Къуваласа, гетмейсиз, яс тутуп олтурасызы.

Хыйлы гюн къарап турдум, арив ёлда гетсин деп.

Тутуп, байлап йибердим, сюйген затын этсин деп.

Уыч керен болжал салдыым, чыгъып тайып гетсин деп,

Ятып турду къалкъымда гъар не этсе, этсин деп...

Муаллим яшлагъа соравлар бере:

– Гёрюнүштө къарагъан сонг, сиз не айтма боласыз?

Яшлар айталар.

– Гъамзат нечик адам экенни билдик?

Яшлар айталар.

– Шолай ишлени этеген адамлагъа биз нечик адамлар деп айтабыз?

Яшлар айталар.

– Шу ерде нечик айтывлар къоллама бола?

Яшлар айталар:

– «Инсангъа арив къылыкъдан артыкъ ярашагъан зат ёкъдур»

«Къылыкъ – адамланы адам этип, гъайванлардан айырагъан затдыр...»

Муаллим. – Яшлар, тюз айтдыгъыз. Булай ойланы биз узатма болабыз.



Яхшы, асил – жанлар (гёгюрчюнлер)
Яман, намарт – Гъамзат йимик адамлар.
Ол яман къылышты, илмусуз адам зекнни
билидик.

Эдепликни, билимни, асилликни гъакъында Абусупиянны поэзия бавунда узатабаыз.

Бизге бираз къыйын сөзлер де ёлугъажакъ, эсгиленген сөзлөгө тергев беригиз.

Сөзлюк иш:

шикаят – кагъыз

ярыкъладырывчы - просветитель

марипат - билим, илму

тавпикъ, мадат – кёмек

чомартлыкъ – щедрость

таржумачы – переводчик

эдеп, къылышты - воспитанность

А. Акаевни шиърларындан бир нече яштъя гёнгюндөн уйренесин деп гесеклер берилген эди.

Янгы дарсны англатыв.

Интерактивный доскада (слайдларда) Абусупиянны сураты, юртну гёрюньюшо, баву герсетиле; бавдагъы къушланы түрлю чарнавлары аста эшитиле.

Ауди-дискден сёйлене (яда оъзю муаллим хабарлай):

– Тёбен Къазаныш деген юртда бир ағылю яшай болгъан. Оланы лап да гиччи уланы Абусупиян болгъан. Ол 1872-нчи йылда тувгъан. Абусупиян гиччиден тутуп охумагъа, ишлемеге, гъар затны билмеге сюеген яш болгъан.

Билимин, англавун артдырмакъ учун, ол Жюнгютейге, Темирханшурагъа, Согратлиге, Таргъугъа, Къырымгъа, Къазангъа, Түркиягъа ва башгъа ерлөгө барып, гъакъыл-хазна жыйып, ата юртуна къайтгъан болгъан.

Абусупиян гъар түрлю ерлерден алыш гелген ойларын тереклер этип поэзия бавунда орната.

Бир тереклеринде адабият емишлер бише, бирлеринде буса физика, астрономия,

медицина, география емишлер бише.

Китапларына сёз бериле: (Китаплары болуп сёйлей яшлар, олар айта)

1. «Гъазир дарман» деген китабында медицинадан бек багъалы маълуматлар бар.

2. «Вилаятима савгъат» тарихден, географиядан ва арап тилни грамматикасындан маълуматлар бере.

3. «Къылышты китабы» яхшы ва яман хасиятланы гъакъында хабарлай.

4. «Илму гъисап» буса санавланы къошма, тайдырма, артдырма, ульешме, масъала-ланы чечме уйрете.

Муаллим.

– Адамны яшаву мактапдан башлана.

Абусупиян Акаев биринчилей дюнья илмуланды уйренеген мактап ача.

«Яшланы тюз тарбиялайгъан, билимли ва гъакъыллы болма уйретеген ер – мактап», - деп эсгере Абусупиян. Шо саялы да ол яшлар учун терек орната – «Мактапгъа бар, мактапгъа» деген. Шо терекни емишлеринден пайдалангъан яшлар булагай айта:

Яшлар йырлай (макъам согъула):

1-нчи яш. Ананг сюонгюр, балам, ал чыкъолунга къалам,

Сукълансын сагъа алам - мактапгъа бар, мактапгъа!

2-нчи яш. Мактапгъа сал юретинг, илму болсун герегинг,

Нюрленсин кёкюрегинг – мактапгъа бар, мактапгъа!

1-нчи яш. Шатлыкъ этейим мен де, сен мактапдан гелгенде,

Миллетинг гёзю сенде – мактапгъа бар, мактапгъа!

2-нчи яш. Миллетинг къарай сагъа, кёп затлар ёрай сагъа,

Мактапдан сорай сагъа - мактапгъа бар, мактапгъа!

1-нчи яш. Мактап - илму булагъы, талай-сызлар – йырагъы,

Янсын миллет чырагъы – мактапгъа бар,



мактапгъя!

2-нчи яш. Эт чи миллетни гъайын, оърленсин гъар гюн сайын,

Эшит Ватан гъарайын – мактапгъя бар, мактапгъя!

1-нчи яш. Тынгла, балам, ананга, юрю мактап хананга,

Ярыкъ бер айлананга - мактапгъя бар, мактапгъя!

Муаллим.

– Биз, яшланы къоюп, гелейик Абусупиянгъа. Абусупиян билимни, культураны агъамиятын бары халкъгъа англатмагъа сюе. Ол къатын-къызланы насибин якълай, олар гёрген зулмугъа къаршы чыгъа. Къызлар амалсыз экенни, охумагъа, билим алмагъа, бир затгъа да ихтияры ёкъну билеген Абусупиян оланы билимини, насибини гъайын эте.

Бир гюн эртен тант булан туруп терек орната. Ону аты – «Къызъашланы тилинден бир шикаят».

Къызлар шиърудан гесеклени гёнгюндөн охуйлар. (8 къыз).

Муаллим.

Гече таба охугъан ва охумагъан къызлар нечик болагъанны «Эки къурдаш» деген гиччи сценарииден таба билежекбиз («Языкъ Гъабибат» деген повестден алынгъан Гъабибатны ва Абидатны келпетлерин гёрсете, олар охувну гъакъында лакъыр этеген вакътиси)

Соравлагъа гёре лакъырлашыв юрюле. Яшлар къызланы келпетлерин ачалар: къайсы тюз ойлаша, къайсы дурус ойлашмайгъаны чечиле. Гъалиги яшав булан тенглешдирив иш юрюле.

Тарбия булан бирче билим де бола яда билим, илму булан къылыкъ да янаша токътай.

Н. Батырмурзаев шо гъакъда кёп арив айтгъян:

Илму булан эдепни билмеге борчлудур

гиши,

Гъеч тюзелмей къалмагъан илмулу гиши-ни иши.

Охугъан, яшавда къасткъылгъан, эдепли ёллардан юрюген къызлар Барият Муратова йимик оърлюклеге етишер.

Бу йыл сагънаны бийкеси, бизин сёнмей-ген юлдузубуз Барият Муратова тувгъанлы 100 йыл бола. Ол, канзиден канзиге оърлене туруп, яшавну тюрлю-тюрлю толкъунларындан оьте туруп, оърлюклеге етишген.

Къатынлар билимсиз, касбусуз къалма-сын. Биз охумасакъ, тикме, аш этме, авругъ-ангъа дарман берме... билебизми? Билмей-биз.

Сизге яшавда, охувугъузда уьстюнлю-клер ёрайман.

Къызланы да къояйыкъ, гелейик Абусупиянгъа.

Заман гете, адамлар охувну пайдасын ан-глама башлай. Абусупиян шулар булан та-мамланып къалмай. Ол кёп ишлей, сёзлю-клер чыгъара, къумукъ тилге башгъа тил-лерден асарланы таржума эте...

Абусупиян бирдагъы терек орната – «Къылыкъ китап» деген.

Бу терекни емишлерин сююп ашагъанлар яхшы къылыкълы бола.

Беклешдирив.

Гелигиз, биз мактапгъа барагъан яшлагъа тергев берейик. Олар нечикдир, билейик.

1. Эки яш мактапгъа бара. Бири арив гийинген, саламат күйде юрюй, бириси яш буса атыла, ёлдашына тюрте...

– Не айтма боласыз? Къайсы яш оъзюн арив тутуп бажара?

Яшлар ойларын айталар.

2. Мактапгъа барагъан яшланы бириси-ни сумкасы (портфели) бар, бирисини буса бир китабы да, 2-3 тетрады да гёрюне.

– Не айтма боласыз?

Яшлар ойларын айталар.

Компьютерден тапшурув.



Берилген сёзлени ичинден яхши
къылыкъланы айырмакъ.
Яхши къылыкъ

Саламатлыкъ.
Оыктемсизлик.
Къоркъачлыкъ.
Тазалыкъ.
Кёмеклешив.
Эринчеклик.

Айтывну узатмакъ учун къайсы тарыкъдыр?

1. Аз сёйле, -----

Яхши бол. Кёп тынгла. Яхши ишле.

2. Яхши сёз -----

Баш азыгъы. Къатты этер. Жан азыгъы
Тюз жаваплар бердигиз. Гъали китапла-
рыгъызын ачыгъыз, шиърулардан бир-бир
гесеклени охуп, къапиясына тергев берейик,
эпитетлени табайыкъ.

Физмюгълет. Яшлар, еригизден туругъуз,
гёзлеригизни юмугъуз, къолларыгъызын
астаракъ гётеригиз, сонг тюшюрюгюз; бир-
дагъы гётеригиз, бизге багъып оъзю Абусу-
пиян геле. Ол сизден сюоне, неге тюгюл де
сиз арив охуп билесиз, эдепли яшларсыз,
компьютерлерден ишлейгенигизни, днев-
никдеги яхши къыйматларыгъызын да гёр-
ген. Абусупиян бек шат. Гъали гёзлеригизни
ачыгъыз. Гертиден де, Абусупиян Акаев би-
зин булан, ол бизге къарап турду, ону умут-
лары яшавгъа чыкъгъан.

Халкъ учун чалышгъан шаирибизни,
алимибизни артдагъы йылларында биревлер
ону гъакъындан ялябып, темиркъазыкъ
якълагъа туснакъгъа сюргүн этелер. Арт-
дагъы кагъызы ону Пермски вилаятдан
Котлас шагъарны ювугъундагъы лагерден.

**А. Акаевге багъышлап язгъан
шиърусун муаллим Исаева Э.Х. охуй:**
Бузлар япгъан Сибир эллэр болса да,
Исив бердинг сендей ятгъан халкълагъа.
Чакъсыз тюшген умутсуз юреклөгө
Бажарадынг умутларын якъмагъа.

Ругъ байлыгъынг сёндюрмединг шонда
да,

Шатлыкъ булан ругъ берединг юзюне.
Пайхамаргъа тынглайгъандай инсанлар,
Тынглай эди гъар калиманг, сёзюнге.

Ахыр гюнюнг билегендей гелгенин
Ясин алма суралары охулду.
Айландырып алды туснакъ ағылюлер,
Эки гёзюнг асталаша юмулду.

Сагъа болгъан бу оълюмге къарсалап,
Кюллю халкъны гёзлери де яшланды.
Гъарайгъа да, гъурайгъа да къарамай,
Нажжаслары элтип сени ташлады.

**Б. Магъамматовну поэмасындан
гесек охула.**

Биз уйге къайтма тарыкъбыз. Онгмай-
оъсмей Гъамзат йимик ялябагъан намарт-
лар къалсын, онгуп-оъсюп халкъны юрекле-
ринде яхшылар, А. Акаев йимиклер къал-
сын!

Рефлексия.

– Яшлар, биз бугюнгю дарсда кимни
гъакъында сейледик?

Яшлар айталарап.

– А.Акаев кимдир, нечик асарлар язгъан?

Бавунда нечик тереклер орнатгъан?

Яшлар айталарап.

– Билимни, къылыкъланы гъакъында
нечик айтывлар, къанатлы сёзлер бар?

Яшлар айталарап.

– Яшлар, дарсны къайсы ерин ушатдыгъы-
зы? Сизге не ерде четимликлер ёлукъду?

Яшлар айталарап.

– Сизге мен разимен, яхши ортакъчи-
лыкъ этгенлөгө емишлөр бериле, 5 болса –
«5», 4 болса- «4».

Уйге иш.

А. Акаевни яшаву ва яратывчулугъу,
шиърулардан гесеклени гёнгюндөн уйрен-
мек, илмуну, яхши къылыкъланы гъакъында
айтывлар язмакъ.



ТЕСТ-тапшурув

1. Лексикология грамматиканы къайсы бёлюгюдюр?

- А – авазланы ва гъарпланы уйретеген.
Б – тилни сёз байлыгъын уйретеген.
В – тил гесимлени уйретеген.

2. Шу сёзлени жутлары къайды гире?

Уллу-гиччи
Бийик-алаша
Семиз-арыкъ.

- А – маънадаш сёзлер.
Б – къаршыдаш сёзлер.
В – аваздаш сёзлер.

3. Шу жутлар къайды гире?

Асил – арив – гёзел.
Юрт – абзар – ожакъ.
А – маънадаш сёзлерю
Б – къаршыдаш сёзлер.
В – аваздаш сёзлер.

4. Шусёзлеге не сёзлер деп айтыла?

Авур хасият, асил адам, къатты юрек.
А – Кёп маъналы сёзлер.
Б – Фразеология.
В – Маънадаш сёзлер.

5. Авазлар ва гъарплар грамматиканы къайсы бёлюгюнде уйретиле?

- А – Фонетика.
Б – Морфология.
В – Синтаксис.

6. Шу текстдеги къутгъарылгъан гъарпланы яза туруп гетигиз.

Г...зню алам...лары г...рюнюп тұра.
Ағъ...лықълар, орма...лар түрлю-түрлю тюслеге бо...лгъан. Яп...ракъланы бирлери сар...айгъан, бирлери къыз...ргъан, бирлери буса ...шыл к...юнде къалы... тұра. Къарап гёзүнт тоймай. Бу гёзе...икни неча...ы пагымулу художник де бар кю...нде сура...лап болмас.

7. Къумукъ тилде нече созукъ аваз бар?

- А – 9
Б – 8
В – 10.

8. Къалын созукълар нече бар?

- А – 5.
Б – 4
В – 3.

9. Шу сыйырада эки аваз гёрсетеген гъарпланы гёрсетигиз.

А, О, У, И, Е, Ё, Ю, Я.

10. Къумукъ алфавитде нече гъарп бар?

- А – 36
Б – 37
В – 38.

Тизгенлер **Маржан Абукова, Женнет Даниялова**, Хасавюрт педагогика колледжни дарс беривчюлери.

*Раиса Ногаева,
Хамаматюрт орта школа.*

Класдан тышдагъы ачыкъ дарс

Темасы: АНА ТИЛИМ КЪОЛДАГЪЫ БАЛ КЪАРТЫГЪЫМ.

Мурады:

1. Гечилген дарсланы такрарламакъ, яшланы билимлерин беклешдирмек ва то-лумлашдырмакъ, ана тилни гёzelлигин гёр-сетмек.
2. Охувчуланы сёз байлыгъын, терге-вюн артдырмакъ; эсин оьсдюрмек, тюзьязы-вун болдурмакъ, тилге югорюк этмек.
3. Билим алывгъа талпынывну, алдын-лыкъгъа гъасиретликни, бир-биревге абуру-сий этивню, ана тилине сююнно тарбияла-макъ.

Къураллар: карточкалар, таблицалар, гъарплар, доска, китаплар, суратлар.

ОЮННУ БАРЫШЫ:

I Гиришив.

Ана тилим- жан азыгъым, чырагъым.

Мен шо тилде уйренгенмен сёйлеме.

Ана десем гүлдей ачып юргим,
Юрек йырлай, тюшмей ону кюйлеме.

II Аслу бёлюк.

1. Гиришив лакъыр.

Бугюн биз башлайбыз тамаша дарсны.

Кюлкю, кюрлюк булан ёяйыкъ чарсны.

Эки команда, бир-бирине тенг,

Тартышма гъазир, ана тилим генг.

Абургъа, сыйгъа гъариси лайыкъ.

Сизин булан биз таныш болайыкъ.

Танышлыкъ.

Ана тилни сырларын ахтарайыкъ, чечейик.

Адашып, адап къалсакъ, айып этмей ге-чейик.

Бу оюнну ахтарма, олтургъан жюри,

Гъар кемчилигин гёрюп, боларсыз тири.

Гъар командаға ян тартып гелген

Къаравчулар да сав болсун мекен.

8-нчи а къаршы 8-нчи б класгъа
Къарайыкъ гъали сиздеги къастгъа.

Танышлыкъ.

- Бизин команда

-Гъаракатчылар.

Гъаракатчыларбыз биз.

Гъеч къуллукъдан къоркъмайбыз.

Алдынлыкъны алмайлы,
Уюбюзге къайтмайбыз.

Гъакъылы тенглер булан
Тюгюл тогъа тартмайбыз.

-Бизин команда

-Гюнешлер.

Гюнешлербиз, гюнешлер.

Исив, ярыкъ беребиз.

Гъаракатчылардан яхши

Ана тилни билебиз.

Утмагъа деп гелгенбиз,

Утмайлы гетмесбиз биз.

Ойнайгъан яшлар таныш чы сизге,

Динара артда къошуулгъан бизге.

Селита сабур, тавушу аста.

Хасияты дослу, жаваплы дарсда.

Сирајдин эрке, гиччиси уйде.

Жыкъысы да бар биз билген кюйде.

Уллу ишлевюч, уялчан юзю.

Къоянлар сакълай Наврузум оьзю.

Илиякълы Марат сёйлей астарақъ,

Гъисапны яхши биле бу яшым.

Дарсгъа гечикме, гёzel Рабият.

Юхлама суюсенг, бираз эрте ят.

Отавунда таявлу, къызашлагъа аявлу.



Оъзтерече бу къыз Фарида атлы.
Бойлу къыз, Райса, арив сёзлеринг.
Напекенг тёрме къоймай гёзлеринг.
Ажайым ишли, обур гелишли.
Ана тилни де биле тийишли.
Хатасыз яза Абитим тюзю,
Гёrmеге арив иренкли юзю.
Эркек хасият Агъмат агъайда.
Соравгъа жавап гъазир, айгъайда.
Тилге югюрюк Женнет онгунгда.
Эзивден гирип чыгъар къойнунгдан.
Девдей Динисим болду аюв да.
Порсукъ да болду чебер яювда.
Этмежек артыкъ Альбина хабар.
Кыллына тийсенг, тёбенгден хабар.
Рашитханымны къарьыву артыкъ.
Тюрлю гыслерден толажакъ къартыкъ.
Спорт булан машгъул Вайдулла яшым.
Ол гючлю боксёр, тез яшыр башынг.

Эки команда
Бир-бирине тенг.
Тартышма гъазир,
Ана тилим генг.
Ана тил

1) Тартышыв

СОРАВЛАГЪА ТЮЗ ЖАВАПЛАР

- Йырчы Къазакъ къайсы юртлудур?
(Муслимавул – Атланавул)
- Шиъру къайдада язылгъан хабар не-
дир? (поэма).
- Яз гелгенде ерленики – яшнамакъ,
Ерлер яшнай, яшнап къала бар да якъ.
Тек ерлеге ес тюгюл чю бар да халкъ. («На-
сипли бюлбюл»)
- Къумукъ сатирик кимдир? (Наби Хан-
мурзаев).
- Кимни сёзлеридир? - О чу герти, буса
да, эки де, учь де гелип-гетип юрюмек бизге
де арив тюгюл. Халкъ эшитсе, нечик де сёй-
лер, уялмасын, бу уялма ярайгъан заман тю-
гюл, биз кёп разибиз, сёйлесин.(Абдулке-

рим).

– Къумукъ театр кимни атын юрюте? (А.
Салаватов).

– Айтывну битдир. Игит уйде тувар... (къырда ойлер).

– «Шавхалны къаласыны» автору ким-
дир? (М-А. Османов).

– Б. Астемировну «Тангчолпан» деген аса-
ры кимге багъышлангъан? (З. Батырмурза-
евгъя).

– «Къараачач» деген ёмакъдагъы сувдан
табылгъан яшланы атлары нечикдир? (Сув-
кар, Табулду).

– Магъаммат апенди Османов къайсы
юртлудур? (Яхсай)

– Хабардан уллу, романдан гиччи чебер
асар? (повесть)

– Уллу ёлгъа сапар чыкъма бизге заман,
уланлар!

Чёкюч булан гесевючлер ёлда бизин бу-
ланлар. («Яш гюбечилени йыры»)

-Дагъыстан язывчуланы союзуну бирин-
чи председатели кимдир? (Багъавутдин Асте-
миров)

-Кимни сёзлеридир? - Сёз, лакъыр негер
тарыкъдыр? Мен бугъар мени ал деп
тилежекменми, сюймесе, алмасын. Ол алмаса
да, мен ерде къалман. (Гъабибат).

– Къумукъ театр учун уллу инглис дра-
матург Шекспирни «Отелло» деген трагедия-
сын ажайып усталыкъ булан ким гёчюрген?
(Т. Бийболатов).

– Айтывну битдир. Болгъан ишге... (бо-
лат бол).

– «Сатылгъан Меседуну» автору кимдир?
(Сокъур Къурман).

– Дагъыстан драматургияда инг де белги-
ли патьму кимдир? (А. Салаватов).

– Денгиз атны ким тутгъан? (Шамсува-
ра).

2) Тартышыв

ТЮЗ ЯЗМАГЪА БИЛЕМЕН, ХАТАНЫ
МЕН СЮЙМЕЙМЕН.



Йиберилген хаталаны тюзлегиз.

Жаллы, хакенез, такли, атгъыч, къайына-на, гюмелек, уллуана, бирминг эки юз, элий, уyttю, атялман, дунъя, бюгюн, гъайюв, чавакъ, оғюземиш, гъовуна, бопо – вош, йымшакъ, аппакъ.

3) Тартышыв

Мен - сагъа, сен – магъа . (Бирикген сёз тагъымланы маънасын чечебиз. Башчыларыны тартышыву.)

ЯЛ АЛЫВ

«Мен къарайгъан тешикден къара»

Эки ювукъ болгъан. Оланы бириси бир къызыны бек сюе болгъан. Бир гезик той болуп турагъан абзарны ариги янындан таба чалны тешиклеринден эки ювукъ тойдагъы къызлагъа къарай болгъан. Къызындың сюеген улан тойда досун гёре. Ону ювугъуна гёрсептүп макътанма сююп:

– Ювугъум, гъона, шо гёк гюммелли, гёк полша гийген гёк гёзлю къыз – мени сюйгеним, къара чы, нечик аривдюр! - дей.

Ювугъу башгъа тешикден къарай, къызыны ушатмай:

– Я, о чу эрши зат, – дей.

Къызындың сюеген улан ону сёзлерине бек тамаша болуп:

– Я, гел, мен къарайгъан тешикден къара, – деген.

«Атын айтса ат йимик гелер»

Дюнъядагъы бары да халкъланы гъайванчылыкъ ва гъавчулукъ булан байлавлу инанывлары, хабарлары болгъан. Шоланы арасында ат яшырып сёйлейгенлик де кёп ёлугъа. Кюрчюсю – жан-жанывар адам тилни биле, олар сигърулу кюйде арекден таба да муратларын-хыялларын билме болар деген инанывлар.

Бырынгъы гъавчу гъавгъа чыкъгъанын ачыкъдан айтмай болгъан. Къайсы къыр жанлагъа гъав этмеге хыяллы барны огъар башгъа яшыртгъын атлар тагъып айта болгъан. Къумукъларда да, масала, «бёрю» деп

атын ачыкъдан айтмакъ яхши тюгюл деп сана да болгъан. Огъар гавур, гавур гийик яда жанывар деп айта болгъанлар. Дагъы ёгъесе, шо ат йимик чалт, тез гелип, зарал этме бола деген эсги инаныв болгъан.

«Сен тюлкю бусанг, мен къуйругъуман»

Аллагъы бары да жанланы яратгъан сонг, олагъа гъар тюрлю якъдан бажарывлукъ, гюнер, пагъму ульешмек учун бир ерге жыя... Адам алда етишип, гъакъылны ала, пил – гючню, арсланкъаплан – къоччакълыкъны, къубагийик – бек чабывну ва шолай башгъалары башгъа затланы алалар. Тюлкю бираз гечигип къала. Онча кёп жыйылгъан жан-жаныварны арасына гирип де болмай, артда оланы тюбюндөн, аякъ-туякъ аралыкъдан таба къуйругъун сугъа. Огъар да башгъалар алма сюймейген гъилла ябушуп къала. Шону учун ону гъилласы къуйругъунда бола деп айтыла.

5) Тартышыв

Ким яхши охуй? (Чебер охув тартышыв).

6) Тартышыв

Токътав белгилени сал.

Бизин класдагъылар Азnavur Агъмат Вайдулла Имран гъасили калам барысы да яхши яшлар. Уюнг йыгъылмагъыр сени я сагъа къарайгъаным не заман.

Авлакъда ишлейгенлер Акърамдин Марат Хункер Навруз гертисин айтгъанда бары да къасткъылып айлана. Гъай къоччагъым сени я ишден къоркъмайгъан улансан.

7) Тартышыв

Муну аты нечиқидир?

Билеген адам шоссагъат айта. Билмей бусагъыз, гезик булан гъарпын ачып чечебиз. Алда чечген команда утажакъ.

7) Тартышыв

Чебер сёзни устасы. (Ким кёп айтыв биле?)

8) Тартышыв

Берилген сёзлерден айтыв жыйй.

Оърлюк сюйген кёп охур. Илму отда да



янмас.

8) Тартышыв

Сёзлени жутун тап.

Понедельник, вторник, среда, четверг, пятница, суббота, воскресенье, жумагюн, талатгюн, арбагюн, сонгугюн, итнигюн, хамисгюн.

9) Тартышыв

Сёзлени къумукъ тилге гёчюр.

Осень, семья, вечер, радуга, век, юг, ручка, возможность, легкий, образ, рагьму.

Дарсны жамы:

Оюн битди, харс сизге.

Сююнчюз къумукъ тюзге.

Къурч оюнугъуз булан

Къарьив къошдугъуз бизге.

Уланлар да, къызлар да

Ойнады армай, талмай.

Бүгүн шундан гетмессиз

Менден савгъатлар алмай.

Къоччакълыкъ ва гъакъыллыкъ

Эр йырны баш макъамы.

Муна гиччириек савгъат:

Блокнот, язма къаламы.

Къызларыбыз аривлер,

Гёз тиерден къоркъаман.

Шо саялы олагъа

Гёз йымчакъны тагъаман.

Машалласыз къоймажакъ,

Гъариси дюр бир къурчакъ.

Узун чач – гёз гъашыгъы,

Чачгъа сизге тагъымчакъ .

14 йылда паспортлар

Алгъансызыз, я аларсыз.

Утгъангъа жылт беремен,

Ону уystюне саларсыз.

Ананы сюегендей

Сюй, сен, ана тилинг де.

Сююв ярыкълыкъ берер

Гъар башлагъан ишингде.

Сав болугъуз, бар болугъуз,

Къолугъуз болсун къолда.

Халкъны гъакъыл хазнасы

Кёмекчи болсун ёлда.



Бир-бир сёзлер эсгилене, оъзю тил буса янгыра

Халкъарада эсги болгъан сёзлени (архаизмени) янгыдан тилге къайтарма герек, орус тилден гелген сёзлени орнуна янгы къумукъ сёзлер яратма герек дейгенлер чакъ-чакъда къарышы бола. Шолай айтагъ-анлагъа рази тюгюлпер де кёп бар. Олар гъисап этеген кюйде, янгы сёзлени яратыв тынчлыкъда чечилеген масъала тюгюл, тилни оъсювюню оъз законлары бар. Шо масъалагъа гёре, гъалиден 35 йыл алда филология илмуланы доктору, профессор, Дагъыстанны халкъ язывчусу Ибрагым Керимов да оъзюню «Къумукъ тилни къужурлу грамматикасы» деген китабында язғыан болгъан.

Заман гетген, яшав оъстен сайын тилдеги бир табун сёзлер эсгиленеген, гъатта ёкъ болуп къалагъан кюйлер бола. Шолай сёзлеге архаизмлер дейлер. Сёзлени эсгиленмегини эки себеби бола. Биринчиси, бир табун предметлер, англавлар яшавда къолланмайгъан болуп къала, шо заманда оланы атлары унтула. Масала, гъали садакъ (окълар салагъан зат), къалкъан (окъ, къылыч тиймесин деп алдына тутагъан темир), сюнгю (башында чанчма темири булангъы узун къурух, бырынгъы заманларда атлы астерни савуту), къул, къараваш, раият (бийге-хангъа табии гиши) деген предметлер де, шо саялы оланы атлары да къолланмай.

Экинчиси, бир тайпа предметлер ва англавлар оъзлер таймаса да, атлары тайып, оланы орнуна янгы сёзлер къолланагъан болуп къала. Масала, гъали биз мактап, къыратхана, писир деген сёзлени орнуна школа, изба-читальня, секретарь деген сёзлени къоллайбыз.

Бир табун шолай сёзлери эсгиленген булан тил башгъа ярлы болмай. Биринчиси, оъзюне тарыкъ сёзню халкъ эсгиленмеге къоймай. Сёз эсгиленди буса, о тилге тарыкъ болмагъан.

Экинчиси, гъар-бир тилде эсгиленген сёзлерден эсе, оъзге тиллерден гелип къошулагъан сёзлени санаву кёп бола. Шо зат о тиллени савлай алгъанда эсгиленме яда ярлы болма къоймай, ону терсине, янгырта ва бай эте.

Совет девюрде бизин тилге орус тилден юзлер булан янгы сёз гирип, ону сёз байлыгъын артдырып, янгыртып, нечакъы англамагъа къыйын затланы гъакъында да сёйлеп де, язып да болагъан этди.

Тилни оъсювюнде сёзлер оъзлер тайып гетмей, янгыз оланы маъналары алышынып къалагъан кюйлер де бола.

Жагыл деген сёзню бир заманларда къумукъ тилде англавсуз, билимсиз деген маънасы болгъан. О – арап сёз, арап тилде ону муна шолай маънасы бар да бар. Гъали буса жагыл деп етишген улангъа айтабыз.

Дагъыстан Россиягъа къошуулгъан сонг, орус купецлер гелип, бизде уллу тюкенлер ачып, уллу савдюгер этип, бек бай болуп гетген. Олагъа бизин халкъ орус байлар дей болгъан. Бара-бара шо сёзню маънасы алышынгъан: гъали биз урусбай (сёзню баш авазы ассимиляция къайдасына гёре алышынгъан) сёзню гъисапсыз, кёп, гючлю деген маъналарда къоллайбыз.

Гъаким деген сёз бизге араплардан гелген. Арап тилде о судья деген зат. Бизде де шо сёз бир вакътилерде оъзюню герти маънасында къолланса да, бара-бара начальник деген



маънаны береген болуп къалгъан.

Эгер эстиленип тайгъан сёзлени гёчюм маънасы болгъан буса, баш аслу маънасы тайып, къалгъан маъналарында къолланагъан кюйлери бола. Масала, окъ деген сёз аслу маънасында гъали къолланмай буса да, гёчюм маъналарында къоллана: гёню огъу, окъ йимик, окъдай болуп гетди деп айтыла.

КЪАЙСЫ СЁЗ КЪАЙДАН ГЕЛГЕН

Озге тиллерден гелип сёзлер къошуулмагъан, янгыз оъзюню сёзлерин къоллап турғын тил дюньяда бир де ёкъ. Къайсы тилни алыш къарасакъ да, ону сёз байлыгъыны бир нече проценти оъзге тиллерден гелген сёзлер болуп чыгъажакъ.

Тиллерден бири-бирине сёзлер гирмекни себеби халкъланы арасында тыгъыс жамият-экономика аралыкълар болмакъдандыры.

Шолай оъзге тиллерден гирген сёзлер бизде де бар. Оланы дёрт группагъа бёлмеге ярай.

1. Ерли тиллерден гелген сёзлер: ханц, хуцири, махи, харал (къап), котехал (четен къап), хапача (тон) ва башгъалары.

2. Арап тилден гелген сёзлер: адам, адил, азиз, ағылю, аламат, алат, алим, амма, амал, арза, асыл, аслу, балагъ, берекет, гъава, гъаким, гъакъыл, гъаракат, гъарам, гъарп, даим, дарс, даражада, дюнья, зат, загъмат, изну, идара, илму, инсан, ишара, калам, китап, къуват, къарап, къаст, мал, макъала, маъна, масала, миллет, мурад, налат, насиپ, негет, пикир, питне, рази, рагъат, рагъму, сабур, савгъат, салам, себеп, суал, тайпа, талай, талап, таман, тасдыкъ, тарих, хатир, хыял, хасият, шагъат ва ш. б.

3. Фарс (иран) тилден гелген сёзлер: аппасы, базар, кире, кишен, леген, майдан, мых, намарт, пал, палас, пашман, пастан, пача, перде, пердев, пурман, сапун, сирке (ханц), сукара, терезе, тюкен, хали, хаса, хырда, чыт, шагъ, шайы, шиша ва ш. б.

4. Орус тилден гелген сёзлер: аптек, артист, банк, билет, бурам, договор, зал, закон,

клас, курорт, курс, метро, минут, музей, партия, партизан, патриот, пенсия, печ, пут, радио, район, резин, совет, союз, станция, студент, телевизор, телефон, школа, ясли ва ш. б.

СЁЗЛЕНИ СЫРЛАРЫ

Тил – тамаша зат. Тил – гючлю зат. «Айтылгъан сёз – атылгъан окъ», – деп ата-бабаларбызы билмей айтмагъан. Шо саялы гъар сёзню оъз еринде къолламагъа ва тюз язмагъа герек бола.

Дюньяда бир-бир халкълар солдан онггъя багъып, бир-бир халкълар буса онгдан солгъя багъып яза. Масала, биз солдан онггъя багъып язабыз, араплар буса онгдан солгъя багъып яза.

Тергев этип къарасакъ, къумукъ тилде солдан онггъя багъып да, онгдан солгъя багъып да бир йимик охулагъан, тек маънасы бузулмайгъан сёзлени табабызы. Масала: ата, ана, къумукъ, къазакъ, къабакъ, къаммакъ, аба, къалакъ, къуллукъ, къутукъ, къакъ ва шолай башгъалары.

Онгдан солгъя багъып охугъанда бир табун сёзлени маъналары алышына: къамаша – ашамакъ, налат – талан, гыисап – пасигъ, алаша – ашала ва башгъалары.

Кёбюсю сёзлени бувунларын алышдырып охуса, бир зат да англашылмай къала: бавну – нубав, яшлыкъ – лыкъяш, тавлар – лартав, оюв – юво, сыйыр – йырсы, кетен – тенке ва ш.б.

Амма бир-бир сёзлер, бувунларыны ерленин алышдырып охуса да, янгы маъна английмагъа бола: мендей – деймен, месеп – сепме, маякъ – якъма, тютюн – тюнту, ашлав – лаваш, талмакъ – макътал, мендей – деймен, буса – сабу, акъыр – къыра, тюсю – сютю ва шолай башгъалары.

(*Ибрагъим КЕРИМОВНУ «Къумукъ тилни къужурлу грамматикасы» деген китабындан*).

Ибадулла Гъажиев,
Хасавюрт, тилни ахтырывчусу.

Чет сёзлени баянлыкълары

Киш ва киш къара. Кыш-ни баш маънасы – бек багъа терили къыр жан (соболь). Кыш тон – соболиная шуба. Кыш ягъа – соболиный воротник. Кыш къара демек буса – бек къара, къап-къара, кёмюрдей къара демек бола.

Шолай да: хас, хаслыкъ ва хас тон.

Хас, хаслыкъ – 1) энчили, энчилик (собственный). 2) хас, хаслы, хаслыкъ – хас хасият, оъз, оъзтёречелик (типичность). 3) хас бёлюк – спецотдел. 4) хас къурум – айрыча къурум (специальный, особый орган).

Хас – къыр жан – ёнот. Хас тон – ёнотовая шуба.

Сабий деген сёз – жагыил деген сёзню толу маънадашы. Сабий, жагыил демек – яш авлет (подросток) демек бола. Шо сёзлер экинчи маънада да къоллана: жагыил, сабий – гъакъылбалыкъгъа гелмеген демек (недоросль). Ол гъали де яш: хыйлы затланы англамай – жагыил, сабий.

Бютюн деген сёз де кёп маъналы сёз (полисемиялы). Бютюн этилген иш – мекенли, тындырыкълы күтюлген иш. «Этген ишингни бютюн эт» деген айтыв шону тасдыкъ эте. Бютюн дюнья, бютюн халкъ – весь мир, все народы. Бютюн – сав деген маънада да къоллана: «Эки ярты – бир бютюн»,

айтыв. Эки ярты – бир сав демек (один целый).

Шу сёз бютюнлей терс маънада къолланагъан гезиклер де ёлугъя:

«Папирос тютюн – кёкюрек бютюн», яни кёкюрек бузулар, чирир демек

Явун ва янгур деген сёзлер – бирдей маънадаш сёзлер. Кёбюсю гезиклерде шолай дюр де дюр. Амма шу айтывдадай: «Эртенги явун (янгур) узакъ явмас» деп къоллана, амма эртенги янгур узакъ «янгурмас» деген къайдада буса къолланмай.

Ёммакъ ва юммакъ деген сёзлени де чалдырыш къолланагъан гезиклер ёлугъя. Ёммакъ – барыбыз да билеген кюйде (сказка) демек. Ёммакъ сёйлейсен – сказки, небылицы рассказываешь, белиберду несёшь, говоришь.

Юммакъ – йип токъмакъ (клубок, моток ниток). «Йип бойласанг, юммакъгъа ёлугъарсан» деген айтыв да бар. Грек юлдурмадагъы (мифдеги, легендадагъы) «Ариаднова нить» дегенни эсте алып, тенглещидирип къарагъыз.

Асил ва асыл деген сёзлер де терс, бирини орнунда бири кёп къолланагъан гезиклер ёлугъя. Мисал учун: асил таш ва асыл яш. Таш асил (йымышакъ) болма бирт де кюй ёкъ. Яш буса, айрокъда, къызызъяш буса, асил, назик къылыкълы болагъаны белгили. Ташланы сыйлысы, багъалысы, къыйматлысы да бола ва шолагъа асыл ташлар деп айтыла – драгоценные камни деп. Адам асил де, асыл да бола. Асил-ни англатдыкъ. Асыл адам демек – благородный человек демек бола. Асыл тухум – благородный род.

Охувчулар, сиз де шулай чет сёзлени эсгерип бере турсагъыз, жаваплар тапма къарап эдик.

Редакциядан: Ибадулла Гъажиев – оъзбашына чалышагъан тил ахтарывчусу. Ону оърдеги макъаласындагъы бир-бир токъташдырывлары булан рази тюгюл бусакъ да, алышдырмай бермекни тюз гёрдюк: ону никрусу шолайдыр. Мисал учун, «сабий» ва «жагыил» деген сёзлер, бизин гъисабыбызда, маънадашлар (синонимлер) тюгюл: сабий – гиччи яш, жагыил – уллу, етишген яш. Шолай да «асил» ва «асыл» деген сёзлени баянлыкълары да «Бизин тилни» толу кюйде рази къалдырмады. Сиз нечик ойлашасыз?



Айтар эдим бирисин... яда Бир-бир къумукъ сёзлени маъналары

Бир тайпа сёзлер, къоллана туруп, баш маънасын тас этип къоягъан гезиклер бола. Сонг шолай сёзлер маънасы ювукъ оъзге сёзлеге маънадаш (синоним) йимик къолланып къала. Авуз тилде чи шолай нукъсанлыкълар ёлгъя йиберилегенге уйренгенбиз, тек норма болгъан адабият-языв тилде де айры-айры сёзлени маъналары тюз къолланмай къалагъаны яман. Мисаллар гелтирип сёйлесек яхши.

Тёбенкъазанышлы Забир Девлетов телефондан таба газетибизде бир-бир авторланы макъалаларында айры-айры сёзлер тюз маънада къолланмай къалагъанын эсгерди. Мисалгъа деп, ол жут сёзлени уъчюсюн гелтириди.

1. Ат такъмакъ – ат къоймакъ. Кёбюсю гезиклерде шу эки де сёз тагъым синонимлер, демек бир маъналы сёз тагъымлар йимик къоллана. Оланы буса башгъя-башгъя маъналары бар. Мисал учун, янги тувгъан яшгъя ат къююла: Магъаммат болсун. Йыллар гетип, Магъаммат уста бола яда, буту сынып, сакъатлана. Шо Магъамматгъа юртлularы Уста Магъаммат яда Акъсакъ Магъаммат десе, «Уста» ва «Акъсакъ» деген тагъылгъан атлар болажакъ: алдагъы атына тагъыллып (илинип, байланып, тиркелип) гелеген ат. Демек, «Пеленчеге яш тувгъан, огъар пелен ат такъдыкъ», – десек, тюз болмажакъ, «ат къойдуку», – десе дурус. Англама тынч болсун учун: къююлагъан ат – орусча имя, тагъылагъан ат – прозвище.

2. Кёп – хыйлы. Эки де сёз кёп деген маънани бере буса да, кёп демек хыйлыдан артыкъ. Хыйлы-ны дазусу болма бола, дазудан ойтсе, о «кёп» бола. Кёп-ню шолай дазусу ёкъ. Мисал учун: «хыйлы халкъ» десек шо аз тюгюл экенни англайбыз, тек «кёп халкъ» десек, о артыкъ. Шону учун: «Чингисханны ас-геринде хыйлы адам болгъан», – дегенден

эсе: «... кёп адам болгъан», – десе, къыйышывлу болар. «Кёп» деген сёз «хыйлы» деген сёзни орнунда къолланса ярай, тек «кёп-ню» орнунда «хыйлы» къоллана буса – бираз къыйышывсуз.

3. Къат – къабат.

Къат (къатлав) – бир нече бир йимик затланы гъакъында айтылагъанда къоллана. Мисал учун: кёп къатлы уй. «Къабат» деген сёзни буса маънасы бираз башгъа, о «керен» деген сёзни маънадашы: бир нече къабат – бир нече керен. Шо себепден «кёп къабатлы уй» дегенче, «кёп къатлы уй» демек маъналы болар. «Къабат» деген сёз булан да бир мисал: «Ол магъа этген къуллукъну мен огъар эки къабат этип къайтаражакъман».

Забир Девлетов йимик тергевлю охувчуланы биз сыйлап юрюме герекбиз. Халкъны арасында жанлы тилни журналистлерден де мекенли билегенлер аз тюгюл. Гъалиден 3 йыл алда иш ёлдашым мисгин Магъамматмин Адилхановну эсделигине язгъан макъаламны шулай сёзлер булан битдирген эдим: «Тувгъан гюнүнгде къурдашларынг сени савлугъундан аякълар гёттердик». Газет чыгъып, экинчи гюн боташортлу муаллим Камил Моллаев телефондан таба: «Оылген адамны савлугъундан тюгюл, эсделигинден иче», – деп айып этди. Озокъда, шо мени хатам эди, тек редакцияны жаваплы къуллукъчулары да шону эслемеген. Демек, халкъны сёзюне дайм де къулакъ салып турсакъ, ишибиз алгъя юрюжек.

Лакъыр хаталаны гъакъында болгъан сонг, ойлашып, дагъы да биз тюз къолламайгъан бир нече сёзни эстермекни тийишли гёрдюк.

Нечев ва нечеси. Къумукъ тилде адамлары гъакъында айтылагъанда санавланы ахыры –ав, –ев булан бите. Предметлени гъакъында айтылагъанда буса, –иси, –юсю, –

ысы, -и, -у къошумчалар къоллана. Мисал: яшланы бешевю, тек шанжалланы бешиси. Биревлер шо эки де къайданы бузуп, яшланы бешиси яда шанжалланы бешевю деп къоягъан гезиклени эслегенбиз.

Санавланы гъакъында дагъы да мисал. Санавлукъдан яда кёплюкню англатагъан сёзлерден (хыйлы, кёп, бир нече ва оъзгелери) сонг гелеген атлыкъ гъаман да текликде болма герек. Шо правилону (къайданы) бу загъанлар да кёп. Мисал учун: «Мен къурдашымны гёрмегенли бир нече йыллар бола» яда «Машинни дёрт дёгерчилери бар», – деме ярамай. Башлапгъы сёз бирден кёп деген англавну берегенге гёре, ондан сонг гелеген сёздеги –лар артыкъ. Болма герек кюю: «Мен къурдашымны гёрмегенли бир нече йыл бола» яда «Машинни дёрт дёгерчиги бар».

Ян – якъ. Экисини де бир нече маъналары бар, тек олар маънадашлар тюгюл. Аслу маъналарын гелтирейик. Ян – предметни бир яны болма бола (оъзенни сол яны). Якъ буса – кёбюсю география англав, бир ер (сувукъ якъ). Якъны да, янны да булгъап къоягъанлар кёп. Тюзюн айтса, мени оъзюмню де шоланы маъналарында янгылагъан гезиклерим болгъан.

«Ленин ёлу» (гъалиги «Ёлдаш») газетни редактору Салигъ Валиюллаев булан мен 1989-1990-нчы йылларда 10 ай бирге ишледим. Ол магъя эки сёзни тюз маъналарын англатагъаны эсимден таймай. Ойламакъ – ойлашмакъ. Кёpler шо сёзлени бир маънасы бар деп ойлаша. Бир вакъти мен де шолай деп тира эдим. Ойлашмакъ – бир затны гъакъында ой къурмакъ (орус тилдеги – думать). Ойламакъ – биревню гъайында болмакъ (орусча – проявить заботу). Мисал учун, «Мен сени гъакъынга ойлашаман», – демек тюз, «ойлайман» деген бусакъ, янгылыш болар эди. «Террорчулар бир гюнағысыз оълеген адамланы ойламай», – деп тюз язылгъан, амма «ойлашмай» деген бусакъ, янгылышгъан болар эдик. Шо эки сёзни тюз къолламакъ учун бирдагъы кёмекчи: «ойлашмакъны» алдында «гъакъында» деген союз геле, демек шо союздан сонг «ойламакъ-ны» язып къоймагъыз.

Салигъ Валиюллаевни бирдагъы дарсы

учун – саялы деген сёзлени гъакъында болду.

Учун – яхши ишни гъакъында айтыла-гъанда къоллана (орус тилдеги за деген союзгъя ювукъ маънада). Масала: «Сени учун жа-нымны да аямайман».

Саялы – «болмаса яхши эди» деген маънаны береген контекстде къоллана (орус тилдеги из-за деген союзгъя ювукъ). Масала: «Сен саялы шу къыйынлыкъга тарыдым».

Кёpler, гъатта белгили язывчулар да шо эки сёзни синонимлер йимик гъисаплап къоллайлар. Магъаммат Атабаевни белгили йырын алайыкъ:

Аявлу къызардашлар,
Амалларын аягъан,
Амаллары саялы
Жанын берип къоягъан.

Шаирлөгө, айрокъда, Атабаев йимик уллу шаирге кёп зат гечиле.

Оланы янгылышлары сонг-сонг нормагъя айланып къалагъан гезиклер де кёп болгъан. Тек... «Платон мени къурдашым...»

Шу темагъя дагъы да бир-эки мисаллар.

Биревлер гёзни гёзяшы деп язагъан гезиклер къаршы бола. Масала: гёзюмден гёзьяш агъа, дей. Гёзден гёзяш акъмай, дагъы не яш акъсын?! Шунда яш-ны алдындагъы гёзартыкъ экени гёрюнүп тира.

Айттар эдим бирисин,
Къарлы тавлар ирисин!
Гёзюнгден акъгъан яшгъа
Къолъявлугъунг чирисин! –
деген халкъ йырындағы сёзлерден дарс алайыкъ.

Тюз къолланмайгъан сёзлени мисалгъа гелтирме ярайгъанлары дагъы да кёп бар.

Ахырда оъзюмню ата юртумну язылышында йиберилеген уллу янгылышны эсгерме сюемен. Адилянгыорт неге «Адил Янгыорт» деп эки сёз болуп языла? Солтанянгыорт (Шавхалянгыорт, Темировул, Тотурбийкъала ва башгъалары) – бир сёз, демек, Солтанны (Шавхалны, Темирни, Тотурбийни) аты къоюлгъан юрт (авул, къала). Бий Уцмиев Адилни аты къоюлгъан янгы юртну аты неге айрыча языла? Бир алимге шону сорагъанда, ол: «Юргъя адамны аты тагъылгъан буса, бирче языла (Солтанянгыорт), амма юртну атына ону белгиси къошулгъан буса, олар айрыла (Тёбен Къазаныш)», – деп



жавап берди ва мени юртумну язылыунда янгылыш йиберилгенине рази болду.

Яда «Къумукъ тилни орфография сёзлюгъон» тизген алимлар Адилянгыортну атындағы биринчи сёз белгилевюч тюгюл, адамны аты экенни билмей болгъанмы экен? Тамаша!

Бүгүнгю къумукъ тилни алимлери печатдагъы шолай кемчиликлеге байлавлу бајалыкълар бере турса, бары да язагъанлар учун уллу көмек болар эди. Бизге де оланы ишине сугъулмайлар, ойз ишибизни юрютме рагыат болар эди.

Алимлер пыса буса, къалгъанлагъа сама къумукъ языв тилибизде бар кемчиликлени гъакъында дискуссия башлама заман гелгени хыйлы бола. Неге уллу ата, уллу ана, яш ойрюм, Таргъу тав, Къумукъ тюз ва ойзге шотайпа сёзлер бирден-эки къошуулуп язылагъан болуп къалды? Школаларда яшлар

охуйгъан грамматика терминлер къумукъ-чагъа айландырылып, тилни уйренивде яшлагъа тюгюл, муаллимлеге де уллу четимлик түvdурду. Неге? Шолай этип, утгъаныбыз бармы? Муаллим деген сёз тилге гийрилген, ону охувчусу муталим ва олар экевю де гъаллашагъан ерни аты мактап болмайлы, школа кюонде къалгъан. Нечик англатма бола?

Янгы къумукъча-орусча, орусча-къумукъча ва орфография сёзлюклерин тизип башлама заман да болгъан. Неге тюгюл, артдагъы сёзлюклериз макътардай даражада тюгюл, дагъылары ёкъгъа гёре юрютүп турabyз.

Тилибизни гъалына байлавлу соравлар дагъы да кёп бар. Къумукъ тилни алимлери ва тилин сюеген, билеген касбучулар ва охувчулар шо гъакъдагъы ойзлени пикруларын айтар бугъай.

Гиччи яшланы сёзлери

Улулар гиччи яшлар булан сёйлейгенде къоллайгъан, тек кёплери сёзлюклеге де гирмейген ойзтерече сёзлер аз тюгюл. Уллу Бойнакъ (Уллубийавул) юртлу Салават Салаватов шоланы хыйлыларын Фейсбукда ерлешдирген эди. Сонг о сёзлеге кёpler къошум да этдилер. Редакцияны тилевюне гёре, Салават шоланы бизин журналгъа бермеге рази болду. Бир-бир ерлерде оланы айтылыши ва маънасы бираз башгъа болма да бола.

Аай – нас, тийме, къоллама ярамайгъан зат, гъажаты

Агув – аякъ

Ачча – къучакълав

Ах (упай) – ойбюв

Баай (chohай) – къой, мал

Бабав (Боъай, моъай) – чудище (яшланы къоркъутмакъ учун къоллана)

Бабай (папай) – экмек, аш

Бап (боп) болмакъ – йыгъылмакъ

Бебей – гиччи яш, нарыста

Биш – бишириген даражада бек исси

Бишив (бишев) – мишик

Дадай (дай) – арив, яхши

Даси этмек – къолун силлеп савболлашмакъ
Датий этмек – юрюмек

Дай этмек – сыйпамакъ

Даъ (гак) этмек – урмакъ, токъаламакъ

Дюдют – машин

Гакай – кампет яда ойзге тюрлю татлилик

Гъав-гъав (этмек) – ит (гъапламакъ),

Гъам этмек – ашны хапмакъ, ашамакъ

Гъам-гъам (маммам) – аш

Гъосса этмек – бийимек

Жачий (датий) – аякъгийим

Жижей – эт гесек

Жичюв – гиччи жан, къуш бала

Жиджюв – яра, къычыв

Колав – къол

Моъ – сыйыр

Нанав – бурун

Чапу-чупу – киринив

Увей – авуртгъан ери, яра

Уф – сув

Умма (уппа) – къыргъа чыгъып айланмакъ, къонакълай бармакъ

Ухай – юху

Ушюк – сувукъ



АНАДАШ АДАБИЯТ

Солтанбек СОЛТАНБЕКОВ,
радиожурналист, язывчы

Сыралы санавлар

Язывчу ва журналист Солтанбек Солтанбековну «Сыралы санавлар, сёзлер ва оюнлар»
деген китабындан алынгъан материаллары музалимлар дарсларда къолласа
пайдалы болар деп эсивизге геле.

Бир бирдир! – деп, сан этмей къоймагъыз! Яшавда бары да зат бирден башлана.

«Бир буса да пир болсун!» – деп де айталар.

Яхшы яшлар бир минутун да бош йибермес! – деп де билмей айтылмагъан.

Бирлеге байлавлу дагъы да шулай бир нече айтывлагъа да

тергев берейик:

Биревню яманы мингевге тиер.

Бирев-биревге дарман да дюр, агъу да.

Йырчыгъа тарыкъ бир саз да, бир сёз де.

Баъли байлыкъ – бир айлыкъ.

Биревню ким экенин билме сойсенг, ону уюрлери кимлер экенни башлап бил.

Бир хапгъан булан бёрю де тоймас, дагъы хапмагъа къойчу да къоймас.

Бир къояр, эки къояр, гъаман къоюв боламы?

Бирлеге байрам, бирлеге гъайран.

Авлия бир ишни эки этер, шону да ярты этер.

Халкъ сынавларында дагъы да буладай айтыва:

Гюзде бир сагъатны ичинде къар да, янгур да явма болар.

Майсанда бир явса – байсан, эки явса – тьюгъойсан, учь явса – урусбайсан.

Дюнья аламны, адамланы; гъайван-малны, жан-жаныварны, бары да затны яратгъан бир Аллагъадыр.

Аллагъ дюньягъа элчи пайхаммар этип йиберген Магъаммат пайхаммар, Аллагы салам да, бирдир.

Кёкден Магъаммат пайхаммаргъа, Аллагы саламгъа, тюшген Къуран да бирдир.

Бусурманлар гъаж къылма барагъан Ал

лагъны сыйлы ую Кааба да бирдир. «Бирден экини тайдырса, нече къалар?» – деп сорагъанда: «Ноль!» – деген бир яш. О тюз айтгъанмы?

Бирден эки де къолай.

– Тюгюлмю дагъы шолай? (Муалим англатыв берип сёйлей).

Дюр буса, гелигиз «экилер» булан да таныш болайыкъ.

Экилени сырларын да башларыбызгъа къуюйыкъ!

Экилер

Авуз – бир, къулакъ – эки, къычырып сёйлеме.

Яда: «Эки тынгла, бир эшит», – деп уйретер уллулар гиччилени.

«Эки авузлу (юзлю) адам башын тас этер», – деп де айталар.

Адамланы аслу санлары экишер бола. Масала, эки къулагъы, эки къолу, эки буту, эки гёзю, эки ойпкеси, эки бүйреки ва шолай башгъаларына къошулуп эки юзлюсю де бола.

Къушланы барысы да эки къанатлы, эки аякъылы бола.

«Эки яртыдан бир сав да къолай», – дейлер.

Экевге аш этген оъзю де тояр.

Эки аязбаш бир таракъны уystюндөн ябушгъан.

Бир башдан къолайдыр эки баш.

Биревге экев асгер чакъы болуп гёрюнер.

Эки яман дост болса, арадан учь гюн ойтмей урушар.

Абусупиян Акаев язгъан «Юз суаллы Маликаны хабарында» да сиз буладай лакъырны охума боласыз:



Кызыз: – Эки затгъа етишдиреген эки зат недир?

Алим: – Сабурлукъ – муратгъа етишдирер, экинчилей, баргъа рази болуп турмакъ да – байлыкъга етишдирер.

Экевге экев – болар дёртев. Биз буса «дёртлерден» алда гёчайик «уучлеге»!

Үчлер

Къумукъ ёммакъларда кёбюсю гъалда учь къурдашны яда учь ини-агъаны кеппетлери суратлана.

«Юз суаллы Маликаны хабарында» кызыз алимге:

– Адам нече зат булан таныла? – деп сорай.

Алим де: – Учь ерде танылар, – деген, – сапаргъа чыкъгъанда – бир, сатыв-алывну арасында – эки, хоншулуку – учь, – деп жаваплангъан.

Кызыз дагъы да:

– Учь зат учь затсыз гъеч бола. Шолар нелерdir? – деп сорагъан.

Алим де: – Арив гишини гъакъылы болмаса – гъечdir. Алим гишини амалы болмаса – гъечdir. Бай гишини намартлыгъы болмаса – гъечdir, – деп жавап берген.

Дагъыстанны пачалыкъ байрагъы учь тюслидор: яшыл, гёк, къызыл.

Айталар:

Бир авлия учь гъакъыллы ашайгъан чакъы ашны ашар.

Бир талайсызгъа тюшген бир намусну күтгюнче дагъы да авур аваралар болагъанына гёре: «Устьевюне учь къалач» – дейлер.

Учден сонг болар дёрт. Дёртлени де сырларын да билмей туруп, неге ял алабыз, билегенлерден де неге артда къалабыз?!

Дёртлер

Сиз билемисиз, Ер юзюню дёрт яны бар: Гюнчыгъыш, Темиркъазыкъ, Къыбла ва Гюнбатыш.

Йылны табиаты дёртке бёлюнене: гюз, къыш, яз, яй.

Бир гече бир гюнню (сутканы) дёрт вакътиси бола: эртен, гюндюз, ахшам, гече.

Адамны оымрюю де дёртке бёлюнене: яш чагъы, жагъыл вакътиси, орта чагъы, къартлыгъы.

Ағылю де кёбюсю гъалда дёрт адамдан биринге: анасы, атасы, уланы, къызы.

Адам дёрт зат булан ругълу (гючлю): иманы, умуту, сююву, сынав-гъакъылы булан.

Къысгъача айтгъанда, табиатны ва жамият яшавну дёрт яны бар. Тек шону себеплери (сырлары) гъалиге ачыкъ тюгюл.

Биналар – дёртгюл, столлар – дёртгюл, краватлар, диванлар, дагъы да шолай хыйлы затлар – дёртгюл – дёрт мююш болагъаны да ажайып тюгюлмю?!

Бир яш бир уруп, бир агъачны дёрт яргъян, – дейлер.

Яхши яшлар яман затны дёрт ярылса да этмес.

Агъасы инисине:

– Шу алмаланы дёртден бир пайы сагъа, къалгъаны магъа, – деген.

Оланы къайсына къолайы тюшген?

Эртен сют алма йиберген бир яш балонсуз къайтып гелген.

– Къайда алгъан сютюнг? – деп сорагъанда:

– Сындырдым, – деп жаваплангъан.

– Нечик сындырдынг? Сындырма деп йибергенми эдим сени?

– Сюрюнюп йыгъылгъанда къолумдан тюшюп гетди.

– Сюрюнмес эдинг, воллагъ, эки гёзюнгю дёрт этип, къарап юрюген бусанг! – деген огъар да, арты булан:

– Дагъы гезик дёрт гёз булан гёр, дёрт къолунг булан тут! – деп де айтгъан.

Кызыз: – Бютюн дюньягъа нече гиши падишағы болду?

Алим: – Дёрт гиши болду: экиси – бусурман, оланы да бириси – Сулейман, экинчиси – Зулкъарнай. Экиси бусурман болмагъан. Оланы да бириси – Намруд, бири – Шадат.



(«Юз элли суаллы Маликаны хабарындан»).

Къызы: – Нече къушну оылтурсе гюнагъ бола?

Алим: – Дёрт къушну оылтурсе, гюнагъ бола: гёк къаргъаны, къарлыгъачны, гююкъню, ябалакъны. (Шо хабардан).

Амай шайыхны мюритлери дёртгёзлю итни гёрсе, намаз бузар, – дейлер.

Гёзелдириклер гийип чыкъгъан яшгъя: «Дёртгёз» – деп кюлеген авулдашлары».

Гъар айда орта гъисапда дёрт жума бола.

Гъасили, дёртлеге байлавлу къалгъан хабарланы билме сюйсенд, ахтарып бил, сюйсенд – оъзунг ойлашып чыгъар.

Мен буса, мен билеген «бешлеке» гёчемен.

Бешлер

Янтайгъан еримде яхши ойлашып къарайман. Уллу тамаша! Гъар жуманы бешинчи гюнү жумагюн бола. Жумагюн Магъаммат пайхаммар аллайгын саламны гюнү. Бусурманларда гъар жумагюн уллу гюн санала.

Гъар жумагюн – жуманы бешинчи гюнүндө межитлерде жума намаз къылына.

Магъаммат пайхаммар аллайгын салам айтгъян:

– Оразаны беш зат бузар: ялгъан, аччы сёз, тил юрютмек яда яляпмакъ, ялгъан затны гертилеп ант этмек.

Бизин уылкеде пачалыкъ къурумлары жумада беш гюн ишлей, эки гюн ял ала.

Йылны яй айларында аслу гъалда эртендер сагъат беш вакътиде танг белгиси билине.

Йылны гюз, къыш айларында ахшамлар сагъат беш вакътиде гюнеш артылып, маркача бола.

Къара дагъы, гъар адамны гъар къолунда ва аягъында бешер бармагъы да бола.

Бир керен бешевге бирев болуп къалгъан, – дей тирев.

Энни тергев беригиз!

Къызы: – Нече пайхаммар падишагъ бол-

ду? Алим: – Беш пайхаммар болду: Давут, Юсуп, Сулейман, Зулкъарнай, Магъаммат аллайгын салам. Демек, падишагълар беш пайхаммар болғын.

(«Юз суаллы Маликаны хабарындан»).

Дагъы да къарагъыз дагъы бу ишге!

Лап яхши охуйгъан яшгъя «беш» къыймат салалар.

Заводларда, фабриклерде, пачалыкъ къурумларда, идараларда ишлейгенлер ахшамлар сагъат бешде, иш гюнү битип, ишлерinden чыгъалар.

Къызы: – Нече зат атасы ёкъ туруп, дюньягъа гелди?

Алим: – Беш зат гелди. Адам (пайхаммар) – бир, Гъава – эки, Исмайыл учун къурбан болуп гелген къочкъар – уъч, Салигъ пайхаммарны ташдан чыкъгъан тюеси – дёрт, Мусаны ассасы – беш.

Бир керен агъайым тепсидеги чудуланы санап чыгъып:

– Бешиси магъя, къалгъан экиси сагъя, – деди.

Бир башы бузукъ оъзюню беш алмасын эки бувма гертмеге алышдыргъан. Беш де экиге беш де уъчню къошса нече болар? Билип бол!

Бизин шагъарбызыда къурулагъан уйленни кёбюсю – беш къабатты.

Гюнде беш намаз къылынар.

«Беш санавгъя байлавлу дагъы да не йимик мисаллар гелтирме боламан?» – деп ойгъя батгъан мюгълетде хоншум гирип гелип:

– Гелсана, шеш-беш ойнайыкъ! – деп, бёлдю де къойду.

Шолай яшыртгъын сырлары булангъы «бешлени» де къюоп, «алтылагъя» да гёз къаратайыкъ!

Алтылар

Сав юртну халкъы: «Адиллени алтаву алты адам этип болмайгъан ишни этген улан», – деп сёйлейлер. Амма ол шонча да



шолай не иш этгенни ачыкъ этип айтып болагъан бирев де ёкъ.

Сынавлу бирев:

– Алты улан кёп де тюгюл, бир улан аз да тюгюл! – деген. Ол шолай неге айтгъан экен?

Чабывда яхши бир атлыны артындан алты атлы етишме болмагъан, дейлер.

Ана яны – алты пай, ата яны – ярты пай (айтыв).

Ахшамгъы ашыбызын ашап битип, алгъамдуиллагъ этгинче, анабыз ариги уййден бошгъап булан алмалар гелтирип, шоланы алтыдан беш пай этип, бизге ульешип берди.

– Алты алгъаным да ёкъ, беш бергеним де ёкъ! – деп къопайгъан бирев.

Ол шолай не маънада айтгъан экен?

Алты улан, алты къыз – он эки яш, бир ана.

Оъзюмню томакълыгъымдан алтынчы класдан еттинчи кластига чыкъмай къалдым.

Алты улан болар – алтав, мени де къошса болар еттев.

«Еттилек» де етдик, еттилени гъакъында да шулай эшитдик:

Еттилер

Бир керен биз яшлар еттев болуп гъавгъа гетдик. Гъавбуз да тюзелмей, къайтып гелгенде, еттибиз де, тарлавгъа гирип, еттишер къартыкъ гъабижай алып, ёлубузну узатдыкъ. Къарайбыз, къаравулчу ёлубузну къыркъып токътагъан:

– Яшлар, сиз алып къойнуларыгъызгъа тыкъыган бу гъабижай жамиятныки. Соравсуз-солгъусуз юлкъуп алып гетме уялмаймысыз! – деп айып этип де къоймады. Къошуун алдына элтип тёкдюртдю. Биз де етти уййню есиридей болуп къайтдыкъ, – деп кюстюндю магъа билдирмей гъавгъа деп гетип, урусу саялы тутулгъан жан къурдашым.

Жагърафия (география) китапда язылгъангъа гёре, алдагъы СССР-ни топуракъ майданы Индияны майданындан эссе етти керен (кёп) уллу болгъан.

Бир акъ сакъаллы атай:

– Эрши иш этип биябур болгъунча, етти къат ерни тюбюне батгъан да къолай! – деп къайнашгъан авлетине.

Етти атасына ерли атларын билмейген авлетлер ерге гирсин! (айтыв).

Яшлар, гъали етти атларыгъызгъа ерли, олар кимлер болгъанны къайсыгъыз билесиз?

«Юз элли суаллы Маликаны хабарындан»:

Къыз: – Етти зат етти затдан тоймай. Олар нелердир? – деп сорагъанда:

– Гёзлер – къарамакъдан, къатынгиши – эргишиден, топуракъ – янгурдан, от – агъачдан, алим – илмудан, бай гиши – малдан, адам – яшамакъдан тоймай, – деп жавап берген алим.

Гъали «Эмчилени ёкъ этдик, аврувланы кёп этдик» деген баш булан язылып печатда чыкъгъан макъалагъа гёз къаратайыкъ. Мунда шулай язылгъан:

– Етти баш самурсакъын балгъа къошуп, ачкъарынгъа ашаса, хуртлар (сувалчанлар) ичинден къапчыгъы (дорбасы) булан чыгъар. Яда улан япыракъдан чуду этип; етти керен ашаса, къурсакъ авруву токътар.

Алим Абусупиян Акаевни «Амалсызын гемесинде» деген таржума китабында: «Ахыратда етти жагъаннем, сегиз женнет бары гъакъдыр», – деп язылгъан.

«Юз элли суаллы Маликаны хабарындан»:

Къыз: – Женнетлер неchedir? – деп сорагъанда: – Сегиздир! – деп жавап берген алим. – Атларын айт! – дегенде: – Даруслам, Дарулкъаар, Дадулжалал, Жаннат, Унагъым, Жаннатулгъирдас, Жантулмаъ, Жаннатулгъадин, Жаннатулгъая, – деп жаваплангъан алим.

– Жагъаннемлер неchedir?

– Еттидир, – деген ва: «Гъавуя, Гъуцама, Сакъар, Сагыр, Лазай, Жагъым, Жагъаннем,

– деп атларын да айтып берген.

Гёресиз, дюньяда яхшылыкълар кёп иимик, ахыратда да жагъаннемлерден эсе женнетлер кёп.

Яшлар тувуп, етти гюндөн бешикге салына.

Яшлар етти йылдан школагъя юрюме башлай.

«Етти ини-агъа, оымюрлери башгъя-башгъа». Бу чечеген ёммакъны ким чечме бола? Билдигизми? Билмединиз буса, айтып берейим:

Биринчиси – «Етти агъа-ини». Гъар жуманы гюнлери – етти гюн.

«Атлары башгъя-башгъа» демек, жуманы гюнлерини атлары: итнигюн, талатгюн, арбагюн, хамисгюн, жумагюн, сонгугюн, къаттыгюн.

Энемжая (солтанжая) – етти тюрлю тюсден бола.

Дагъы да шулай затгъа тергев берейик. Дин китапларда язылгъангъа гёре, Аллагутаала Муса пайхаммаргъа: «Ибадат учун сыйлы етти пайхаммаргъа байрам гысада гъарисине йылны гъар жумасыны бир гюнүн токъташдыраман», – деген.

1. Къаттыгюн – Иса пайхаммар гюню.
2. Итнигюн – Ибрагым пайхаммар гюню.
3. Талатгюн – Закарья пайхаммар гюню.
4. Арбагюн – Ягъия пайхаммар гюню.
5. Хамисгюн – Адам пайхаммар гюню.
6. Жумагюн – Магъаммат пайхамар гюню.
7. Сонгугюн – Муса пайхаммар гюню.

Энни «сегизлеге» де гёчейик:

Сегизлер

Дёрт эгиз – бир сегиз.

Дагъыстанда йылны сегиз айы яз, яй болар (исси болар). Шо да тамаша тюгюлмю!?

Бир кекелде сегиз таракълы хоразмав (масхара).

Дост – эгиз эгиз, душман – сегиз-сегиз (айтыв).

Берме бакъса – эгиз-эгиз, алма бакъса – сегиз-сегиз (айтыв).

– Сегиз болуп гелсегиз де къоркъмайман, – деп базынгъан бир хохабаз.

– Къайдан гелгесиз? – деп сорагъанда:

– Сегиз ай къыш болагъан, дёрт айы – яз болагъан ерден гелгенбиз, – деген бир къакъашуралы.

* Гюздюр – сегиз тюрлю алышынывтур: чача, элей, айландыра, булгъандыра, юлкъя, тазалай, ойреден тёге, ерден сибире.

– Сегизинчи айдан сонг къайсы ай геле?

– Тогъузунчу ай геле.

– Тогъуз айдан не бола?

Тогъузлар

Бек билди бир яш:

– Билемисиз, тогъуз къат опуракъ гийгинче, бир токълу тери тон гийген къолай, – деген.

Пис-пис тогъузавуч, гёзюнг гёрсюн, къарнынг тоймасын (къаргъыш айтыв).

«Токълу тоймас тогъуз гюн». Шо гюнлөр не гюнлөрдир? Неге шолай айтлы?

Дарсларын яхши охуйгъан яшлар шо суалгъа шулай жавап берер: гюзюн ахырында, къышны башында гюндюзлери лап да къысгъя, гечелери лап да узакъ болагъан тогъуз гюн. Шолай бола декабрь айны 16-сындан 25-не ерли (календаргъа къара!).

Бир керен атайым мен гиччирапгъя:

– Онгъя ерли санап боламысан? – деп сорады.

Мен де бир гъаллы тогъузгъа ерли ярмалатып санап тымыйдым.

Ол да магъя:

Билмей экенсен, балам,

Тогъуздан сонг боларны он.

Санап билмес яш бусанг,

Мени алдымдан: «Пошёл вон!» – деди.

Мен де салып-алып къачма къарагъан-мандыр дагъы, къагъып тутуп, къолуна да алып, тобукъларында да олтуртуп, бир ягъядан тюз санама да, къошса-тайдырса, артдырса-ульешселини де уйретди ва гъар санавну сырлары гъактында да хабарлады. Шондан сонг, школагъя юрийгенде муаллимибиз айтгъанларына да уллу болгъанда озюмню ягъымдан да къошуп, сизге пайдалы, хайырлы болсун деп, билгенлеримни, англагъанларымны мен де яздым. Тез къолунга сен де ал къалам! Вассалам, ваккалам!



НЕ ТАТЛИДИР АНА ТИЛ

Малик шагъарда тувгъан,
Ёкъ бу затда гъеч хата.
Тек бир затгъа талчыгъа
Юртдагъы уллу ата:

Къумукъ ожакъда тувуп,
Къумукъ тил билмей бала!
Билеми, уйде лакъыр
Янгыз рус тилде бола.

Ашама сюйсе, Малик:
– Я уже голодный, – дей,
– Почему это шорпа
Вот такой холодный?! – дей.

Гюнлени бир гюнүнде,
Яйны гюнүнде яллав
Булагъа гирип геле
Уллу атасы Салав.

– Салам, яшым! Гелгенмен
Мурадыма етмеге:
Бу яй, сени де алыш,
Гюрентавгъа гетмеге!

– Здравствуй, Деда!
Что такой Гюрентав?
Как бабушка, бабуля,
Садитесь, уллу Атав!

Малик орусча сёйлей,
Къумукъча – уллу ата.
Гый нечик де, тамаза
Яшгъа булай англата:

– Мой мальчик, твой отец
Тюз этмеген башында:
Надо же ана тилни
Уйретмеге яшында!

Гюрентав, бил чи, балам,
Трава растёт тав ара.

Къой-къозу онда оьсе,
Приезжай, гелип къара.

Увидишь танг къатывун,
Вечером гюн батывун.
Ата юртда англарсан
Ана тилни татывун.

... Юртда тюз уйч ай туруп,
Малик шагъаргъа къайта.
Онда гёрген затларын
Ана тилинде айта:

– Агъавум булан бирге
Къойлар да бакъым тавда.
Акъоъзенде кириндим,
Алма да жыйдым бавда.

Гёбюк басгъан сют ичдим
Челегинден Абамны.
Кёрюк экмек ашадым
Бишлакъ булан, яманмы?!

Агъач ярдым, от ордум,
Тепсиде харбуз гесдим.
Ана тилим уйренип,
Бу яз бир къарыш оьсдюм!

Оъзге тиллер де яхши.
Оъз тилим чи, вап-бабай!
Ана тилим уйретген
Сав болсун Агъав, Агъай.

Бу йыл шагъар мактапда
Бола ана тил дарслар.
Онда да юрюжекмен,
СИЗ де юрюгюз, яшлар.

Папа, мама, мен шулай
Этежекмен, билигиз:
Сизге де уйретермен
Бизин ана тилибиз!



Супуяханым БИЙБОЛАТОВА

Къумукъ алипба

А

Гъейлер, «А»-гъа къарагъыз!
Аякълары якъ-якъда.
Аякъларын къошагъан
Ортасында таякъ да.

Б

«Б» буса тургъан ойкем,
Биревню де сан этмей.
Къурсакъ да бар, баш да бар,
Янгыз аякълар етмей.

В

Вая, «В» геле тура!
Вёре, ари тайыгъыз.
Ону эки гёзю бар,
Къарамагъа къоюгъуз.

Г

«Г» гъарп «т»-ны яртысы,
Гёзю де ёкъ, сёзю де.
Янгыз да бир таявгъа
Таянгъан ол оъзю де.

Гъ

«Гъ» гъарп сёзю башында
Гелмеге болмай бир де.
КъарГъада, къарчыГъада
Ол белгили гёрюне.

Гъ

«Гъ» – къурдашы «гъ» гъарпны,
Бою, сою да ошай.
«Гъ» тамакъны къытыкълай,
«Гъ» – гъава булан яшай.

Д

«Д» – дандирек уютгъан,
Эретургъан ерлешип.
Эки таяв бек тутгъан
Ортасындан бирлешип.

Е

«Е» елкенли гемедей,
Яйгъан учь де къанатын.
Ел болмаса юрюмей,
Елкенлеп тутгъан атын.

Ё

«Ё» – ёлдаш «Е» хоншугъа,
Тек бюртюклер башында.
Гъар заман ёл да къоя
Бюртюксюз ёлдашына.

Ж

Эки ярты солгъуну
Бир къурух тутгъан жыйып.
Балалы тавукъ иимик
Къанатларын да яйып.

З

«З» – эки ярты солгъу,
Зынгырлай тербетсегиз.
Зурнайын зувуллата,
Эрнигизге элтсегиз.

И

Эки саптакъ, бир бутакъ,
Къыйышкъ куюде ерлешген.
Иржайып, икрам этип,
Кёп тутукъгъа бирлешген.

Й

«Й» – йылан иимик къайтып,
«И»-ге ошап оралгъан.
Башында тажы да бар
Инжи булан торлангъан.

К

«К» – кирит урулгъандай,
«Ка» – оъзюню де аты.

Къ

«Къ», – деп къарлыгъып къала,
Болмагъа сюйсе къатты.

Л

«Л» – таякъ, маймакъ аякъ,
Бизге кёп бола тарыкъ.
Лавуллап от да ягъа,
Лампадай бере ярыкъ.

М

«М» – «л»-ланы экисин
Бирге этип салгъандай.
«Мама» деген татли сёз
Мундан уългю алгъандай.

Н

«Н» – тик тургъан таякълар,
Бек тутулгъан белинден.
«Н»-ны хадирин билген,
Айырылмас элиНдеп.

Нг

ЗанГ дей, биревлер зенГ дей,
Тавуш эшитсе анГлы.
Болма ярай сююне
Ал шавласына танГны.



О

«О» – солгъу айланагъан,
«ОТ» да о-дан башлана.
От, орман, отав, оюн
Насибидир яшланы.

Ө

Оърдек сувларда юзе,
Оъзен тавдан ала баш.
«Оъзден» болмас, «оъ» болмай,
Оъзюнгню тут чу, а яш!

П

Эки таякъны башын
Япгъан бирдагъы таякъ.
Партангны артында тур,
Къыдырмай къырда саякъ.

Р

Къурсагъы уллу оъзюнден
«Р» гъарпны къартыллавукъ.
Ону айтып билмейген
Яшланы иши бавукъ.

С

«С» ярты ай гесекдир,
Сигру ятгъан оъзюнде.
Сыйлы болмагъа сийсенг,
Сюов тамсын сёзюнгден.

Т

«Т» – телбагъана тургъан,
Тартылгъан ток теллери.
Теллени тербетеген
Темиркъазыкъ еллери.

Ү

Къазны бурну йимикмен
Язывча язса мени.
Уллу уьстюнлюклеге
Элтемен эркин элни.

Ү

«Ү» «ү» гъарпдан этилген,
Бек мекенли турушу.
Сёз ичде «ю» деп язса,
Йибермегиз сёгюшюп.

Ф

Бичимге салынгъан къоллар,
Уьфюрюп толгъан якълар.
«Фу-ү» деп, сан да этмей бу,
Таза болмаса бар якълар.

Х

Эки «с» бир-бирине,
Хуйланып эретургъан.
Харбуз сама ашасын,
Арасында не къалгъан.

Ц

«И»-ге къуйрукъ къошуулуп,
«Ц» болуп къалгъан дейлер.
«Цыц», – деп токъатып къоя,
Дарсда сёйлесе, гъейлер!

Ч

Шанжалны терс салгъандай,
«Ч» бир аякъдан тургъан.
Чай, чабакъ, чали, чита
Деген сёзлени къургъан.

Ш

«Ш» – учь къазыкъ бегилген
Бир къазыкъны уьстюне.
Айтсанг, шувшув согъула,
Айтмай къойсанг, кюстюне.

Щ

«Щ» да – хоншугъа ёлдаш,
Къуйругъу бар оъзюню.
Тек бир сама ёлукъмай
Къумукъланы сёзюнде.

Җ

Маънасыз гъарп тюгюлмен,
Бар мени де къуллугъум.
Тамакъ тавуш гёрсетме
Къоллай мени къумугъум.

Ы

Болмасам да башында,
Сёз ичде кёп гелемен.
Йыракъ, ювукъ эллеге
Йыр салам йиберемен.

Э

Дёгерекни яртысы,
Орта боюнда тили.
«Э» башлайгъан сёзлени
Эбинден болмай гелип.

Ю

Бир таякъыга тагъылгъан
«Ю» гъарпны солгъусу бар.
Сёзю башында мекен,
ичде «Ү» болуп къала.

Я

Бир къурсакъыга-эки аякъ
Чайкъалышып бараман.
Охуп билеген яшлагъа
Менмен бир уллу балгъам.

«Я дегенинг – ялгъан», – деп,
Къалдырмагъыз хатирим.
Алфавитни артыман,
Яшгъа береген билим.



«Бизин тил» деген жамият къурум
«Абусупиян» деген къумукъ китап издательство

БИЗИН ТИЛ

на кумыкском языке

Редактор *Рашид ГАРУНОВ*

Технический редактор *Хабибула АЛХАНАДЖИЕВ*

Набор Лайла ЗАКАРЬЯЕВА

Верстка Башир ЧИТАЕВ

Художник-дизайнер *Магомед МОЛЛАКАЕВ*


Редакция булан байлавлукъ тутмакъ учунгъу
телефон номер: 8928-540-24-70
garun-rashid@mail.ru

Подписано в печать 20.04.2017.

Формат 30 x 42⁸. Бумага офсетная.

Гарнитура Minion Pro. Печать ризографная.

Усл. печ. 12. Тираж 999.



Издательство «АБУСУПИЯН»